

# SALAMO

## 1

- <sup>1</sup> Taunimanima binai vada e namo:  
     ia na kara dika taudia edia henega sela,  
     kara kerere-kerere taudia edia dala ai se gini,  
     hevaseha taudia edia helai gabudia ai se  
     helai;
- <sup>2</sup> A Iehova ena taravatu ia ese e moalelaiamu,  
     ena taravatu e laloa boimu, e laloa ranimu.
- <sup>3</sup> Ia na sinavai isena ai e hadoa auna na heto:  
     ena huahua negana ai ia anina do baine dobi,  
     ia rauna danu do basine marai,  
     gau idoidiai ia baine kara be anidia do bae vara  
     goevañoeva.
- <sup>4</sup> Kara dika taudia na dia unuheto:  
     idia na uit momodia na heheto,  
     lai ese e oda ohomu.
- <sup>5</sup> Taunabunai kara dika taudia na  
     hahemaoro negana ai do basie gini,  
     kara kerere-kerere taudia danu  
     kara maoromaoro hebouna ai do basie gini.
- <sup>6</sup> Badina be Iehova na kara maoromaoro taudia  
     edia dala dibana;  
     A kara dika taudia,  
     edia dala do baine doko.

## 2

- <sup>1</sup> Badina be dahaka lalo-dibura taudia na e heloño-  
     heño?omo?  
     Badina be dahaka taunimanima edia lalo-  
     hadai na kavakava?
- <sup>2</sup> Tanobada pavapavadia e gini toremu,

- bona lohia taudia na e henega boumu;  
 Iehova bona ia ese e horoa tauna na  
     idia ese e inai henidiamu.  
 Idia na e tomu:  
<sup>3</sup> Edia gadea baita hamotudia,  
     e ġuilaida varodia baita negedia.
- <sup>4</sup> Guba ai e nohomu Diravana ese baine kirikiri-  
     laidia;  
     Gaubada ese baine hevasehalaidia.
- <sup>5</sup> Ia ese baine gwau henidia mai baduna ida,  
     ena badu-ġaraġara ese baine hahisihisidia.
- Baineto:  
<sup>6</sup> Egu pavapava vada na atoa,  
     egu ororo Siona dorina ai.
- <sup>7</sup> Iehova ena hereva baina harorolaia,  
     ia ese vada e hadibagu heġereġerena, eto:  
 Oi na lau natugu,  
     hari dina ai vada na havaramu.
- <sup>8</sup> Ba noigu, bena bese idau-idau baina henimu, oi  
     ahumu,  
     tanobada dokodia do baina henimu, emu.
- <sup>9</sup> Auri itotohina amo ba hamakohidia,  
     uro na heto ba huaridia.
- <sup>10</sup> Pavapava e, ba aonega;  
     tanobada lohiamui e, ba diba.
- <sup>11</sup> Iehova ba toma henia diho mai garimui,  
     bona mai heude-heudemui ida.
- <sup>12</sup> Ia aena palapaladia ba harahudia,  
     baine badu henimui bena dala ai ba mase na  
         garina;  
     badina be ena badu e vara haraġamu.

Ia e abidadama heniamu taudia be nanamo.

### **3**

<sup>1</sup> Iehova e, e inai henigumu taudia na ede hohodia!

E tuari henigumu taudia na hutuma.

<sup>2</sup> Hutuma herea ese lau e herevalaigumu, etomu, Dirava ese se kahaiamu. (Selah)

<sup>3</sup> Iehova, e, o ġeġegu ahumu, egū kesi ai o laomu; oi na egū diari, lau kwaragu o abia isimu.

<sup>4</sup> Iehova na boi heniamu, bena ena ororo helaġana amo e haere henigumu. (Selah)

<sup>5</sup> Lau na hekure, na mahuta, ma na noga; badina be Iehova na egū imuda.

<sup>6</sup> Taunimanima gerebu gerebu basina gari henedia; e ġeġegu ahumu bona e tuari henigumu taudia na garidia basina gari.

<sup>7</sup> Iehova e, a tore isi!

Egu Dirava e, a hamaurigu!

Badina be inaigu iboudiai na vahadia vada o patadia, kara dikā taudia danu isedia vada o hak-waidudia.

<sup>8</sup> Hahemauri na Iehova ena amo e maimu; emu hahenamo na emu oreia taudia latadiae miamu. (Selah)

### **4**

<sup>1</sup> Egu kara maoromaoro Diravana e!

Na boi henimumu negadia ai na ba haere henigu.

Egu dika amo vada o ruhagu nege;  
A bogagu hisi, egu noinoi a kamonai.

<sup>2</sup> Taunimanima e, umui ese lau namogu na hemarai ai ba halaoa ela bona edena nega ai?

Hhereva kavakavadia ba ura henidia bona hereva koikoidia ba tahudia  
ela bona edena nega ai? (Selah)

<sup>3</sup> Ba diba, Iehova ese ia ibadinana tauna na vada e abia hidi;  
Iehova na boi heniamu negadia ai na ia ese e kamonai henigumu.

<sup>4</sup> Ba hemataurai, basio kara dika;  
sibomu lalomu ba tahua emu mahuta gabuna ai,  
a basio hereva. (Selah)

<sup>5</sup> Kara maoromaoro bouboudia ba hahelaǵadia,  
bona Iehova bavabidadama henia.

<sup>6</sup> Hutuma na e tomu, Daika ese baine hanamomai?  
Iehova e, oi vairamu diarina bavabia isi ai emai ai.

<sup>7</sup> Lau lalogu vada o hamoalea;  
egu moale ese edia uit bona edia vine ranuna  
e habadamu taudia edia moale na e herea-  
iamu.

<sup>8</sup> Mai mainogu ida baina hekure bona baina  
mahuta,  
Iehova e, badina be oi mo sibomu ese o  
gimagumu.

## 5

<sup>1</sup> Iehova e, egu hereva a hakala henidia;

- egu ġanaġana a kamonai.
- <sup>2</sup> Egu Pavapava bona egu Dirava e, egu taitai a kamonai,  
badina be oi na tai henimumu.
- <sup>3</sup> Iehova e, daba ai lau gadogu o kamonaimu;  
daba ai na toma henimu dihomu, bona na hegimamu.
- <sup>4</sup> Badina be oi na dia kara dika imoalelaina Dira-vana;  
oi dekemu ai dika ta se miamu.
- <sup>5</sup> Hekokoroku taudia na oi vairamu ai basie gini;  
kara dika taudia iboudiai o inai henidiamu.
- <sup>6</sup> Koikoi taudia o habuadia tarimu;  
Iehova ese ala-alala taudia bona koikoi taudia e  
inai henidiamu.
- <sup>7</sup> A lau be emu ruma lalonai baina raka vareai,  
emu hebogahisi bada-herea bagunai;  
emu dubu helaġana baina haġere, baina toma  
dih;
- oi baina gari henimu.
- <sup>8</sup> Iehova e, emu kara maoromaoro ai ba hakaugu,  
lau inaigu daidiae;  
Emu dala ba hamaoromaoroa  
lau vairagu ai.
- <sup>9</sup> Badina be asi hereva momokanina ta idia ududia  
ai;
- lalodia na kara dika ai eme honu honu dae,  
gadodia na gara na heto,  
maladiä na e hereva manada-manada  
koikoimu.
- <sup>10</sup> Dirava e, edia dika davadia ba henidia;  
edia lalo-hadai dikadia ese bae hahekwa-kwanaid;  
edia kara dikadia momo daidiae ba negedia daure;

badina be idia ese oi vada e gwau tubu hen-imu.

- <sup>11</sup> Oi e abidadama henimumu taudia na bae moale,  
       bae moale hisi dae ela bona hanaihanai,  
       oi ese o gimadiamu dainai;  
       oi ladamu e ura heniamu taudia ese bae moalelaimu.
- <sup>12</sup> Badina be oi ese kara maoromaoro tauna o hanamoamu;  
       Iehova e, emu harihari-bada amo o gima-  
       iamu, kesi na heto.

## 6

- <sup>1</sup> Iehova e, emu badu ai basio gwau henigu,  
       emu badu ġaragarana ai basio hahisigu.
- <sup>2</sup> Iehova e, a bogagu hisi, badina be na manokamu;  
       Iehova e, a hamaurigu, badina be turiagu e hisihisimu.
- <sup>3</sup> Laumagu danu e hisihisi badamu;  
       Iehova e, ela bona edena nega?
- <sup>4</sup> Iehova e, a gini kerehai, lau laumagu ba hamauria,  
       emu hebogahisi dainai ba hamaurigu;
- <sup>5</sup> badina be mase ai tau ta ese basine lalomu tao;  
       mase taudia edia gabu ai daika ese baine imodaimu?
- <sup>6</sup> Ġanaġana ai na hesikumu,  
       hanuaboi iboudiai egū mahuta gabuna ai na tai noho  
       egū mahuta gedana na iruru-matagu ai e pari-parumu.

- <sup>7</sup> Matagu na e valahu-valahumu, egu lalo-hisihisi  
dainai,  
egu roharoha e manokamu, inaigu lōgora  
iboudiai daidiae.
- <sup>8</sup> Kara havara taumui iboumui ai, egu amo a raka  
oho,  
badina be Iehova ese egu taitai rēgena vada e  
kamonai.
- <sup>9</sup> Iehova ese egu noinoi vada e kamonai,  
Iehova ese egu ġuriġuri e abia daemu.
- <sup>10</sup> Lau inaigu iboudiai bae hemarai, lalodia na bae  
hekwarahi.  
idia na bae raka kerehai, hemarai ese baine  
abidia haraġa.

## 7

- <sup>1</sup> Iehova e, egu Dirava, lau oi na abidadama henimumu;  
e havagumu taudia edia amo ba harohogu  
mauri, ba hamaurigu
- <sup>2</sup> leona na heto bae daregu na garina,  
asi ihamaurigu bae verigu oho na garina.
- <sup>3</sup> Iehova e, egu Dirava, ini bama kara toma,  
eiava imagu bema kerere,
- <sup>4</sup> eiava turagu bama kara dikha henia,  
eiava inaigu ena ġau bama dadi kava.
- <sup>5</sup> Inaigu ese baine havagu ela bona baine lasigu  
tao,  
egu mauri na tano ai baine moia tao,  
bona laumagu na ġahu ai baine moimoilaia.
- <sup>6</sup> Iehova e, mai badumu ida a tore isi,  
lau inaigu edia badu ba laoa ahu totona a tore  
isi;

- Egu Durava e, a nogá,  
hahemaoro vada o hahegánilaia.
- <sup>7</sup> Bese idau-idau edia hegogo ese baine gegeemu  
ahu;  
atai ai ba helai, idia daediai.
- <sup>8</sup> Iehova ese bese idau-idau e hahemaoro henidi-  
amu:  
Iehova e, egú kara maoromaoro bona egú  
lalo-góeva góeva hegeregeredia ba hahemaoro  
henigu.
- <sup>9</sup> Kara havara taudia edia dika ba hadokoa,  
a kara maoromaoro taudia do ba haginidia;  
badina be oi na kara maoromaoro Diravana,  
taunimanima daradia bona lalodia o dibadi-  
amu.
- <sup>10</sup> Dirava na egú kesi,  
ia ese lalo góeva góeva taudia e hamauridiamu.
- <sup>11</sup> Dirava na hahemaoro tauna, mai ena kara  
maoromaoro;  
dina iboudiai Dirava ese kara dika e badu  
heniamu.
- <sup>12</sup> Tau ta basine helalo kerehai,  
Dirava ese ena dare baine segea.  
Ena peva vada e beua, vada e rohea,
- <sup>13</sup> ena ala-ala gaudia vada e abi hegaéga,  
ena diba na lahi dibadia ai e halaodiamu.
- <sup>14</sup> A itaia, kara havara tauna ese dika e havara-  
amu,  
kara dika ai e rogorogomu,  
koikoi daladia e havaramu.
- <sup>15</sup> Ia ese guri e geia dobumu,  
bena e geia gurina lalonai e moru dobimu.
- <sup>16</sup> Ena kara dika na sibona kwarana ai ma e  
kaumu,

ena dağedağe na sibona tubuana ai e dihomu.

**17** Iehova baina hanamo, ena kara maoromaoro  
dainai,  
Iehova, atai doriva-doriva Diravana, ladana  
baina imodaia.

## 8

**1** Iehova e, ai emai Lohiabada,  
tanobada idoinai oi ladamu vada e namo  
herea,  
oi hairaimu na guba ai vada o atoa.

**2** Natudia karukarudia, rata e inumu memerodia,  
ududia amo  
goadia vada o hadaia, e inai henimumu taudia  
daidiae;  
inai tauna bona dika davana ma e haloua tauna  
oi ese ba hatuidia totona.

**3** Emu guba name itaia, oi imamu kwakikwakidia  
ese e karaia,  
hua bona hisiu danu oi ese o atodia:

**4** Taunimanima be dahaka oi ese o laloamu?  
taunimanima natuna be daika oi ese o igoa  
itamu?

**5** Vada o karaia, Dirava ese sisina mo ia e herea-  
iamu;  
hairai bona hemataurai ia kwarana vada o  
havavalalaia,

**6** Oi imamu amo o kara ġaudia iboudiai vada o  
henia, baine biagudia,  
ġau iboudiai ia aena henudiai vada o atodia:

**7** mamoe bona boromakau iboudiai,  
uda boromadia danu,

**8** atai manudia bona davara gwarumedia,

bona gadobada daladia ai e loamu ġaudia  
iboudiai.

<sup>9</sup> Iehova e, ai emai Lohiabada,  
tanobada idoinai oi ladamu vada e namo  
herea.

## 9

<sup>1</sup> Iehova baina hanamoai mai lalogu idoinai:  
emu hoa karadia iboudiai baina herevalaidia.

<sup>2</sup> Bainā moale, oi baina imodaimu,  
oi ladamu ihanamolaina anena baina abia,  
Herea-Mikamika Diravana e!

<sup>3</sup> Lau inaigu e raka kerehai negana ai,  
e hekwakwanai bona e mase oi vairamu ai.

<sup>4</sup> Badina be egū dala maoromaorona vada o  
hamomokania,  
terono ai vada o helai, hahemaoro maoro-  
maorona vada o karaia.

<sup>5</sup> Bese idau-idau vada o gwau henidia,  
kara dika taudia vada o habuadia tari;  
ladadia vada o Ialodia nege ela bona hanai-  
hanai.

<sup>6</sup> Inai taudia vada e dika hanaihanai, vada e puki;  
edia hanua vada o raġadiah oho,  
ilalotaodia vada e boio.

<sup>7</sup> A Iehova na terono ai e helai hanaihanaimu,  
ena terono vada e haginia, hahemaoro to-  
tona;

<sup>8</sup> ia ese tanobada e hahemaoro heniamu mai  
maoromaorona ida,  
tanobada besedia e hahemaoro henidiamu  
mai maoromaorona ida.

- <sup>9</sup> Haida ese e dağedağē henidiamu taudia edia  
kohoro na Iehova,  
ia na edia kohoro, dika negadia ai.
- <sup>10</sup> Oi ladamu dibadia taudia ese e abidadama hen-  
imumu,  
badina be, Iehova e, oi vada e tahumu taudia  
na asio rakatanidia.
- <sup>11</sup> Iehova, Siona ai e nohomu Diravana, ba  
imodaia!  
Iena kara na bese idau-idau bogaragidiai ba  
herevalaidia!
- <sup>12</sup> Badina be rara davana iabina Diravana ese e  
lalodiamu;  
haida ese e dağedağē henidiamu taudia edia  
taitai na ia ese se laloa boiomu.
- <sup>13</sup> Iehova e, ba bogagu hisi!  
E inai henigumu taudia edia amo na abi hi-  
sidia na ba itadia,  
mase ikoukoudia amo o abigu isimu Diravana  
e!
- <sup>14</sup> Bena oi ihanamolaimu herevadia iboudiai  
baina gwaurai;  
Siona natuna kekenina ena ikoukou ai emu  
hahemauri baina moalelaia.
- <sup>15</sup> Bese idau-idau na sibodia e ġei guridia lalodiai  
vada e moru dobi;  
sibodia e otoa huona ai aedia vada e headai,
- <sup>16</sup> Iehova na sibona e hahedinarai, hahemaoro  
vada e karaia;  
kara dika taudia na sibodia imadia karadia ai  
vada e heidoa. (Higgaion. Selah)
- <sup>17</sup> Kara dika taudia na mase taudia edia gabu  
baela;

Dirava e laloa boiomu besedia iboudiai na unu baela.

<sup>18</sup> Badina be e dabumu taudia na basine lalodia boio hanaihanai,  
bona ogoğami taudia edia helaro na basine mase hanaihanai.

<sup>19</sup> Iehova e, a tore isi! Taunimanima na basie kwalimu;  
bese idau-idau na oi vairamu ai bae hahe-maoro henidia.

<sup>20</sup> Iehova e, ba hagaridia!  
Bese idau-idau taudia bae diba idia na taunimanima mo. (Selah)

## 10

<sup>1</sup> Iehova e, dahaka dainai oi na dauhai o ginimu?  
Dahaka dainai dika negadia ai o noho hehunimu?

<sup>2</sup> Kara dika taudia ese ogoğami taudia e hahisihsidiamu mai hekokorokudia ida;

sibodia edia lalo-hadai dikadia ai bae heidoa.

<sup>3</sup> Badina be kara dika tauna ese sibona ena ura e heagilaiamu,

bona mata-ğaniğani tauna ese Iehova e uduguiraiamu bona e dadaraiamu.

<sup>4</sup> Kara dika tauna vairana hekokorokuna ai ia se tahuamu;  
ena lalo-hadai idoinai be Dirava na lasi.

<sup>5</sup> Nega idoidiae ena dala na auka;  
oiemu hahemaoro na atai ai, ia na se itamu;  
ia inaina iboudiai e pururudiamu.

<sup>6</sup> Lalona e hadaiamu, e tomu “Basina marere-marere,  
uru iboudiai lalodiai basina dika”.

- 7 Uduna na heuduguirai bona koikoi bona  
dağedağe eme honu honu dae,  
malana henunai kara havara bona kara dika  
na mimia.
- 8 Hanua lalodai e bani taomu,  
gabu hehunidia ai asi edia kerere taudia e  
aladia masemu.
- 9 Ia matana ese manoka-manoka taudia e hasi-  
nadodiamu;  
ia na komu gabuna ai e banimu, leona ese ena  
kohua ai e banimu na heto;  
ogogami tauna e bani heniamu, baine dabaia tao  
totona;  
ena huo ai e koia vareaimu, bena e dabaia  
taomu.
- 10 Manoka-manoka tauna e hapataia tarimu, e  
moru dihomu,  
kara dika tauna ena goada ese e hamoruamu.
- 11 Kara dika tauna na lalona e hadaiamu, e tomu  
“Dirava vada e helalo boio;  
vairana vada e hamuea, egu kara dika basine  
itaia”.
- 12 Iehova e, a tore isi! Dirava e, imamu a duduia  
isi!  
Hisi e animu taudia na basio lalodia boio.
- 13 Badina be dahaka kara dika tauna ese Dirava e  
dadaraiamu?  
Dahaka dainai lalona e hadaiamu, e tomu  
“Anina basio tahua”?
- 14 Hekwarahi bona hisihisi vada o itaia, oibe, vada  
o haeroa,  
oi imamu ai bavabia totona;  
manoka-manoka tauna ese oiemu ai e taomu;  
oi ese ihareha o kahadiamu.

- <sup>15</sup> Kara havara bona kara dika tauna imana na ba hakwaidua;  
 ena dika ba tahua ela bona ta basio davaria.
- <sup>16</sup> Iehova baine pavapava hanaihanai;  
 bese idau-idau na iena tano amo bae ore.
- <sup>17</sup> Iehova e, manau taudia edia noinoi ba kamonai,  
 ani;  
 Ialodia ba hagoadadia, bona ba hakala henidia,
- <sup>18</sup> ihareha bona hisihisi taudia ba kara maoro-maoro henidia totona;  
 unu amo tanobada tauna na hahegari kara-dia basine kara lou.

## 11

- <sup>1</sup> Iehova na abidadama heniamu; dahaka dainai o hamaorogumu, o tomu  
 “Ororo ba roho henia, manu na heto;
- <sup>2</sup> a itaia, kara dika taudia na peva e rohemu,  
 edia diba na maora ai e adaimu,  
 lalo-góeva góeva taudia na dibura ai bae tarakidia totona;
- <sup>3</sup> badidia bema habua tari, kara maoromaoro taudia na ede bae kara toma?”
- <sup>4</sup> Iehova na ena dubu helaǵana ai e nohomu,  
 Iehova ena terono na guba ai mia;  
 ia matana ese taunimanima natudia e nenedamu,  
 ia matana kopidia ese e dibadiamu.
- <sup>5</sup> Iehova ese kara maoromaoro taudia bona kara dika taudia e dibadiamu;  
 ia laumana ese daǵedáge karadia e ura henimu tauna na e inai heniamu.

<sup>6</sup> Ia ese lahi gidadia bona teio\* na kara dika taudia latadai baine ġiġi dobi;

lai siahuna na edia kehere anina ai bainela.

<sup>7</sup> Badina be Iehova na maoromaoro, bona kara maoromaorodia ia ese e ura henidiamu; kara maoromaoro taudia ese ia vairana bae itaia.

## 12

<sup>1</sup> Iehova e, a kahamai! Badina be Dirava imatauraina taudia vada e ore; kamonai taudia na taunimanima natudia bogaragidia amo vada e puki oho.

<sup>2</sup> Iboudiai na dekedia taudia e koidiamu; bibinadia na hereva manada-manadadia amo e koikoimu, bona lalo-rua amo e herevamu.

<sup>3</sup> Bibinadia amo hereva manada-manadadia koikoidia bona maladia amo hekokoroku herevadia e gwauraimu taudia na Iehova ese bema negedia daure be namo.

<sup>4</sup> Badina be idia na e tomu  
“Malada amo baita kwalimu, bibinada na siboda eda;  
ita biaguda be daika?”

<sup>5</sup> Iehova na e tomu

“Ogoġami tauna ena ġau e dadihaimu dainai,  
bona asi ena tauna e ġanaġanamu dainai,  
lau na baina tore-isi,  
e ura heniamu mauri-gabuna ai baina atoa”.

---

\* **11:6** Teio: Nadi ta ladana, Helene gado ai. E aramu, bena bonana dika-hereana e daemu, taunimanima e hamasediamu. Ladana English gado ai na “sulphur”.

- <sup>6</sup> Iehova ena gwauhamata na gwauhamata ġoevadaedia,  
*silver* na tano ai ihavevelaina lahina ai nega  
 hahitu e haġoevaiamu na heto.
- <sup>7</sup> Iehova e, oi ese ba gimamai,  
 ina uru amo ba gimamai hanaihanai.
- <sup>8</sup> Kaha iboudiai kara dika taudia na e hetahu  
 loaloamu;  
 kara havara na taunimanima natudia bogaragidiai e imodaimu.

## 13

- <sup>1</sup> Iehova e, ela bona edena nega ai?  
 Ba lalogu boio ela bona hanaihanai a?  
 Vairamu na egu amo ba hamuea ela bona edena  
 nega ai?
- <sup>2</sup> Daragu baine doko ela bona edena nega ai?  
 Lalugu na dina idoinai baine hisihisi a?  
 Lau inaigu baine hereagu ela bona edena  
 nega ai?

- <sup>3</sup> Iehova e, egu Dirava, ba haeroa bona ba haere  
 henigu;  
 matagu ba hadiaridia, mase ena mahuta ai  
 baina mahuta na garina,
- <sup>4</sup> inaigu na baineto “Vada na hadarerea” na ga-  
 rina,  
 bona na manokamu dainai e inai henigumu  
 taudia bae moale na garina.
- <sup>5</sup> A lau na emu hebogahisi vada na abidadama  
 henia;  
 lau lalogu ese emu hahemauri baine moale-  
 laia.

**6** Ane baina abia, Iehova ena;  
badina be ia ese ena harihari-bada ai vada e hanamogu.

## 14

**1** Kavakava tauna ese lalona e hadaiamu, e tomu “Dirava na lasi”.

Idia na didika, kara mirodia vada e kara;  
asi tauna ta ese kara namodia e karamu.

**2** Iehova na guba amo e roha dobimu,  
taunimanima natudia e nenediamu;  
baine itadia, ta e kara aonegamu eiava,  
ta ese Dirava e tahuamu eiava.

**3** Iboudiai vada e raka boioboio, iboudiai na didika;  
ta se kara namomu, lasi ona lasi vaitani.

**4** Hari kara dika taudia,  
hari egū bese taudia e anidiamu flaoa e animu  
heğereğerenā  
bona Iehova ladana asie hahaneamu taudia  
na  
asi aonegadia a?

**5** Gari bada ese baine butudia tao,  
badina be Dirava na kara maoromaoro taudia  
edia uru ida e nohomu.

**6** Ogoğami tauna ena lalo-hadai vada o hahe-maraidia,  
a Iehova na iena mağu.

**7** Israel ihamaurina na Siona amo bainema be  
namo!  
Iehova ese ena bese taudia baine ruhadia nege  
negana ai na

Iakob baine moale,  
Israel baine moale hisi dae.

## 15

<sup>1</sup> Iehova e, daika oiemu ġuriġuri kalagana ai baine  
noho?

Daika na oiemu ororo helāġana ai baine  
taruha?

<sup>2</sup> Taunimanima binai: e raka ġoеваġgoevamu,  
kara maoromaoro e karamu,  
bona lalona amo hereva momokani e gwau-  
raimu;

<sup>3</sup> ia malana amo haida se hadikadiamu,  
turana ihadikana karana ta se karaiamu,  
bona dekena tauna ihadikana herevana ta se  
gwauraiamu;

<sup>4</sup> kara gageva-gageva tauna na ia ese e ihi-  
ihiraiamu,  
a Iehova garina e garimu taudia na ia ese e  
hanamodiamu;  
ia sibona ihadikana gwauhamatana e gwaura-  
iamu negana ai  
ma se idaumu;

<sup>5</sup> ia ese ena moni se henitorehaimu davana iabina  
totona,  
bona asi ena kerere tauna ihadikana monina  
danu ia se abiamu.

Unu e kara tomamu tauna na do basine marere  
ela bona hanaihanai.

## 16

<sup>1</sup> Dirava e, a hamaurigu,  
badina be oi na abidadama henimumu.

<sup>2</sup> Iehova na hereva heniamu, na tomu  
“Oi na egu Ġaubada, asi egu namo idauna ta,

egu namo na oi mo emu ai”.

<sup>3</sup> Tanobada ena helaāga taudia na heherea-dadae,  
lau ese na moalelaidiamu.

<sup>4</sup> Dirava idauna e abia hidimu taudia ese edia lalo-  
hisihisi e habadaiamu;  
edia inuinu bouboudia na rara, a lau be  
basina sei nege,  
ladadia na udugu bibinadia amo basina  
gwaurai.

<sup>5</sup> Iehova vada na abia hidi, lau ahugu bona lauegu  
kehere;  
oi ese lau ahugu o gimaiamu.

<sup>6</sup> Egu dala na gabu namodia amo e laomu;  
oibe, lau ahugu na namo herea.

<sup>7</sup> Iehova na hanamoamu, ia ese e hahealo  
henigumu;  
hanuaboi lalonai lau lalogu ese e  
hadibagumu.

<sup>8</sup> Iehova na vairagu ai na atoamu nega idoinai;  
badina be ia na lau idibagu kahana ai dainai  
lau na basina marere.

<sup>9</sup> Taunabunai, lalogu na e moalemu, bona lau-  
magu na e hisi daemu;  
tau-anigu danu e noho namonamomu.

<sup>10</sup> Badina be oi ese basio kahugu nege, mase taudia  
edia gabu ai;  
e matauraimumu tauna na guri basio ha-  
heitalaia.

<sup>11</sup> Mauri dalana oi ese o haheitalaigumu;

oi vairamu ai moale e ġuġurumu,  
 oi imamu idibana ai moale ġaudia na e mia  
 hanaihanaimu.

## 17

- <sup>1</sup> Iehova e, lalo-hadai maoromaorona a hakala  
 henia; egu taitai a kamonai.  
 Egu ġuriġuri a hakala henia, bibinagu asi  
 koikoidia ese e gwauraiamu.
- <sup>2</sup> Ihahemaoro-henigu na oiemu amo bainema;  
 oi matamu ese kara maoromaoro bae itaia.
- <sup>3</sup> Lalogu boma dibaia, hanuaboi ai boma vadivadi  
 henigu,  
 boma tohogu, a kara dikā na lalogu ai ba-  
 sioma davaria;  
 udugu na se kereremu.
- <sup>4</sup> Taunimanima edia ġaukara lalodiae lau na  
 daġedaġe taudia edia dala amo vada na  
 raka siri,  
 oi udumu bibinadia herevadia daidiae.
- <sup>5</sup> Oiemu dala ai vada na raka balaheni,  
 lau aegu na asie dedi.
- <sup>6</sup> Dirava e, na boi henimumu, badina be oi ese ba  
 haere henigu dainai;  
 a hakala henigu, egu hereva ba kamonai.
- <sup>7</sup> Oi imamu idibana ai inaidia amo e roho mau-  
 rimu taudia ihamauridia Taumu e,  
 emu hebogahisi ba hahedinaraia, hoa ġauna  
 na heto.
- <sup>8</sup> A gimagu, ta ese matana nadinadina e gimaiamu  
 na heto;  
 oi hanimu ikerukerudia ai ba hunigu,

<sup>9</sup> kara dika taudia, egu ġau e dadihaimu taudia,  
edia amo,  
bona inaigu, e daigu heġeġemu taudia edia  
amo.

<sup>10</sup> Lalodia e koudiamu, asi edia hebogahisi;  
ududia e kehodiamu, hekokoroku herevadia  
e gwauraimu.

<sup>11</sup> Idia na e gavagu taomu, e daigu heġeġemu,  
e itagu taomu, tano ai bae tahogu dobi e tomu.

<sup>12</sup> Idia na leona damuna idarena e ura lalodikamu  
na heto,  
leona natuna na komu gabuna ai e banimu na  
heto.

<sup>13</sup> Iehova e, a tore isi! Ba tuari henidia, ba tahodia  
dobi!

Emu dare bavabia, dika taudia edia amo ba  
hamaurigu;

<sup>14</sup> Iehova e, oi imamu amo ba hamaurigu, tauni-  
manima edia amo,  
tanobada ai mo edia mauri ahuna e abiamu  
taudia edia amo.

Adia vada o abi heġaeġae ġaudia amo bogadia ba  
hakunu;  
natudia bogadia bae kunu bona bahu baine  
mia;  
edia bahu baine mia, natudia karukarudia  
adia.

<sup>15</sup> A lau be kara maoromaoro ai oi vairamu baina  
itaia;  
baina noga negana ai oi oromamu itana ai  
lalogu do baine namo.

**18**

<sup>1</sup> Iehova e, egu goada, na lalokau henimumu!

<sup>2</sup> Iehova na egu nadi-gini, egu maḡu, egu hahe-mauri tauna;

egu Dirava, egu nadi-gini, na abidadama he-niamu tauna;

egu kesi, egu mauri doana, bona egu kohoro.

<sup>3</sup> Iehova, e imodaiamu Diravana, na tai heniamu, bena inaigu edia amo e hamaurigumu.

<sup>4</sup> Mase iḡuidia ese e ġeġegu ahuva,

hahedika abatadia ese e hagariguva;

<sup>5</sup> Mase Gabuna ena iḡui varodia ese e idoagu, mase huodia ida na tata hedavari.

<sup>6</sup> Egu hisihisi ai Iehova na boi henia;

egu Dirava na tai henia, baine durugu nato.

Ena dubu ai lau gadogu e kamonai;

egu taitai na ia taiana ai e kau.

<sup>7</sup> Una negana ai tanobada e laga, e heude-heude, ororo badidia danu e heude-heude, e marere-marere,

badina be ia vada e badu.

<sup>8</sup> Kwalahu na ia uduna matudia amo e dae,

Iahi siahuna na ia uduna amo e lasi,

lahi hururu-hururudia na iena amo ema.

<sup>9</sup> Guba e beua tari, bena e diho;

dibura badana na ia aena henuidai.

<sup>10</sup> Kerubi ai e gui, e roho lao;

lai hanina amo e roho haraḡa-haraḡa.

<sup>11</sup> Dibura na e hekoulaia,

dagadaga dubana e hetarulaia.

- <sup>12</sup> Hururu-hururu na ia vairanai,  
 unu amo medu-hetari bona lahi-  
 hururu-hururu na  
 ena dagadaga amo e diho.
- <sup>13</sup> Iehova ese guba-rahua ai e hereva,  
 Herea Mikamika na e gwau isi,  
 bena medu-hetari bona lahi-hururu-hururu  
 na e diho.
- <sup>14</sup> Ena diba e kino, e hakarohodia;  
 ena kevaru e hakevarua isi, e hadareredia.
- <sup>15</sup> Bena davara dobudobudia e heita,  
 bona tanobada badidia e hedinarai,  
 oi Iehova ese o gwau henidia negana ai,  
 oi udumu matudia amo o hahodi lasi negana  
 ai.
- <sup>16</sup> Atai amo e dau dobi, e abigu,  
 ranu momo amo e verigu lasi.
- <sup>17</sup> Lau inaigu goadana ena amo e hamaurigu,  
 e inai henigu taudia imadia amo e hamau-  
 rigu,  
 badina be idia ese bema hadareregu diba.
- <sup>18</sup> Egu hisihisi dinana ai e davarigu,  
 a Iehova na egu imuda.
- <sup>19</sup> Ia ese taora bada gabuna ai e hakaugu lasi;  
 ia ese e hamaurigu, e moalelaigu dainai.
- <sup>20</sup> Iehova ese davagu vada e henigu, egu kara  
 maoromaoro heğereğerena,  
 vada e hanamogu, imagu edia ġoevaġoева  
 heğereğeredia.
- <sup>21</sup> Badina be Iehova ena dala vada na badinadia;  
 lalo-hadai dikadia daidiae egu Dirava asina  
 rakatania.

- 22** Badina be ena hahegani iboudiai na lau vairagu ai;  
 ena taravatu asina negedia daure.
- 23** Ia vairanai lau na asi egu kerere;  
 kara dika amo na raka oho.
- 24** Taunabunai, Iehova ese vada e hanamogu, ena  
 kara maoromaoro hegeregérena ai;  
 imagu na ia vairanai vada e goevañoeva  
 hegeregérena vada e hanamogu.
- 25** Hebogahisi tauna oi ese o bogaia hisimu;  
 kara maoromaoro tauna oi ese o kara maoro-  
 maoro heniamu.
- 26** Lalo-ñoevañoeva tauna enai oi lalomu danu  
 baine ñoevañoeva;  
 a kara gageva-gageva tauna enai oiemu kara  
 danu bae gageva-gageva.
- 27** Badina be lalo-manau taudia na oi ese o hamau-  
 ridiamu;  
 a hekokoroku taudia na oi ese matadia o ha-  
 igodia dihomu.
- 28** Momokani, oi ese egu lamepa o haraiamu;  
 Iehova, egu Dirava, ese egu dibura e hadiari-  
 amu.
- 29** Momokani, oi bagumu ai oreia badana baina  
 hadarerea diba;  
 egu Dirava bagunai magu ta baina rohoa  
 hanai diba.
- 30** Ina Dirava ena dala na herea dae;  
 Iehova ena gwauhamata vada e momokani;  
 ia na e abidadama heniamu taudia edia kesi.
- 31** Dirava be daika? Iehova mo.  
 Nadi-gini be daika? Iseda Dirava mo.
- 32** Ia na goada e hariolaigu Diravana;

- ia na egu dala e halailaia Diravana.
- 33** Ia ese lau aegu na dia aedia heğereğeredia ai e halaodia;  
 ia ese atai gabudia ai e haginigu kau.
- 34** Ia ese lau imagu e hadibadiamu, tuari karadia ai,  
 bena ima u na mai goadadia auri-laboralabora pevana baina marea.
- 35** Emu hahemauri kesina vada o henigu;  
 oi imamu idibana ese vada e dogogu tao,  
 emu kara manada-manada ese vada e imodaigu.
- 36** Taora bada gabuna vada o lailaia, lau aegu bae moia tao;  
 aegu na asie dedi.
- 37** Lau inaigu na havadia, na lasidia tao;  
 lau asina gini kerehai ela bona idia na e bua tari.
- 38** Na gwadadia uru, asie tore diba;  
 e keto, aegu henudiae.
- 39** Oi ese goada o hariolaigu, baina tuari totona;  
 lau inaigu o tahodia dobi henugu ai.
- 40** Lau inaigu o hakerehaidia lau vairagu ai;  
 e ina heniguva taudia na na habuadia tari.
- 41** Hekaha e noilaia, a ta ese se hamauridia;  
 Iehova e tai henia, a ia ese se haere henidia.
- 42** Lau na botadia patapata, ġahu lai vairanai na heto;  
 lau na negedia lasi murimuri ai, ariara mirona na heto.
- 43** Taunimanima edia tuari amo o hamaurigu;  
 besé idau-idau ikwaradia ai o halaogu;

- asi dibagu taudia ese isiaigu e lao heniva.
- <sup>44</sup> Lau harigu e kamonai, bena e kamonai henigu; idau bese taudia na lau vairagu ai e igo diho.
- <sup>45</sup> Idau bese taudia na kudoudia e hetaha; edia komu gabudia amo e raka lasi mai heude-heudededia ida.
- <sup>46</sup> Iehova na e maurimu; egu nadi-gini na hanamoamu; egu hahemauri Diravana bae imodaia.
- <sup>47</sup> Dirava ese lau inaigu davadia e henidiamu; ia ese taunimanima na lau henugu ai e atodiamu;
- <sup>48</sup> ia ese lau inaigu edia amo e hamaurigu. Momokani, oi ese o imodaigu, lau inaigu daedai; dağedağe taudia edia amo o hamaurigu.
- <sup>49</sup> Ina dainai, Iehova e, lau baina imodaimu bese idau-idau bogaragidiai; oi ladamu baina hanamoegu ane ai.
- <sup>50</sup> Kwalimu badana ia ese ena pavapava e heniamu; e horoa tauna ia ese e bogaia hisimu; David mai garana ida baine bogadia hisi ela bona hanaihanai.

## 19

- <sup>1</sup> Guba ese Dirava hairaina e gwauraia hedinaramu; guba ġaudia ese ia imana gaukaradia e hahedinaraiamu.
- <sup>2</sup> Dina ta ese dina ta e herevalai heniamu; hanuaboi ta ese hanuaboi ta enai iena aonega e gwauraimu.
- <sup>3</sup> Asi hereva ta, asi gado ta;

eredia na se hekamonaimu.

**4** A reğedia na tanobada idoinai vada ela;  
edia hereva na tanobada dokona ai vada e  
kau.

Idia ediai ia ese dina ena kalaga vada e atoa,

**5** dina na e raka lasimu, headava matamata  
tauna na ena rumo e raka lasimu na  
heto;  
goadtauna na heto ia na ena dala ai e  
heäumu mai moalena ida.

**6** Guba dokona ta amo e daemu,  
e hanaimu bona guba dokona ta;  
gau ta na ia siahuna amo basine komu diba.

**7** Iehova ena taravatu vada e namo āuguru;  
ia ese lauma e hamauria loumu.

Iehova ena hahediba herevana vada e momokani;  
ia ese asi aonegana tauna na e ha-  
aonegaiamu.

**8** Iehova ena hahedua herevadia vada e maoro-  
maoro;  
ia ese taunimanima lalodia e hamoalediamu.

Iehova ena hahegani vada e āgoevaāgoeva;  
ia ese taunimanima matadia e hapapadiamu.

**9** Iehova imatauraina vada e āgoevaāgoeva,  
e mia hanaihanaimu.

Iehova ena hahemaoro vada e momokani,  
bona vada e maoromaoro.

**10** Edia namo ese *gold* ena namo e hereaiamu,  
*gold* āgoevaāgoevadia momo edia namo e herea-  
diamu.

Edia gaiho ese bada ranuna e hereaiamu,  
labolabo edia rumo amo e hetuturu dobimu  
āgauna.

- 11** Idia ese oiemu hesiai tauna e sisiba heniamu;  
ibadinadia ahuna na bada.
- 12** To daika ese ena kara kerere-kereredia baine  
diba;  
Egu kara dika hehuni-hehunidia amo ba  
haḡoevagu.
- 13** Oiemu hesiai tauna ba rua, ena hekokoroku ai  
basine kara dika;  
egu kara dika basie hadareregu.  
bena basina kerere;  
kara dika badana ta basina karaia.
- 14** Iehova e, egu nadi-gini, egu hahemauri tauna,  
ba durugu;  
udugu herevadia bona lalogu ena lalo-hadai  
bae ḡoeva  
oi vairamu ai.

## 20

- 1** Iehova ese baine haere henimu, hisihisi dinana  
ai.  
Iakob ena Dirava ladana ese baine gimamu.
- 2** Helaḡa gabuna amo ena hekaha baine siaia vasi;  
Siona amo goada baine henimu.
- 3** Emu boubou iboudiai baine lalodia tao;  
emu ḡole-oho bouboudia baine abi dae. (Selah)
- 4** Lalomu ena ura baine henimu;  
emu lalo-hadai iboudiai anidia baine havara.
- 5** Emu hahemauri baia moalelaia,  
bona emai Dirava ladana ai emai pepe baia  
haodaia isi.
- Iehova ese emu noinoi iboudiai anidia baine  
havara henimu.

- <sup>6</sup> Harihari lau name diba, Iehova ese e horoa tauna na baine kahaia;  
 ena gabu helagana amo baine haere henia,  
 bona imana idibana amo kwalimu badadia baine henia.
- <sup>7</sup> Haida ese kariota e heagilaidiamu;  
 ma haida ese hosi e heagilaidiamu;  
 a ai ese Iehova, emai Dirava, ladana a heagilaiamu.
- <sup>8</sup> Idia na vada e hekwakwanai, vada e keto;  
 a ai na vada a tore isi, vada a gini tore.
- <sup>9</sup> Iehova e, a hamaurimai!  
 Baia boiboi negana ai, emai Pavapava ese baine haere henimai.

## 21

- <sup>1</sup> Iehova e, oi goadamu ai hanua pavapavana na e moalemu;  
 oiemu hekaha e heagilaia badamu.
- <sup>2</sup> Lalona e uramu gauna oi ese vada o henia;  
 uduna bibinadia edia noinoi na so rua. (Selah)
- <sup>3</sup> Emu hahenamo gaudia namo-hereadia ese ia e gunalaiamu;  
 havava gauna, *gold* namo-hereana amo e karaia, na ia kwarana ai o havavalaiamu.
- <sup>4</sup> Ia ese mauri e noia emu ai; oi ese o henia;  
 ena mauri dinadia o hadaudau, ela bona hanaihanai.
- <sup>5</sup> Oiemu hekaha dainai taunimanima ese e imodaia badamu;  
 hairai bona siahu oi ese vada o henia.
- <sup>6</sup> Momokani, oi ese vada o hanamoa bada ela bona hanaihanai;

- oi vairamu moalena amo vada o hamoalea.
- <sup>7</sup> Badina be hanua pavapavana ese Iehova e abidadama heniamu;  
Herea Mikamika ena hebogahisi dainai ia na basine marere.
- <sup>8</sup> Oi imamu ese oi inaimu iboudiai baine davaridia;  
oi imamu idibana ese e inai henimumu taudia iboudiai do baine davaridia.
- <sup>9</sup> Ba hedinarai negana ai amu mai siahuna heğereğerenai ai ba halaodia,  
Iehova ese ena badu ai baine hadonodia,  
lahi ese baine aradia ore.
- <sup>10</sup> Oi ese idia garadia na tanobada amo ba habuadia;  
idia natudia na taunimanima natudia bogaragidia amo ba habuadia tari.
- <sup>11</sup> Oi ihadikamu dalana e haeroa,  
lalo-hadai dikana ta e laloa heğaeğae;  
to asi edia dala karana bae karaia.
- <sup>12</sup> Badina be oi ese ba hakarohodia;  
oi ese oiemu peva amo vairadia ba kino henidia.
- <sup>13</sup> Iehova e, emu goada ai bae imodaimu!  
Ai ese danu ane baia abi,  
oiemu siahu baia imodaia emai ane ai.

## 22

- <sup>1</sup> Egu Dirava e, egu Dirava e, dahaka dainai vada o rak-atanigu?  
Dahaka dainai emu hekaha na dauhai e mi-amu?  
Dahaka dainai egu ġanaġana so kamonaimu?
- <sup>2</sup> Egu Dirava e, dina ai na tai henimumu,

- a so haere henigumu;  
hanuaboi ai danu,  
to laḡa-ani asina davariamu.
- <sup>3</sup> A oi na helaḡa;  
Israel taudia edia heimodai latadiai o no-homu.
- <sup>4</sup> Tamamai ese oi e abidadama henimuva;  
e abidadama henimuva, bena oi ese o hamauridiava.
- <sup>5</sup> E tai henimuva, bena e mauri;  
e abidadama henimuva, bena asie baia.
- <sup>6</sup> A lau na biluga mo, dia taunimanima;  
taunimanima ese e ihi-ihiraigumu,  
egu bese taudia ese e dadaraigumu.
- <sup>7</sup> E itagumu taudia iboudiae ese e kirikirilaigumu,  
bibinadia e hamue henigumu,  
kwaradia e taiko-taikomu, e tomu
- <sup>8</sup> “Ia ese Iehova e abidadama henia,  
Iehova ese baine hamauria, baine harohoa  
mauri;  
badina be ia ese e moalelaiamu”.
- <sup>9</sup> Čau tamona, oi ese sinagu bogana amo o verigu  
lasi;  
oi ese o gimaguva sinagu kemena ai.
- <sup>10</sup> Egu vara dinana amo oiemu ai na tao;  
sinagu bogana amo na lasi dinana amo oi na  
egu Dirava.
- <sup>11</sup> Egu amo dauha basiola,  
badina be hisihisi vada eme kahira-kahira,  
bona lau na asi ikahagu ta.
- <sup>12</sup> Boromakau mamaruanedia momo ese e ġeġegu  
ahumu,

Basan boromakaudia mai goadadia ida ese e  
kougu heğeğemu;

<sup>13</sup> Idia ese ududia e haga henigumu,  
leona na mai dağedağena ida e ġoumu na heto.

<sup>14</sup> Na aru ohomu ranu na heto,  
turiagu na e heridemu;  
kudougu na bada na heto,  
kemegu ai e veve ohomu.

<sup>15</sup> Egu goada na e kaukaumu, ataga na heto,  
malagu na udugu ai e kaki taomu;  
mase ġahuna ai vada o hagorugu diho.

<sup>16</sup> Momokani, sisia ese e ġegegeu ahumu;  
kara dika taudia vada e hebou, vada e kougu  
ahu;  
imagu palapaladia bona aegu palapaladia  
vada e daidia uru,

<sup>17</sup> (Turiagu idoinai na ita hedinaraimu).  
Idia ese e raraigumu, e itagu taomu;

<sup>18</sup> egu dabua e hari,  
egu hahedoki na mari amo e hari.

<sup>19</sup> A oi, Iehova e, basio noho dahu ai!  
Ikahagu e, aoma haraġa, ba durugu!

<sup>20</sup> Laumagu na dare amo ba hamauria,  
egu mauri na sisia ena siahu amo ba rauaia.

<sup>21</sup> Leona uduna amo ba hamaurigu,  
uda boromakaudia doadia amo lau laumagu  
ba hamauria.

<sup>22</sup> Oi ladamu baina hatoa, tadikakagu vairadiai;  
baina imodaimu, hebou bogaraginai.

<sup>23</sup> Iehova garina o garimu taumui e, ia ba imodaia!

Iakob natuna iboumui ai, ia ba heatolaia!  
 Israel natuna iboumui ai, ia ba matauraia!

<sup>24</sup> Badina be hisi ani tauna ena hisihisi  
 ia ese se dadaraia bona se lalo dika henia;  
 ia vairana na iena amo se hunia,  
 e tai henia negana ai e kamonai.

<sup>25</sup> Hebou badana ai baina imodaimu;  
 egu gwauhamata anidia baina kara,  
 ia garina e garimu taudia vairadiai.

<sup>26</sup> Ogoğami taudia na bae aniani, bogadia bae  
 kunu;  
 e tahuamu taudia ese Iehova bae imodaia.  
 Oi lalomu baine mauri hanaihanai.

<sup>27</sup> Tanobada dokodia iboudiai na bae helalo tao,  
 bena Iehova bae hağerea;  
 bese idau-idau edia iduhu iboudiai ese  
 ia bae toma henia diho.

<sup>28</sup> Badina be basileia na Iehova ena,  
 ia ese bese bese e lohiadiamu.

<sup>29</sup> Momokani, heagi taudia iboudiai tanobada ai  
 ese  
 ia bae toma henia diho;  
 ġahu ai e dihomu taudia iboudiai na  
 ia vairanai bae igo diho,

bona sibona ihamaurina asi dibana tauna danu.

<sup>30</sup> Garada ese ia isiaina bae lao henia;  
 taunimanima ese uru gabena na Iehova  
 sivaraina bae hamaorolaidia;

<sup>31</sup>  
 do asie vara taudia na iena hahemauri bae  
 hadibalaidia,  
 hari vada e hahedinaraia heğereğerena.

**23**

- <sup>1</sup> Lau ireḡugu tauna mamoe ireḡuna na heto Iehova  
mo;  
lau na ġau ta ai basina dabu.
- <sup>2</sup> Rei manoka-manoka gabudia ai ia ese e ha-  
hekuregumu;  
değedeğerahu gabuna ranudia badibadidai e  
hakaugumu.
- <sup>3</sup> Lau laumagu ia ese e hamauria loumu;  
kara maoromaoro daladia ai ia ese e hakau-  
gumu,  
ia ladana dainai.
- <sup>4</sup> Oibe, ena be mase diburana kourana ai baina  
raka,  
to dika garina basina gari;  
badina be oi na lau ida,  
emu kareva bona emu itotohi ese lau taugu e  
haloamu.
- <sup>5</sup> Agu aniani oi ese o dabaraiamu,  
lau inaigu vairadiai;  
lau kwaragu na dehoro ai o horoamu,  
egu kehere na e hepurai dobimu.
- <sup>6</sup> Momokani, namo bona hebogahisi do bae ġavagu,  
egu mauri dinadia idoidiai;  
bona Iehova ena rumai  
baina noho hanaihanai.

**24**

- <sup>1</sup> Tanobada mai anidia iboudiai ida, Iehova ena,  
tanobada idoinai mai inoho-henina taudia  
ida;
- <sup>2</sup> badina be ia sibona ese vada e hadaia, davara  
latadiai,  
ia ese vada e haginia utu-utu latadiai.

- <sup>3</sup> Daika ese Iehova ena ororo baine dara dae?  
     Daika ese ena gabu helağana ai baine gini?
- <sup>4</sup> Ima-đoevađoeva bona lalo-đoevađoeva tauna ese;  
     kara havara se ura henimu  
     bona se gwau hamata koikoimu tauna ese.
- <sup>5</sup> Hahenamo na Iehova ena amo baine abia,  
     ena kara igwaurai-maorona danu  
     ia ihamaurina Diravana ena amo baine abia.
- <sup>6</sup> Ia e tahuamu taudia edia uru bunai;  
     idia na oi vairamu e tahuamu, Iakob ena Di-  
     rava e! (Selah)
- <sup>7</sup> Ikoukoumui e, umui kwaramui avabi isi!  
     Idau nega iduaradia, umui na sibomui a heabi  
     isi!  
     Hanua Pavapavana diađau namona baine  
     raka vareai.
- <sup>8</sup> Hari Hanua Pavapavana diađau namona be  
     daika?  
     Iehova bunai, mai goadana ida bona mai  
     siahuna ida;  
     Iehova bunai, tuari ai e kwalimumu.
- <sup>9</sup> Ikoukoumui e, umui kwaramui avabi isi!  
     Oibe, idau nega iduaradia, umui na sibomui a  
     heabi isi!  
     Hanua Pavapavana diađau namona baine  
     raka vareai.
- <sup>10</sup> Hari Hanua Pavapavana diađau namona be  
     daika?  
     Iehova Sabaota, ia bunai Hanua Pavapavana  
     diađau namona. (Selah)

## 25

<sup>1</sup> Iehova e, laumagu na abia isimu oiemu ai;

- <sup>2</sup> egu Dirava e, lau oi na abidadama henimumu.  
 Ba durugu, hemarai na basine abigu;  
     ba durugu, inaigu na basie herouheroua  
     latagu ai.
- <sup>3</sup> Oibe, e narimumu tauna ta basie hahemaraia;  
     a asi badina e tao toremu taudia vada bae  
     hahemaraaidia.
- <sup>4</sup> Iehova e, emu kara ba haheitalaigu,  
     emu dala ba hadibalaigu.
- <sup>5</sup> Emu hereva momokanidia ai ba hakaugu, ba  
     hadibagu,  
     badina be oi na lau ihamaurigu Diravana;  
     oi na narimumu dina idoinai.
- <sup>6</sup> Iehova e, emu hebogahisi ba laloa,  
     emu lalokau ba laloa tao;  
     badina be idia na nega gunadia amo e  
     hemailaimu.
- <sup>7</sup> Tauhaugu negana ena kara dika na basio Ialoa  
     tao,  
     eiava egu kara havara danu;  
 Iehova e, lau ba lalogu tao,  
     emu hebogahisi dainai.
- <sup>8</sup> Iehova na namo bona maoromaoro;  
     taunabunai ia ese kara dika taudia na dala ai  
     e hadibadiamu.
- <sup>9</sup> Ia ese lalo-manau taudia na kara maoromaoro ai  
     e hakaudiamu,  
     lalo-manau taudia na iena dala e hadibalaidiamu.
- <sup>10</sup> Iehova ena dala iboudiai na hebogahisi bona  
     momokani daladia,

ena taravatu bona ena hahediba herevadia e  
badinadiamu taudia edia.

<sup>11</sup> Iehova e, oi ladamu dainai egu kara dika ba  
gwau tao,  
badina be vada e bada.

<sup>12</sup> Iehova garina e garimu tauna be daika?  
Iehova ese ia baine hadibaia, edena dala  
baine abia hidi.

<sup>13</sup> Ia na taǵa ai baine noho,  
bona ia natuna ese tano bae abia, edia.

<sup>14</sup> Iehova ena hetura na ia garina e garimu taudia  
edia;  
ia ese ena taravatu baine hadibalaidia.

<sup>15</sup> Matagu ese Iehova e haǵereamu,  
badina be ia ese lau aegu na huo amo baine  
veridia oho.

<sup>16</sup> A haǵeregu, a bogagu hisi;  
badina be lau na sibogu, bona na hisihisimu.

<sup>17</sup> Lalugu ena hisihisi na e bada e laomu;  
egu hisihisi amo ba hakaugu lasi.

<sup>18</sup> Egu hisihisi bona egu hekwarahi ba haerodia,  
bona egu kara dika iboudiai ba gwau tao.

<sup>19</sup> A haeroa, inaigu na hutuma,  
bona edia badu na auka herea egu ai.

<sup>20</sup> Egu mauri ba gimaia, ba hamaurigu;  
ba durugu, basie hahemaraigu;  
badina be egu roho-mauri be oiemu ai.

<sup>21</sup> Kara momokani bona kara maoromaoro ese  
bae hamaurigu;  
badina be oi na narimumu.

<sup>22</sup> Dirava e, Israel ba hamauria,

ena hisihisi iboudiai lalodia amo.

## 26

- <sup>1</sup> Iehova e, ba gwauraigu maoro,  
badina be vada na raka mai maoromaorogu  
ida,  
bona Iehova vada na abidadama henia, asi  
egu daradara.
- <sup>2</sup> Iehova e, ba tahugu, ba dibagu;  
lalogu bona daragu ba dibadia.
- <sup>3</sup> Badina be emu hebogahisi na lau matagu ai,  
bona oi iabidadama-henimu karana ai na  
rakamu.
- <sup>4</sup> Koikoi taudia ida asina helaimu,  
bona boga-alaga taudia ida asina raka  
heboumu;
- <sup>5</sup> kara dika taudia edia hebou na inai heniamu,  
bona kara havara taudia ida basina helai  
hebou.
- <sup>6</sup> Ialo-ḡoevaḡoeva ai lau imagu na huriamu;  
Iehova e, emu ihaboulaina patana na rakaia  
heḡeḡemu,
- <sup>7</sup> oi ihanamolaimu anena na lololaiamu,  
bona oiemu hoa karadia iboudiai na gwau-  
raidiamu.
- <sup>8</sup> Iehova e, oi o noholaiamu rumana na ura hen-  
amu,  
oi hairaimu e miamu gabuna na lalokau hen-  
amu.
- <sup>9</sup> Kara dika taudia ida basio darogu tabe,  
egu mauri danu rara e hahebubuamu taudia  
ida basio bibia tabe;
- <sup>10</sup> idia imadia na kara dikadia ai e honumu,

imadia idibadia na koikoi karadia davadia ai  
e honumu.

<sup>11</sup> A lau be egu kara maoromaoro ai na rakamu;  
ba hamaurigu, ba bogagu hisi.

<sup>12</sup> Aegu na taora ai gini;  
hebou badana lalonai Iehova baina  
hanamoa.

## 27

<sup>1</sup> Iehova na egu diari, lau ihamaurigu;  
daika garina baina gari?  
Iehova na egu mauri mañuna;  
daika baina gari henia?

<sup>2</sup> Kara dika taudia ese bae ala-ala henigu,  
lau taugu ianina totona,  
una negana ai lau inaigu bona e dağedage  
henigumu taudia na  
bae hetutuhi bona bae keto.

<sup>3</sup> Ena be tuari taudia hutuma bae taruha, lau bae  
ala-ala henigu,  
to kudougu basine hetaha;  
ena be tuari na egu ai baine kau,  
to lalogu do baine goada.

<sup>4</sup> Ĝau tamona mo Iehova enai na noiamu,  
una mo baina tahua;  
Iehova ena ruma ai baina noho,  
egu mauri dinadia iboudiai;  
Iehova hairaina baina itaia,  
bona ena dubu ai lalo-parara baina tahua.

<sup>5</sup> Badina be hahedika baine kau dinana ai,  
ia ese ena kalaga ai baine hunigu;  
ena ĝuriĝuri kalagana ai ia ese baine hunigu,

baine abigu isi, nadi latanai baine atogu.  
**6** Lau kwaragu baine heabi isi,  
 inaigu, e daigu ahu taudia, daediae;  
 bena ena ġuriġuri kalagana ai  
 boubou ġaudia baina hahelaġadia mai  
 moalegu ida;  
 bona ane baina abi, Iehova ihanamolaina  
 anedia.

**7** Iehova e, na boilolomu negana ai na ba kamonai,  
 ba bogagu hisi, ba haere henigu.  
**8** Vada oto “Lau vairagu ba tahuua;”  
 bena lau lalogu e haere henimumu, e tomu  
 “Iehova e, oi vairamu na tahuamu.”  
**9** Oi vairamu na egū amo basio hunia.

Oiemu hesiae tauna basio lulua mai badumu ida;  
 ikahagu na oi.  
 Lau ihamaurigu Diravana e,  
 basio negegu, bona basio rakatanigu.  
**10** Badina be tamagu bona sinagu vada e  
 rakatanigu,  
 a Iehova ese baine abigu dae.

**11** Iehova e, emu dala ba hadibalaigu;  
 dala maoromaorona ai ba hakaugu, lau in-  
 aigu daidiae.  
**12** E daġedaġe henigumu taudia edia ura ai basio  
 negegu;  
 badina be hahebade koikoi taudia vada e gini  
 tore, bae hadikagu totona,  
 idia na mai daġedaġedia ida e ġosimu.  
**13** Lau lalogu na e abia daemu Iehova ena kara  
 namo baina itaia,

mauri taudia edia tano ai.  
<sup>14</sup> Iehova ba naria;  
 ba goada balaheni, ba boga auka;  
 oibe, Iehova ba naria.

## 28

- <sup>1</sup> Iehova e, lau oi na boiboi henimumu;  
 egu nadi-gini, taiamu na basio koudia egu ai,  
 basio haere henigu negana ai na  
 mase gabuna e laomu taudia heğereğeredia ai  
 bainala na garina.
- <sup>2</sup> Egu noinoi herevadia a kamonai,  
 ba kahagu totona na tai henimumu negana ai,  
 bona imagu na emu gabu helağana na dudui  
 isi heniamu negara ai.
- <sup>3</sup> Kara dika taudia ida basio abigu oho,  
 kara havara taudia ida basio negegu daure;  
 idia ese dekedia taudia na maino herevadia e  
 gwaurai henidiamu,  
 a lalo-hadai dikadia na lalodia ai mimia.
- <sup>4</sup> Edia ġaukara heğereğeredia ai davadia na ba henid-  
 dia,  
 edia kara dikadia davadia do ba henidia;  
 imadia ġaukaradia heğereğeredia ai davadia na ba  
 henidia,  
 davadia korikori do ba henidia.
- <sup>5</sup> Badina be Iehova ena ġaukara asie matauraidi-  
 amu,  
 ia imana ġaukaradia asie matauraidiamu;  
 ia ese baine ġigidia dobi,  
 ma basine hadaidia lou.
- <sup>6</sup> Iehova aina hanamoa!  
 Badina be egu noinoi vada e kamonai.
- <sup>7</sup> Iehova na egu goada bona egu kesi,

lau lalogu ese ia e abidadama heniamu;  
 unu amo hekaha na davariamu, bona lalogu na e  
 moalemu,  
 egu ane ai danu ia na hanamoamu.  
<sup>8</sup> Iehova na ena bese taudia edia goada;  
 ia na e horoa tauna ena kohoro.  
<sup>9</sup> Emu bese taudia ba hamauridia, oi dihimu ba  
 hanamodia;  
 ba reğudia, bona bavabidia isi hanaihanai.

## 29

<sup>1</sup> Siahu taudia natudia e, Iehova ba imodaia;  
 Iehova hairaina bona siahuna ba heatolaidia.  
<sup>2</sup> Iehova ladana hairaina ba heatolaia;  
 Dabua helāgadria ai Iehova ba imodaia.  
<sup>3</sup> Iehova gadona na ranu latadiai;  
 Hairai Diravana gadona na guba-rahu na  
 heto,  
 Iehova na ranu badadia latadiai.  
<sup>4</sup> Iehova gadona na mai siahuna,  
 Iehova gadona na pavapava gadona.  
<sup>5</sup> Iehova gadona ese sida audia e hakwaidudiamu,  
 Iehova ese Lebanon ena sida audia e hak-  
 waidudiamu.  
<sup>6</sup> Ia ese Lebanon e harohoamu, boromakau  
 natuna na heto,  
 Sirion danu e harohoamu, uda boromakauna  
 natuna maruanena na heto.  
<sup>7</sup> Iehova gadona ese lahi hururu-hururudia e  
 hakevaru isimu;  
<sup>8</sup> Iehova gadona ese tano ġaġaena e haheude-  
 heudeamu,

Iehova ese Kade tano-gaḡaena e haheude-heudeamu.

- <sup>9</sup> Iehova gadona ese *oak* audia e odadia hirihirimu,  
bona uda au-raudia e oda ohomu;  
iena dubu ai ḡau iboudiai ese ia hairaina e  
gwauraiamu.

<sup>10</sup> Iehova na ena terono ai e helaimu, utu-utu  
daediae;

Iehova na ena terono ai e helaimu, e pava-pava hanaihanaimu.

<sup>11</sup> Iehova ese ena orea taudia na goada baine  
henidia;

Iehova ese ena orea taudia na maino amo  
baine hanamodia.

## 30

<sup>1</sup> Iehova e, aina heatolaimu, badina be oi ese vada  
o verigu isi;

lau inaigu vada o rudia, basie kirikirilaigu.

<sup>2</sup> Iehova e, egu Dirava, na tai henimu, ba kahagu  
nato;

bena oi ese o hamaurigu.

<sup>3</sup> Iehova e, lau laumagu na mase taudia edia gabu  
amo vada o hakaua dae;

mase gabuna vada ela taudia bogaragidia amo  
vada o hamaurigu.

<sup>4</sup> Iehova ena helaḡa taumui e, ia ihanamolaina  
anedia bavabi,

ia ladana helaḡana ba hanamo.

<sup>5</sup> Badina be ena badu na e ore haraḡamu,  
a ena hahenamo na e hesiriumu ela bona  
mauri dokona.

Taitai na reana baine hesiriu rani,  
a daba ai moale na baine vara lou.

**6** Lau be egu noho namo ai nato

“Lau na basina marere ela hanaihanai”.

**7** Iehova e, emu hahenamo amo vada o haginigu,  
ororo aukana na heto;  
Oi vairamu o hunia,  
ben a kudougu e hetaha.

**8** Iehova e, lau oi na tai henimu;

Iehova enai na noinoi, nato

**9** “Mase gabuna bama lao henia,  
egu mase ena namo be dahaka?

Āahu ese oi baine hanamomu a?

Āahu ese oiemu heabi-dae baine gwauraia a?

**10** Iehova e, a kamonai, a bogagu hisi!

Iehova e, a kahagu!”

**11** Egu tai gadegade na mavaru ai vada o halaoa;  
egu guma dabuadia vada o hadoki oho,  
moale vada o hariolaigu,

**12** laumagu ese baine imodaimu bona udugu  
basina hakapua helaooreana.

Iehova e, egu Dirava,

lau oi baina hanamomu ela bona hanaihanai.

### 31

**1** Iehova e, lau oi na abidadama henimumu;  
hemarai na nega idoinai basine abigu,  
emu kara maoromaoro ai ba hamaurigu!

**2** Ame igo diho, a hakala henigu,  
ba hamaurigu haraḡa-haraḡa!

Egu komu nadina ai baola,

egu kohoro ai baola, ihamaurigu totona.

- <sup>3</sup> Oibe, oi na egu nadi-gini bona egu kohoro;  
     oi ladamu dainai ba gunalaigu bona ba  
     hakaugu;
- <sup>4</sup> labigu totona e otoa huona amo ba hamaurigu,  
     badina be egu mağu na oi.
- <sup>5</sup> Laumagu na oi imamu ai na atoamu;  
     Iehova e, heabi-dae Diravana e, oi ese vada o  
     hamaurigu.
- <sup>6</sup> Dirava koikoidia laulaudia e badinadiamu tau-  
     dia na inai henidiamu;  
     a Iehova na abidadama heniamu.
- <sup>7</sup> Lau baina moale, emu hebogahisi baina moale-  
     laia;  
     badina be egu hisihisi vada o itaia,  
     egu hekwarahi vada o haeroa;
- <sup>8</sup> lau inaigu imadia ai so negegu,  
     a lau aegu na taora bada gabuna ai vada o  
     atodia.
- <sup>9</sup> Iehova e, ame bogagu hisi,  
     badina be hisihisi ese a gugubagumu,  
     taitai ese matagu e hadikamu,  
     laumagu bona tau-anigu danu e dikamu.
- <sup>10</sup> Badina be egu mauri na lalo-hisihisi ai e oremu,  
     egu mauri lagānidia na ġanaġana ai e oremu;  
     egu goada na e oremu, egu kara dika daidiai,  
     bona turiagu na e mamano.
- <sup>11</sup> Inaigu iboudiai ese e dadaraigumu,  
     dekegu taudia ese e dadaraigu hereamu,  
     turagu ese e gari henigumu,

ariara ai e itagumu taudia ese e  
heautanigumu.

12 Taunimanima ese vada e lalogu boio, mase  
tauna na heto;

lau na uro makohina na heto.

13 Oibe, hutuma edia hemaunu na kamonaimu,  
kudou hetaha na kaha iboudiai e miamu.

Idia ese e henega heboumu, lau ihadikagu totona,  
egu mauri iabi-ohona dalana e tahuamu.

14 Iehova e, lau oi na abidadama henimumu,  
na tomu “Oi na egu Dirava”.

15 Egu nega na oi imamu ai;  
lau inaigu bona e dağedağe henigumu taudia  
imadia amo ba hamaurigu.

16 Oi vairamu ese emu hesiai tauna baine hadi-  
aria;  
emu hebogahisi ai ba hamaurigu.

17 Iehova e, hemarai ese basine abigu,  
badina be oi na hahanemumu;  
kara dika taudia na bae hemarai,  
asi reğereğedia na mase taudia edia gabu  
baela.

18 Koikoi taudia bibinadia na bae mu;  
edia heağı ai bona edia hedadarai ai  
kara maoromaoro taudia bae ihi-ihiraidia  
taudia na  
ududia bae hahekapu.

19 Emu hahenamo na bada herea,  
o abia heğaeğemu, oi e gari henimumu taudia  
edia,  
bona o karaiamu, oi metaimu e heau heniamu  
taudia edia,  
taunimanima natudia vairadiai o karaiamu.

<sup>20</sup> Oi metaimu ai o hunidiamu,  
 taunimanima edia hedibağani karadia amo o  
 hunidiamu;  
 emu kalaga ai o naridiamu,  
 badu taudia maladia amo o gimadiamu.

<sup>21</sup> Iehova aina hanamo;  
 badina be ena hebogahisi na egu ai vada e  
 hahedinaraia,  
 hoa ġauna na heto,  
 e heġeġe dae hanuana lalonai e kougu ahu  
 negana ai.

<sup>22</sup> Egu gari ai nato  
 “Oi vairamu amo na henege daure”.

A oi ese egu noinoi o kamonai,  
 na tai henimu negana ai.

<sup>23</sup> Iehova ena helaġa taumui e, ia ba lalokau henia.  
 Iehova ese kamonai taudia e hamauridiamu,  
 a heagi karadia e karamu taudia na davadia e  
 henidiamu.

<sup>24</sup> Ba goada, ba boga auka,  
 Iehova o nariamu taumui iboumui ai.

## 32

<sup>1</sup> Ena kara dika eme hegħwau tao tauna be namo,  
 ena kara havara e heġova ahu tauna danu  
 namo.

<sup>2</sup> Iehova ese se habadelaiamu tauna na namo,  
 laumana na asi koikoina tauna danu namo.

<sup>3</sup> Egu kara dika asina gwauraia hedinarai negana  
 ai,  
 lau taugu anina na e varoda-varodava,  
 dina idoinai na ġanaġanava dainai.

- <sup>4</sup> Badina be imamu metauna na latagu ai e miava,  
     dina ai bona hanuaboi ai danu;  
 taugu vada e geakageaka,  
     lahara negana ena dina ġaraġara ese bema  
     raraia na heto. (Selah)
- <sup>5</sup> Egu kara dika na vairamu ai na gwauraia hedi-  
     narai,  
     egu kara havara na asina hunia;  
 nato “Egu kerere baina gwaurai hedinarai Iehova  
     vairanai”;  
     bena oi ese egu kara dika ena metau o abia  
     oho. (Selah)
- <sup>6</sup> Taunabunai, helāga taudia iboudiai ese oi bae  
     ġurimu,  
     bena hisihisi negana ai utu-utu baine utua  
     dae,  
     to ediai basine kau.
- <sup>7</sup> Oi na egu komu gabuna,  
     dika amo o hamaurigumu,  
     bona hahemauri anedia amo o hahegeġegu  
     daemu. (Selah)
- <sup>8</sup> Lau ese baina hadibamu, emu raka dalana baina  
     hadibalaimu;  
     lau matagu ese baine itamu tao.
- <sup>9</sup> Hosi eiava doniki ida basio heġereġere,  
     idia na asi daradia;  
 ududia auridia bona varodia amo bae hamanada-  
     dia,  
     basie kamonai henimu na garina.
- <sup>10</sup> Kara dika taurla ena hisihisi na momo;  
     a Iehova e abidadama heniamu tauna na  
     hebogahisi ese e ġeġea daemu.

**11** Iehova ba moalelaia! Kara maoromaoro tau-mui e, ba moale!  
Lalomui mamaoro-mamaoro taumui, ba moale hisidae.

### 33

- 1** Kara namo taumui e, Iehova ba moalelaia;  
badina be heimodai be āgau namona,  
kara maoromaoro taudia ududia ai.
- 2** Hatai-hatai āgauna maraāgina amo Iehova ba hanamoa,  
ma badana, varo gwauta āgauna, ba hataia, ia ihanamolaina.
- 3** Ane matamatana avabia iena;  
varo āgaudia ba hatai, ba hatai balaheni,  
mai lolomui ida.
- 4** Badina be Iehova ena hereva na maoromaoro;  
ena āgaukara idoinai e karaiamu mai momokanina ida.
- 5** Ia ese kara maoromaoro bona hahemaoro e ura henidiamu,  
tanobada na Iehova ena hebogahisi ai e honu honu daemu.
- 6** Iehova ena hereva ese guba e karaia,  
ia uduna amo e hahodi, bena guba taudia iboudiai e vara.
- 7** Ia ese davara ranudia e haboudia, kavabu ai bema haboudia na heto;  
bona gadobada na e haboudia, roge ai bema haboudia na heto.
- 8** Tanobada idoinai ese Iehova garina baine gari,  
tanobada taudia iboudiai ese ia bae matau-raia.

- <sup>9</sup> Badina be ia e hereva, bena e hekara;  
ia e hahedua, bena e gini tutuka-tutuka.
- <sup>10</sup> Iehova ese bese idau-idau edia henega e hakaro-hodiamu,  
orea idau-idau edia lalo-hadai ia ese e laodia ahumu.
- <sup>11</sup> Iehova ena henega e gini hanaihanaimu,  
bona ena lalo-hadai ela bona uru iboudiai.
- <sup>12</sup> Iehova na ena Dirava ai e halaoamu besena be namo;  
vada e abidia hidia ia dihina ai baela taudia be nanamo.
- <sup>13</sup> Iehova na guba amo e roha dobimu,  
taunimanima natudia iboudiai e nenediamu;
- <sup>14</sup> terono ai e helaimu gabuna amo e roha laomu.  
tanobada taudia iboudiai e itadiamu;
- <sup>15</sup> ia ese idia iboudiai lalodia e karadiamu,  
edia kara iboudiai danu e itadia taomu.
- <sup>16</sup> Hanua pavapavana na dia ena tuari oreana  
badana dainai basine roho mauri;  
tuari tauna na dia ena goada badana dainai  
basine mauri.
- <sup>17</sup> Tuari hosina na mauri e tahuamu tauna ese  
basine abidadama henia;  
dia ena goada badana ese tau ta basine  
hamauria diba.
- <sup>18</sup> A itaia, Iehova ese ia garina e garimu taudia na  
e itadiamu;  
ieno hebogahisi e laroamu taudia ia ese e  
itadia taomu;
- <sup>19</sup> idia laumadia na mase amo baine harohodia  
mauri totona,

bona doe negana ai baine hamaundia totona.

<sup>20</sup> Ita laumada ese Iehova e nariamu;  
ia na ita ikahada, bona eda kesi.

<sup>21</sup> Oibe, ita laloda ese ia e moalelaiamu,  
badina be ia ladana helāgana ta abidadama  
heniamu.

<sup>22</sup> Iehova e, emu hebogahisi na ai latamai ai baine  
mia,  
ai emai helaro na oiemu ai e miamu  
heğereğerena.

## 34

<sup>1</sup> Nega iboudiai Iehova baina hanamo;  
ia iheatolaina na udugu ai baine mia hanai-  
hanai.

<sup>2</sup> Laumagu ese Iehova e heağilaiamu;  
manau taudia ese bae kamonai, bena bae  
moale.

<sup>3</sup> Lau ida Iehova baita imodaia,  
ia ladana baita heatolaia hebou.

<sup>4</sup> Iehova na tahua, bena ia ese e haere henigu;  
egu gari idoidiai lalodia amo e hamaurigu.

<sup>5</sup> Ia ba hağerea, bena ba diari;  
una dainai vairamui na nega ta basie  
hemarai.

<sup>6</sup> Ina ogogami tauna e taitai, bena Iehova ese e  
kamonai henia,  
bona ena hekwarahi iboudiai lalodia amo e  
hamauria.

<sup>7</sup> Iehova ena aneru e taruhamu,  
ia garina e garimu taudia e ġeġedia ahumu,  
bona e hamauridiamu.

- <sup>8</sup> A mamia toho, bena ba diba, Iehova na namo;  
     ia e abidadama heniamu tauna danu e  
     moalemu.
- <sup>9</sup> Ena helaāga taumui e, Iehova garina ba gari,  
     badina be ia garina e garimu taudia na asie  
     dabumu.
- <sup>10</sup> Leona natudia na e dabumu bona e hitolodi-  
     amu;  
     a Iehova e tahuamu taudia na āgau namona ta  
     ai asie dabumu.
- <sup>11</sup> Memero kekeni e, aoma, lau ba hakala henigu;  
     Iehova imatauraina baina hadibamui.
- <sup>12</sup> Tau be daika, mauri urana e uramu,  
     e uramu danu ena mauri dinadia bae hoho,  
     namo baine itaia helaoreana,
- <sup>13</sup> Malamu ba naria, basine ere dika,  
     udumu bibinadia danu, koikoi herevadia  
     basie gwaurai.
- <sup>14</sup> Dika ba rakatania, kara namo ba kara;  
     maino ba tahua, bona ba āgavaia.
- <sup>15</sup> Iehova ese kara maoromaoro taudia e  
     haāgerediamu;  
     edia taitai ia ese e hakala henidiamu.
- <sup>16</sup> Iehova ese kara dika taudia e vaira hua henidi-  
     amu;  
     idia ilalo-taodia na tanobada amo e abia  
     ohomu.
- <sup>17</sup> Kara maoromaoro taudia e boiboimu negadia ai  
     na Iehova ese e kamonaimu,  
     bona edia hekwakwanai iboudiai lalodia amo  
     e hamauridiamu.
- <sup>18</sup> Iehova na lalo-hisihisi taudia dekedekediae;  
     dara-doko taudia ia ese e hamauridiamu.

- <sup>19</sup> Kara maoromaoro tauna ena hisihisi na momo,  
a Iehova ese iboudiai lalodia amo e hamauri-  
amu.
- <sup>20</sup> Ia turiana iboudiai Iehova ese e gimadiamu,  
ta se kwaidumu.
- <sup>21</sup> Kara dika tauna na dika ese baine alaia;  
kara maoromaoro tauna e inai heniamu tau-  
dia na bae baia.
- <sup>22</sup> Iehova ese ena hesiai taudia laumadia e hamau-  
ridiamu;  
ia e abidadama heniamu tauna ta basine baia.

### 35

- <sup>1</sup> Iehova e, e heai henigumu taudia na ba heai  
henidia,  
e tuari henigumu taudia na ba tuari henidia.
- <sup>2</sup> Kesi bona keme aurina avabi,  
a tore isi, ba durugu.
- <sup>3</sup> Io bona dare a veridia lasi,  
e havagumu taudia ba laodia ahu.  
Lau laumagu a hereva henia, aoto  
“Lau binai oi ihamaurimu”.
- <sup>4</sup> Egu mauri iabi-ohona e tahuamu taudia na  
ba hadareredia bona ba hahemaraidia;  
lau ihadikagu karadia e haeromu taudia na  
ba haloudia bona ba hadaradaradia.
- <sup>5</sup> Uit momona na lai ese e odaia ohomu  
heğereğerenai baela;  
Iehova ena aneru ese do baine luludia oho.
- <sup>6</sup> Edia dala baine dibura bona baine dedidedi;  
Iehova ena aneru ese baine havadia.
- <sup>7</sup> Badina be lau iabigu totona edia huo e otoa, asi  
badina;  
asi badina guri e ġeia, egu mauri iabi-ohona.
- <sup>8</sup> Mase ese baine hahoadia;

e otoa huona ese baine hatoadia,  
ia lalonai vada bae mase.

<sup>9</sup> Una negana ai laumagu ese Iehova baine moale-laia;

ena hahemauri baine imodaia.

<sup>10</sup> Turiagu iboudiai baeto

“Iehova e, daika na oi hegeregēremu?

Oi ese manoka tauna o hamauriamu,

goadai e hereaiamu tauna imana amo;

bona manoka tauna bona ogoğami tauna

ena kohu e dadihaiamu tauna imana amo”.

<sup>11</sup> Hahebade koikoi taudia e tore isimu,  
asi dibagu ġaudia e nanadailaigumu.

<sup>12</sup> Na kara namo henidia davana na e kara dikahenigumu;

laumagu na e dauremu.

<sup>13</sup> A lau be e goreredia negana ai na guma dabuadia na dokilai,

bona anivaga ai sibogu na hahedika;

<sup>14</sup> na ġuriġuri igo-dihō,

turagu eiava tadikakagu taina bama tai na heto;

na loa eva-eva, sinana e tailaiamu tauna na heto,  
na igo diho, na tai noho tai noho.

<sup>15</sup> A lau na hekwakwanai negana ai na idia na e moale hebouva,

lau ihadikagu totona e hegogova;

idaudau taudia, asi dibagu taudia, na

lau ihadikagu totona e hebouva,

e ihi-ihiraiguva asi dokona.

<sup>16</sup> Dirava asie matauraiava taudia ese e hevaseha henigu loulouva,

gadigadidia e hahedai heniguva.

- 17 Ģaubada e, ba herarai tao ela bona edena nega ai?  
 Laumagu na edia ala-ala amo ba hamauria,  
 egu mauri na leona edia amo ba rauaia;
- 18 bena hebou badana lalonai baina hanamomu,  
 hutuma bada bogaragidiai baina imodaimu.
- 19 Ba durugu, e inai henigu koikoimu taudia ese  
 basie kirikirilaigu,  
 e inai henigu kavamu taudia ese ibunidia  
 basie ha-roro.
- 20 Badina be maino herevadia asie gwauraimu,  
 a tano ai e noho mainomu taudia latadiai na  
 koikoi herevadia e gwauraimu.
- 21 Ududia e ahagamu, lau ihadikagu, e tomu  
 “Aha, aha, matamai ese vada e itaia”.
- 22 Iehova e, vada o itaia; udumu basio hakapua;  
 Iehova e, dahu ai basio noho.
- 23 Legamu a gadaia, lau iahemaoro-henigu totona a noga;  
 egu Dirava, egu Ģaubada, lau ihamaoro-maorogu totona a noga.
- 24 Iehova e, egu Dirava, a gvauraigu maoro, oiemu  
 kara maoromaoro heğereğerena;  
 bona ba laodia ahu, basie kirikirilaigu.
- 25 Idia na basie hereva heheni, basieto  
 “Aha, eda ura vada ta abia;”  
 ma basieto  
 “Ita ese vada ta hadonoa”.
- 26 Egu hisihisi e moalelaiamu taudia na  
 ba hahemaraidia bona ba dadaraidia vaitani;

edia dağedağe egu ai e habadaiamu taudia na  
hemarai bona hedadarai amo ba ġovadia.

- <sup>27</sup> Igwaurai-maorogu e uramu taudia na  
bae hisi dae bona bae moale;  
bae hereva hanaihanai, baeto  
“Iehova na herea,  
ia ese ena hesiai tauna ihanamona e moalela-  
iamu”.
- <sup>28</sup> Bena malagu ese oiemu kara maoromaoro  
baine gwauraia,  
bona dina idoinai baine imodaimu.

## 36

- <sup>1</sup> Kerere ese kara dika tauna e hereva heniamu,  
ia lalona ai e herevamu;  
Dirava igari-henina na  
ia matana ai se miamu.
- <sup>2</sup> Ia sibona matana ai e heaġimu, e tomu,  
ena kara dika na ta ese basine davaria,  
bona basine inai henia diba.
- <sup>3</sup> Ia uduna herevadia na didika bona kokoikoi;  
aonega karadia bona kara namodia vada e  
hadoko.
- <sup>4</sup> Ena mahuta patana ai kara dikadia e haeromu;  
dala asi namona e rakalaiamu,  
kara dika na se dadaraiamu.
- <sup>5</sup> Iehova e, oiemu hebogahisi na guba e dae laomu,  
emu heabidadama na ori ai e kaumu.
- <sup>6</sup> Oiemu kara maoromaoro na Dirava ena ororo na  
heheto,  
emu hahemaoro na gadobada na heto.  
Iehova e, taunimanima bona mauri ġaudia idau-  
idau danu  
oi ese o hamauridiamu.

- <sup>7</sup> Dirava e, emu hebogahisi na herea-dae;  
     taunimanima natudia ese oi hanimu  
     ikerukerudia ai e komumu.
- <sup>8</sup> Emu ruma anianidia e ani boga kunumu;  
     emu moale sinavaina amo o ha-inudiamu.
- <sup>9</sup> Badina be mauri ranuna na oiemu amo e lohi  
     lohi daemu,  
     bona oiemu diari ai diari a itaiamu.
- <sup>10</sup> Emu hebogahisi ba hahesiriua, oiemu ai e man-  
     adamu taudia ediai;  
     emu hahemauri danu, lalodia mamaoro-  
     mamaoro taudia ediai.
- <sup>11</sup> Hekokoroku tauna aena ese basine moigu tao,  
     kara dika tauna imana ese basine dorigu oho.
- <sup>12</sup> Kara dika taudia na e goru paraparamu;  
     vada e doridia dobi, asi edia tore isi dalana ta.

### 37

- <sup>1</sup> Alomu na basine hekwarahi kara dika taudia  
     daidiae,  
     kara kerere taudia danu basio vaǵeǵe henidia.
- <sup>2</sup> Badina be asi vanahana bae utudia, rei na heto;  
     bae kakoro, au raudia na heheto.
- <sup>3</sup> Iehova bavabidadama henia, kara namo ba  
     kara;  
     bena tano ai ba noho, mai mainomu ida.
- <sup>4</sup> Iehova ba moalelaia;  
     oi lalomu ena ura ia ese baine henimu.
- <sup>5</sup> Oiemu dala idoinai Iehova imana ai bavatoa;  
     ia bavabidadama henia, ia ese baine gaukar-  
     alaia.
- <sup>6</sup> Oi igwaurai-maoromu ia ese baine hahedinaraia  
     diari na heto;

oiemu kara maoromaoro danu dina tubua na  
heto.

<sup>7</sup> Iehova enai ba laḡa ani,  
ia ba naria mai haheaukamu ida;  
Ialomu basine hekwarahi, ena ġaukara ai e tagamu  
tauna dainai,  
eiava ena lalo-hadai dikadia anidia e karamu  
tauna dainai.

<sup>8</sup> Badu baine mia, daġedaġe ba rakanania.  
Lalomu basio hahekwarahia: una na kara  
dika e havaraiamu.

<sup>9</sup> Badina be kara dika taudia na bae henege daure;  
a Iehova e nariamu taudia ese tano bae abia.

<sup>10</sup> Asi vanahana kara dika tauna baine puki;  
ena gabu ba tahua, to basio davaria.

<sup>11</sup> A manau taudia ese tano bae abia;  
maino ena harihari-bada idia ese bae moale-  
laia.

<sup>12</sup> Kara dika tauna ese kara maoromaoro tauna  
ihadikana daladia e haeromu,  
gadigadina e hahedai heniamu;

<sup>13</sup> a Ġaubada ese kara dika tauna e kirikirilaiamu,  
badina be e itaiamu, ena dina be maimu.

<sup>14</sup> Kara dika taudia ese dare e veridia lasimu,  
bona edia peva e marediamu,  
ogoġami taudia bona e dabumu taudia ialadia to-  
tona,  
bona kara maoromaoro taudia iala-masedia  
totona.

<sup>15</sup> Edia dare na sibodia kudoudia ai bae vareai,  
bona edia peva bae kwaidu.

- <sup>16</sup> Kara maoromaoro tauna ena ogogami ese  
kara dika taudia hutuma edia taga e herea-  
iamu.
- <sup>17</sup> Badina be kara dika taudia imadia na bae  
kwaиду,  
a Iehova ese kara maoromaoro taudia e  
haginidia toremu.
- <sup>18</sup> Iehova ese asi edia kerere taudia edia dina  
dibana,  
idia ahudia bae mia hanaihanai.
- <sup>19</sup> Haida ese asie hahemaraidiamu dika negadia  
ai,  
bona doe negadia ai bogadia e kunumu.
- <sup>20</sup> A kara dika taudia na e mase oremu;  
Iehova inaina logora na rei gabudia hairaidia  
na heto,  
idia na e boiomu, kwalahu ai e boio vaitan-  
imu.
- <sup>21</sup> Kara dika tauna na e abi torehaimu, bena  
ihalouna asi dibana  
a kara maoromaoro tauna na mai ena  
harihari-bada ida e henimu.
- <sup>22</sup> Badina be Iehova ese e hanamodiamu taudia  
ese tano bae abia  
a baine ihi-ihiraidia taudia na bae henege  
daure.
- <sup>23</sup> Tau namona ena ae-raka na Iehova ese e  
reguamu,  
bona ena dala e moalelaiamu tauna na ia ese  
e haginiamu.
- <sup>24</sup> Ia na baine keto, to basine moru dobi;  
badina be Iehova ese ia imana amo e dogoa  
taomu.

- <sup>25</sup> Lau be gunaguna na erekabe, harihari vada na buruka;  
 a lau ese nega hata kara maoromaoro tauna  
 ta vada e baia na do asina itaia,  
 eiava natuna na aniani e noi hegame ai do  
 asina itaia.
- <sup>26</sup> Ia na nega iboudiai e hariharimu bona e hen  
 torehaimu,  
 bona ia natuna na taunimanima ihanamodia  
 taudia ai vada ela.
- <sup>27</sup> Kara dika ba rakatanidia, kara namo ba kara;  
 bena ba noho hanaihanai.
- <sup>28</sup> Badina be Iehova na kara maoromaoro e ura  
 heniamu;  
 ena helaga taudia na basine rakatanidia.  
 Kara maoromaoro taudia na bae mauri hanai-  
 hanai;  
 a kara dika taudia natudia na bae henege  
 daure.
- <sup>29</sup> Kara maoromaoro taudia ese tano bae abia,  
 bae noholaia hanaihanai.
- <sup>30</sup> Kara maoromaoro tauna uduna ese aonega  
 herevadia e gwauraimu,  
 ia malana ese hahemaoro herevadia e gwau-  
 raimu.
- <sup>31</sup> Ena Dirava ena taravatu na lalona ai;  
 ia aena na se dedimu.
- <sup>32</sup> Kara dika tauna ese kara maoromaoro tauna e  
 itaia taomu,  
 ia iala-masena dalana e tahuamu.
- <sup>33</sup> Iehova ese ia imana ai basine negea,  
 bona bae hahemaoro henia negana ai baine  
 rudia, basie revaia.

- <sup>34</sup> Iehova ba naria, iena dala ai ba raka,  
     bena baine abimu dae, tano na bavabia  
         oiemu;  
     kara dika taudia ihabua-taridia danu ba itaia.
- <sup>35</sup> Kara dika tauna vada na itaia, e lao hereava,  
     e tubu badabadava, Lebanon ai sida auna ta  
         na heto;
- <sup>36</sup> Ma na raka hanai, ia na lasihia;  
     na tahua, to asina davaria.
- <sup>37</sup> Asi ena kerere tauna ba haeroa, bona kara  
     maoromaoro tauna ba itaia,  
     badina be dokona ai ia ese maino baine abia.
- <sup>38</sup> A kara dika taudia na bae mase ore,  
     dokona ai bae henege daure.
- <sup>39</sup> Kara maoromaoro taudia ihamauridia na  
     Iehova ena amo;  
     ia na edia hahemauri gabuna, hekwarahi ne-  
         gadia ai.
- <sup>40</sup> Iehova ese e durudiamu bona e hamauridiamu;  
     ia ese kara dika taudia imadia amo e hamau-  
         ridiamu, e harohodia maurimu,  
     badina be idia ese ia e abidadama heniamu.

## 38

- <sup>1</sup> Iehova e, emu badu ai basio gwvau henigu,  
     emu badu ġaraġara ai basio hahisigu;
- <sup>2</sup> badina be emu diba na lauegu ai vada e heholo  
     vareai,  
     oi imamu metauna na latagu ai.
- <sup>3</sup> Hidiogu na se digaramu, emu badu dainai;  
     turiagu na asie aukamu, egu kara dika  
         daidiae;

- <sup>4</sup> badina be egu kara havara na kwaragu ai vada e  
kau,  
idia na maduna metauna na heto, ihuana na  
asi goadagu.
- <sup>5</sup> Berogu na bonadia e daemu, vada e bodaga,  
egu kavakava dainai.
- <sup>6</sup> Lau na igo dihomu, na goru dihomu,  
dina idoinai na tai ġadeġademu.
- <sup>7</sup> Badina be taugu anina e siahumu,  
hidiogu na se aukamu.
- <sup>8</sup> Vada na manoka, hisi ese e gugubagumu;  
na ġanāganamu, daragu e dokomu dainai.
- <sup>9</sup> Ĝaubada e, egu ura idoinai oi dibamu,  
egu ġanāgħana na emu ai se hehunimu.
- <sup>10</sup> Kudougu e hetahamu, egu goada e oremu;  
matagu diaridia danu vada e rakatanigu.
- <sup>11</sup> Turagu bona bamogu na egu gorere amo e gini  
daudaumu,  
bona varavaragu na dahu ai gigini.
- <sup>12</sup> Egu mauri e tahuamu taudia ese edia idoa e  
atomu;  
ihadikagu e uramu taudia ese hereva dikadia  
na latagu ai e gwauraimu,  
bona dina idoinai ikoigu daladia e haeromu.
- <sup>13</sup> A lau na taia-kudima tauna na heto, asina ka-  
monaimu,  
mu tauna, uduna se haġgħaimu, na heto.
- <sup>14</sup> Oibe, lau na se kamonaimu tauna na heto,  
uduna ai gwaugwau herevadia asie miamu  
tauna na heto.

- 15** Iehova e, lau oi na narimumu;  
 Ģaubada e, egu Dirava, oi ba haere.
- 16** Badina be na ġuriġurimu, na tomu  
 “Mani emu kara aegu e dedimu negadia ai  
 e heaġimu taudia na ba laodia ahu, basie  
 kirikirilaigu”.
- 17** Badina be lau na vada ba ketomu,  
 egu hisihisi na vairagu ai e miamu nega  
 idoinai.
- 18** Egu kara dika na gwaurai hedinaraimu,  
 egu kara havara amo na helalo kerehaimu.
- 19** Asi badina e inai henigumu taudia na mai goad-  
 adia,  
 e inai henigu koikoimu taudia na hutuma.
- 20** Egu kara namo na dika e davanalaiamu taudia  
 na lau inaigu,  
 badina be lau ese namo na ġavaiamu.
- 21** Iehova e, basio rakatanigu;  
 egu Dirava e, egu amo dauhai basio noho.
- 22** Ģaubada e, lau ihamaurigu Diravana,  
 a durugu haraġa.

## 39

- 1** Lau nato “Egu dala nahuadiah baina toho,  
 malagu amo kara dika baina havaraia na ga-  
 rina;  
 udugu baina hakapua,  
 kara dika taudia na dekegu ai e nohomu ne-  
 gadia iboudiai”.
- 2** Lau na asi reġereġegu, asi egu hereva,  
 hereva ta asina gwauraia, to se heġereġere;

<sup>3</sup> egu lalo-hisihisi vada e bada e laova,  
 lalogu na e siah u e laova;  
 na haeroava lalonai lahi e arava,  
 bena malagu amo na hereva.

<sup>4</sup> Iehova e, egu doko negana boma hadibagu,  
 egu dina na ede hohodia;  
 egu mauri ede e heau tomamu bama diba.

<sup>5</sup> A itaia, egu dina vada o kara, ima lababadia hida  
 hodia na heto;

egu mauri na dia ġau ta oi vairamu ai.

Momokani, taunimanima iboudiai edia mauri na  
 hahodi tamona na heto; (Selah)

<sup>6</sup> momokani, taunimanima na e loaloamu,  
 vabura na heto.

Momokani, edia hekwarahi na asi anina;  
 idia ese taġa e habouamu, a asi dibadia daika  
 ese baine abia.

<sup>7</sup> Ĝaubada e, dahaka na nariamu?  
 Egu helaro na oi.

<sup>8</sup> Egu kara dika iboudiai lalodia amo ba harohogu  
 mauri;  
 kavakava taudia na ba laodia ahu, basie ihi-  
 ihiraigu.

<sup>9</sup> Lau na asi regereġegu, udugu asina haġġaia;  
 badina be oi ese o karaia.

<sup>10</sup> Emu hekwadi na egu amo bavabia oho;  
 oi imamu ena hedadaba ese vada e alagu.

<sup>11</sup> Taunimanima na edia kara dika daidiae o gwau  
 henidiamu negedia ai na  
 idia hairaidia o ha-oreamu, kaubebe na heto.  
 Momokani, taunimanima iboudiai na hahodi  
 tamona na heto. (Selah)

- <sup>12</sup> Iehova e, egu ġuriġuri ba kamonai;  
       egu taitai ba hakala henia;  
 iruru-matagu ba itadia negana ai,  
       udumu basio hakapua.  
 Badina be lau na emu vadivadi;  
       lau na noho-hedoа taugu, senegu iboudiae  
       heġereġeredia.
- <sup>13</sup> Egu amo ba mede kerehai, bena moale baina  
       diba,  
       ini amo do basina raka oho basina lao bubuni  
       negana ai.

## 40

- <sup>1</sup> Iehova na nariava mai haheukagu ida;  
       ia ese e igo diho henigu, egu taitai e kamonai.
- <sup>2</sup> Ia ese guri dikana amo e verigu lasi,  
       kopukopu gabuna amo e abigu isi;  
 aegu na nadi badana latanai e atodia kau,  
       egu raka e regua.
- <sup>3</sup> Ia ese ane matamata na udugu ai e atoa,  
       eda Dirava ihanamolaina anena.  
 Hutuma bae itaia, bena bae gari,  
       bona Iehova bae abidadama henia.
- <sup>4</sup> Iehova e abidadama heniamu tauna na namo;  
       ia ese heaġi taudia se matauraidiamu,  
       bona diraya koikoidia ilao-henidia totona e  
       raka sirimu taudia se haġerediamu.
- <sup>5</sup> Iehova e, egu Dirava, emu hoa karadia bona  
       ilalolaimai lalo-hadaidia  
       vada o habada emai ai;  
       oi na asi idaimu.  
 Bama gwauraidia bona bama herevalaidia,  
       to basinama duahidia diba.

- 6 Rara boubouna bona flaoa boubouna na so uramu,  
a taiagu vada o hakiraradia.  
Gole-oho boubouna bona kara-dika boubouna  
oi ese so gwauraimu.
- 7 Bena lau nato “A itaia, na vasimu,  
buka ilokuna ta ai vada e torelaigu:
- 8 egu Dirava e, oiemu ura ikarana na moalelamu,  
oiemu taravatu na lalogu ai e miamu”.
- 9 Hahemauri sivaraina namona vada na gwau-raia,  
hebou badana lalonai;  
Iehova e, oi dibamu,  
bibinagu asina hakapudia.
- 10 Oiemu kara maoromaoro na lalogu ai asina hunia,  
emu heabidadama bona emu hahemauri  
vada na herevalaidia;  
emu hebogahisi bona emu hereva momokani na  
hebou badana amo asina hunia.
- 11 Iehova e, emu hebogahisi na egu amo basio rua;  
emu lalokau bona emu heabidadama ese bae  
reğugu hanaihanai.
- 12 Badina be hahedika momo herea vada e ġeġegu  
ahu,  
egu kara havara ese vada e lasigu tao,  
asi egu dala baina gaga isi;  
idia na momo herea, kwaragu huidia na dia hoho;  
daragu na e dokomu.
- 13 Iehova e, mani emu kara ba hamaurigu,  
Iehova e, ba durugu haraġa.

<sup>14</sup> Egu mauri iabi ohona dalana e tahuamu taudia  
na  
ba hahemaraidia bona ba hahegonudia;  
ihahisigu e uramu taudia na  
ba haloudia bona ba hahemaraidia;  
<sup>15</sup> e gwau henigumu, e tomu “Aha, aha”, taudia na  
edia hemarai dainai bae kudou hetaha.

<sup>16</sup> A e tahumumu taudia iboudiai na bae moale,  
oi bae moalelaimu.  
Emu hahemauri e ura heniamu taudia bae hereva  
loulou,  
baeto “Iehova na herea dae”.  
<sup>17</sup> Lau be na ogogamimu bona na dabumu,  
A Ģaubada ese e lalogumu.  
Dirava e, basio halahe;  
oi na lau ikahagu bona lau ihamaurigu Dira-  
vana.

## 41

<sup>1</sup> Ogoġami taudia e lalodiamu tauna na namo;  
Iehova ese e harohoa maurimu, hekwak-  
wanai dinana ai;  
<sup>2</sup> Iehova ese e gimaiamu bona e hamauriamu;  
tano ai namo e gwauraiamu;  
ia na inaina edia ura dalana ai asio heni.  
<sup>3</sup> Gorere dainai ena geda ai e hekuremu negadia  
ai  
Iehova ese e abia isimu;  
ena gorere lalodiai,  
oi ese ena hisihisi iboudiai o abi ohomu.  
<sup>4</sup> Lau nato “Iehova e, a bogagu hisi, ba hamaurigu;  
badina be lau ese vada na kara havara hen-  
imu”.  
<sup>5</sup> Lau inaigu ese e maumauraigumu, e tomu

“Edena nega ai baine mase?  
Ia ladana na edena nega ai baine boio?”

- <sup>6</sup> Ta dekegu ai e maimu negana ai,  
ia ese hereva asi anidia e gwauraimu.  
Lalo-hadai dikadia na lalona ai e haboumu;  
bena e raka lasimu, e piu rohorohomu.
- <sup>7</sup> E inai henigumu taudia iboudiai ese lau e  
hemaunulai henigumu,  
ihadikagu daladia e haeromu.
- <sup>8</sup> Idia na e tomu “Gorere dikana ese vada e abia,  
ena hekure gabuna amo basine tore isi lou”.
- <sup>9</sup> Turagu lalokauna danu, na abidadama heniava  
tauna, egu aniani e aniava tauna,  
ia ese danu ia ae-geduna amo vada e lahagu.
- <sup>10</sup> Iehova e, oi ese ba bogagu hisi;  
bavabigu isi, bena davadia do baina henidia.
- <sup>11</sup> Ini amo lau dibagu oi ese o lalo namo henigumu,  
inaigu ese se hadareregu dainai.
- <sup>12</sup> Oi ese vada o haginigu tore, egu kara maoro-  
maoro dainai;  
oi vairamu ai vada o haginigu hanaihanai.
- <sup>13</sup> Iehova, Israel Diravana, bae hanamoa,  
harihari ela bona hanaihanai. Amen. Amen.

## 42

- <sup>1</sup> Dirava e, dia hahineni ese sinavai ranudia e ura  
henidiamu na heto,  
lau laumagu ese unu e ura henimu tomamu.
- <sup>2</sup> Laumagu na e ranu masemu, Dirava enai, Mauri  
Diravana enai.  
Edena nega ai Dirava vairana baina itaia?

<sup>3</sup> Iruru-matagu na agu aniani ġauna,  
dina ai bona hanuaboi ai;  
Nega idoinai taunimanima ese e nanadaigu  
louloumu,  
e tomu “Emu Dirava be edesenai ai?”

<sup>4</sup> Laumagu ena hisihisi ai  
na lalodia taomu ġaudia bini:  
hutuma ida na laova,  
Dirava ena rumा ai na hakaudia vareaiva,  
mai moale lolodia bona ihanamolaidia anedia  
ida;  
hutuma bada ese aria helāgana e karaiaava.

<sup>5</sup> Laumagu e, dahaka dainai vada o metau?  
Dahaka hekwarahina lalogu ai o karaiamu?  
Dirava ba laroa; badina be lau do baina hanamo  
lou,  
lau ikahagu bona egu Dirava.

<sup>6</sup> Laumagu na e metaumu lalogu ai;  
taunabunai oi mo na lalomu taomu,  
Ioridane tanona bona Heremon tanona amo,  
bona Misara ororona amo.

<sup>7</sup> Dobu gabuna ta ese dobu gabuna ta e boi heniamu,  
ranu seiraina guruna ai.

Emu hurehure bona emu sinaia iboudiai ese  
vada e habubunigu.

<sup>8</sup> Dina ai Iehova ese ena hebogahisi e  
haheġanilaiamu,  
hanuaboi ai ena ane ese e bamogumu;  
ġuriġuri danu, egu mauri Diravana ena.

- <sup>9</sup> Dirava, egu nadi-gini, na hereva heniamu, na  
tomu  
“Dahaka dainai vada o lalogu boio?  
Badina be dahaka na tai ġadeğademu,  
inaigu edia dağedağe karadia daidiae?”  
<sup>10</sup> Tau-anigu bema haberoa na heto,  
inaigu ese lalogu e daia urumu.  
E nanadaigu louloumu, e tomu  
“Emu Dirava be edesenai ai?”  
<sup>11</sup> Laumagu e, dahaka dainai vada o metau?  
Dahaka hekwarahina lalogu ai o karaiamu?  
Dirava ba laroa; badina be lau do baina hanamoa  
lou,  
lau ikahagu bona egu Dirava.

## 43

- <sup>1</sup> Dirava e, ba gwauraigu maoro;  
se matauraimumu besena enai maorogu ba  
gwauraia;  
kara koikoi bona kara gageva-gageva taudia  
imadia amo ba hamaurigu.  
<sup>2</sup> Oi na lau igimagu Diravana;  
dahaka dainai vada o negegu daure?  
Badina be dahaka na tai ġadeğademu,  
inaigu edia dağedağe karadia daidiae?  
<sup>3</sup> Emu diari bona emu hereva momokani a siaia  
mai,  
idia ese bae hakaugu;  
emu ororo helağana bona emu noho kalagana  
ediai  
bae hakaugu vasi.  
<sup>4</sup> Bena Dirava ena ihaboulaina patana baina lao  
henia;

na moalelaia badamu Diravana baina lao henia.  
 Dirava e, egu Dirava,  
 lau ese gitara amo baina hanamomu.

<sup>5</sup> Laumagu e, dahaka dainai vada o metau?

Dahaka hekwarahina lalogu ai o karaiamu?  
 Dirava ba laroa; badina be lau do baina hanamoa  
 lou,  
 lau ikahagu bona egu Dirava.

## 44

<sup>1</sup> Dirava e, taiamai amo vada a kamonai,  
 tamamai ese vada e hamaoromai,  
 idia edia dina ai dahaka dahaka o kara,  
 nega gunadia ai.

<sup>2</sup> Sibomu imamu amo bese idau-idau o luludia  
 lasiva,  
 a idia na o atodia;  
 bese idau-idau oi ese o hahisidiava,  
 a idia na o hamauridia.

<sup>3</sup> Badina be dia idia sibodia edia dare amo  
 tano e abia,  
 bona dia idia sibodia imadia amo e kwalimu;  
 a oi imamu idibana amo,  
 oi imamu bona oi vairamu diarina amo;  
 badina be oi ese o moalelaidiava.

<sup>4</sup> Oi na egu Pavapava bona egu Dirava;  
 oi ese Iakob ihamaurina vada o gwauraia.

<sup>5</sup> Oi bagumu ai ai inaimai a hadarerediamu,  
 oi ladamu bagunai e tuari henimaimu taudia  
 na baia moimoilaidia.

<sup>6</sup> Badina be dia egu peva asina abidadama heniamu,  
 dia egu dare ese basine hamaurigu;

- <sup>7</sup> a oi ese ai inaimai imadia amo vada o hamaurimai,  
e inai henimaimu taudia vada o haheḡonudia.
- <sup>8</sup> Nega idoinai Dirava vada a heaḡilaia;  
oi ladamu baia imodaia hanaihanai. (Selah)
- <sup>9</sup> A oi ese vada o negemai daure, bona vada o hahemaraimai,  
emai tuari oredia ida asiola.
- <sup>10</sup> Inaimai vairadai vada o haloumai;  
inaimai ese emai kohu vada e dadihai.
- <sup>11</sup> E aladiamu mamoeida heḡereḡeredia ai vada o halaomai,  
bese idau-idau bogaragidiai vada o hakarohomai rohoroho.
- <sup>12</sup> Emu oreia taudia na vada o hoidia, dava maraḡi ai,  
idavalaidia badana na asio tauamu.
- <sup>13</sup> Dekemai taudia ese bae kirikirilaimai taudia ai vada o halaomai,  
e ġeġemai daemu taudia ese baehevasehalaimai bona bae dadaraimai taudia ai vada o halaomai;
- <sup>14</sup> bese idau-idau bogaragidiai bae ihi-ihiraimai taudia ai vada o halaomai,  
oreia idau-idau bogaragidiai kwaradia bae taiko-taiko henimai taudia ai vada o halao-mai.
- <sup>15</sup> Dina idoinai egu keto na vairagu ai,  
hemarai ese vairagu vada e ġovaia;
- <sup>16</sup> hevaseha taudia bona heihi-ihirai taudia edia hereva daidiae,  
inai tauna bona dava iabina tauna daidiae.
- <sup>17</sup> Ena be asia lalomu boio, bona emu taravatu asia tataia utu,

- to ina idoinai na ai latamai ai vada e kau  
<sup>18</sup> Ai lalomai na asie lou,  
     bona aemai na emu dala amo asie raka siri;  
<sup>19</sup> matona, oi ese uda sisiadia edia gabu ai vada o  
     huarimai,  
     bona dibura masemase ai vada o ġovamai.
- <sup>20</sup> Emai Dirava ladana baiama laloa boio,  
     eiava imamai na dirava idauna ta bema toi  
     roro henia,  
<sup>21</sup> Dirava basinema davaria a?  
     Badina be ia na lalo-hadai hehunidia dibana.  
<sup>22</sup> Lasi, oi daimu ai dina idoinai e alamaimu,  
     e duahimaimu, bae aladia mamoedia na  
     heheto.  
<sup>23</sup> A noga! Ġaubada e, dahaka dainai o mahutamu?  
     A tore isi! Basio negemai daure hanaihanai.  
<sup>24</sup> Dahaka dainai vairamu o huniamu?  
     Dahaka dainai emai hekwarahi bona emai  
     hisihisi o lalo boiomu?  
<sup>25</sup> Badina be laumamai na ġahu ai e igo dihomu,  
     tau-animai na tano ai e goru dihomu.  
<sup>26</sup> A tore isi, ikahamai aoma!  
     emu hebogahisi dainai ba hamaurimai.

## 45

- <sup>1</sup> Lalوغو نا ڇاو نامونا امو اه هپرای دوبیمۇ؛  
     اگۇ هېرەۋا نا ھانوا پاۋاپاۋانا ئایى نا  
     جواړۍامۇ،  
     ماڭۇ نا تۆرەتەرە اه مانادامۇ تاۇنَا ئەنە  
     پەن نا ھەتۆ.
- <sup>2</sup> تاڳىمانىما ناتۇدۇيا ىبۇدیاى بوجاراگىدىاى  
     ئى مۇ سېبومۇ او راھو نامۇ ھېرەامۇ؛  
     ھارىھارى-بادا نا بېبىنامۇ اىھەبۇبۇ ڪاۇمۇ،

- taunabunai Dirava ese vada e hanamomu  
hanaihanaimu.
- <sup>3</sup> Siahu taumu e, emu dare na koekoemu ai bavatoa,  
mai hairaimu ida bona mai siahumu ida.
- <sup>4</sup> Emu hosi ai ba gui, mai siahumu ida baola, ba  
kwalimu;  
hereva momokani dainai bona kara maoro-  
maoro igimana totona,  
imamu idibana ese hahegari karadia baine  
hadibalaimu.
- <sup>5</sup> Emu diba na mai matadia, hanua pavapavana  
inaina kudoudia ai e hedai kaumu;  
bese idau-idau taudia na oi henumu ai e ketomu.
- <sup>6</sup> Oiemu terono helāgana e mia hanaihanaimu,  
oiemu pavapava aurla na hahemaoro auna.
- <sup>7</sup> Kara maoromaoro o ura henimu,  
bona kara dikā o inai henimu;  
taunabunai Dirava, oiemu Dirava, ese vada e  
horomu,  
moale dehorona vada e horolaimu, oi  
bamomu daediai.
- <sup>8</sup> Emu dabua amo muro bona aloe bona kasia\*  
bonadīa e daemu;  
pavapava edia aivori rumadia amo hatai-  
hatai ġaudia ese e hamoalemumu.
- <sup>9</sup> Pavapava natudia hahinedia na emu ruma  
hahinedia bogaragidiae;  
oi idibamu kahana ai pavapava hahinenā mai  
Ofiri *gold* dabuana ida gini.
- <sup>10</sup> Hane-ulato e, a haeroa, a hakala henigu,

---

\* **45:8** “Muro” bona “aloe” bona “kasia” na muramura mai bona-  
dia ladadia. “Aivori” na elefant doadie.

emu bese taudia bona tamamu ena ruma ba  
lalodia boio;

<sup>11</sup> bena hanua pavapavana ese oi hairaimu  
baine ura henia.

Ia na emu lohia dainai ba igo henia diho;

<sup>12</sup> bena Turo ulatodia na herahia bae mailai.  
bona taḡa herea taudia edia noinoi na oi  
dekemu bae mailai.

<sup>13</sup> Hanua pavapavana natuna kekenina na mai  
hairaina, ena daiutu lalonai;  
ena dabua na *gold* varodia ai e haheraiamu.

<sup>14</sup> Dabua herea-daedia ai ia na hanua pavapavana  
dekena e hakaua vareaimu,  
mai bamona, hane-ulato rami-heboudia, ida,  
ia murinai e rakamu.

<sup>15</sup> mai moaledia ida, mai moale-badadia ida e  
hakaudia laomu,  
hanua pavapavana ena ruma ai e raka  
vareaimu.

<sup>16</sup> Natumui mamaruanedia ese tamamui bae bolo-  
dia,  
tanobada idoinai lohiadia ai ba halaodia.

<sup>17</sup> Oi ladamu baina habadaia, uru iboudiai ese bae  
imodaia,  
taunabunai bese idau-idau ese bae  
hanamomu ela bona hanaihanai.

## 46

<sup>1</sup> Dirava na eda roho-mauri gabuna, bona eda  
goada,  
ikahada namo-hereana dika negadia ai.

<sup>2</sup> Una dainai ita na basita gari,  
ena be tanobada baine idau,

- ena be ororo bae marere-marere davara bogaraginai,  
<sup>3</sup> ena be davara ranudia bae regerege bona bae gwaragwara,  
 ena be ororo bae heude-heude una regerege dainai,  
 to ita na basita gari. (Selah)  
<sup>4</sup> Sinavai ta ena aru parara ese Dirava ena hanua vada e hamoalea,  
 Herea Mikamika ena noho gabuna helağana bunai.  
<sup>5</sup> Dirava na ia bogaraginai, ia na basine marere;  
 Dirava ese ia baine kahaia, daba matana ai.  
<sup>6</sup> Tanobada besedia e heloğō-heloğomu,  
 basileia idau-idau e raivaraivamu;  
 ia gadona e gwau isimu,  
 bena tanobada e vevemu.  
<sup>7</sup> Iehova Sabaota na ita ida;  
 Iakob ena Dirava na eda kohoro. (Selah)  
<sup>8</sup> Aoma, Iehova ena ġaukara a itaia;  
 hahedika karadia ia ese tanobada ai vada e kara.  
<sup>9</sup> Tuari ia ese e hadokodiamu ela bona tanobada dokona,  
 peva ia ese e bituamu,  
 io ia ese e hakwaiduamu,  
 kariota ia ese lahi ai e douamu.  
<sup>10</sup> Eremui, ba diba, lau na Dirava;  
 bese idau-idau bogaragidiai e imodaigumu,  
 tanobada ai e heatolaigumu.  
<sup>11</sup> Iehova Sabaota na ita ida;  
 Iakob ena Dirava na eda kohoro. (Selah)

- Dirava ba lolo henia, moale anedia ba lololai.
- <sup>2</sup> Badina be Iehova, Herea Mikamika, na mai gari;  
    ia na Pavapava badana, tanobada idoinai e  
        lohiadiamu.
- <sup>3</sup> Ia ese bese idau-idau ita henu dai vada e  
        hamanadadia,  
        orea idau-idau aeda henu dai vada e atodia.
- <sup>4</sup> Ia ese ahuda vada e abia hidi,  
    ena lalokau tauna Iakob ena heāgi. (Selah)
- <sup>5</sup> Dirava na mai lolona ida vada e dae,  
    Iehova na mai kibi reēgena ida vada e dae.
- <sup>6</sup> Dirava ba hanamo, ia ihanamolaina anedia  
    bavabi;  
    eda Pavapava ba hanamo, ia ihanamolaina  
        anedia bavabi.
- <sup>7</sup> Badina be Dirava na tanobada idoinai pavapa-  
    vana;  
    salamo amo ba hanamo.
- <sup>8</sup> Dirava ese bese idau-idau e lohiadiamu;  
    Dirava na ena terono helaāana ai e helaimu.
- <sup>9</sup> Bese idau-idau lohiadia e heboumu,  
    Abraham ena Dirava ena bese ai baela.  
Badina be tanobada kesidia na Dirava ena;  
    ia bae imodaia bada.

## 48

- <sup>1</sup> Iehova na bada; ia ihanamona danu baine bada,  
    eda Dirava ena hanua ai.
- <sup>2</sup> Ena ororo helaāana dorina na mai hairaina;  
    tanobada idoinai ese ia e moalelaiamu.  
Siona ororona na dahu ai, mirigini kahana ai;  
    ia na Pavapava badana ena hanua.
- <sup>3</sup> Ena rumu bogaragidiai Dirava eme hedinarai,  
    kohoro na heto.

- <sup>4</sup> A itaia! Hanua pavapavadia e hebou,  
e raka hebouva.
- <sup>5</sup> E itaia negana ai e hoa dikadika,  
laumadia e daure, bena e heau;
- <sup>6</sup> unuseni ai taudia e heude-heude,  
e hisihisi bada danu, hahine e hekamonaimu  
na heto.
- <sup>7</sup> Lai mairiveina amo  
Tarasisi lagatoidia o huaridia.
- <sup>8</sup> Ai a kamonaiva heğereğerena vada a itaia danu,  
Iehova Sabaota ena hanua ai,  
emai Dirava ena hanua ai,  
Dirava ese vada e haginia hanaihanai hanuana  
bunai. (Selah)
- <sup>9</sup> Dirava e, emu hebogahisi vada a haeroa,  
emu dubu helāgana bogaraginai.
- <sup>10</sup> Dirava e, oi ladamu e piua e laomu heğereğerena,  
ihanamomu danu e piua e laomu,  
ela bona tanobada dokodia.
- Oi imamu idibana na kwalimu ai e honumu;
- <sup>11</sup> Siona ororona baine moale,  
Iuda natuna hahinedia bae moale hisi dae,  
emu hahemaoro herevadia daidiai.
- <sup>12</sup> Siona ai ba loa, ba rakaia heğeğe,  
ena kohoro ba duahidia,  
<sup>13</sup> ena mağu ba haerodia;  
ena rumu namodia ba itadia loaloa,  
uru gabena taudia do ba hamaorodia  
helaoreana.
- <sup>14</sup> Ina na Dirava, eda Dirava hanaihanai;  
ia ese baine kahada ela bona dokona.

## 49

- <sup>1</sup> Bese idau-idau taumui iboumui ai, a kamonai!  
    Tanobada taumui iboumui ai, a hakala!
- <sup>2</sup> Henu taumui bona atai taumui,  
    tağā taumui bona ogōgami taumui,  
    orea tamona mo.
- <sup>3</sup> Udugu ese aonega baine gwauraia,  
    lalogu ese lalo-parara herevadia baine haero-  
        dia.
- <sup>4</sup> Hereva heğereğerena baina hakala henia,  
    egu hereva hehunina na gitara reğena ese  
        baine hahedinaraia.
- <sup>5</sup> Dahaka dainai baina gari, hekwakwanai nega-  
        dia ai,  
    eiava e dağedağē henigumu taudia edia kara  
        dika ese e ğeğegu ahumu negadia ai?
- <sup>6</sup> Idia ese edia tağā e abidadama heniamu,  
    edia kohu momo herea e heagilaimu.
- <sup>7</sup> Momokani, tau ta sibona basine hehoi lasi diba,  
    ena mauri davana na Dirava basine henia  
        diba;
- <sup>8</sup> badina be ena mauri davana na bada herea.  
Tau ta dia heğereğere
- <sup>9</sup> ena mauri baine hadaudaua hanaihanai,  
    bona mase gabuna basine itaia.
- <sup>10</sup> Oibe, ia baine itaia, aonega taudia danu e  
        masemu;  
    kava tauna bona lalo-duhu tauna raruosi bae  
        mase,  
    bona edia tağā na bae rakatani, haida edia.
- <sup>11</sup> Ena be tano haida e gwauraidia edia,  
    to edia guri na edia rumā ela bona hanai-  
        hanai,  
    edia noho gabudia ela bona uru iboudiai.

**12** Tau ta na ena hairai ai basine noho diba,  
ia na e masemu boromadia na heheto.

**13** E heāgi kavamu taudia davadia binai,  
ahudia e moalelaimu taudia dokodia binai.

**14** Mamoe na heheto mase gabuna baela;  
mase ese baine regudia, mamoe iregudia  
tauna na heto.

Maoromaoro guri ai e dihomu,  
hairaidia vada bae ore,  
mase taudia edia gabu ai bae noho.

**15** A Dirava ese lau laumagu davana baine karaia,  
mase siahuna amo baine rauaia;  
badina be ia ese baine abigu dae. (Selah)

**16** Tau ta baine taāga negana ai,  
bona ena rumu hairaina baine bada negana  
ai,  
basio gari.

**17** Badina be baine mase negana ai āgau ta basine  
abia kau, basine laohaia;  
ia hairaina basine diholaia.

**18** Ena be ena mauri dinadia ai ia na sibona moale  
tauna ai baine hegwaurai,  
ena be sibona ena namo e havaraiamu tauna na  
bae imodaia,  
**19** to tamana ena uru taudia baine lao henidia;  
idia ese diari basie itaia lou.

**20** Tau ta na ena hairai ai basine noho diba,  
ia na e masemu boromadia na heheto.

## 50

**1** Goada-bada Diravana Iehova, vada e hereva,  
tanobada vada e boiria,  
dina e daemu gabuna amo

- ela bona dina e dihomu gabuna.
- <sup>2</sup> Siona, hairai-herea gabuna, amo  
Dirava diarina e taramu.
- <sup>3</sup> Eda Dirava na e maimu, asine mai kumamu,  
ia vairanai na lahi hururu-hururuna,  
lai gubadia ese e gegea ahumu.
- <sup>4</sup> Ia ese guba atai ai e boi heniamu, tanobada danu  
e boi heniamu,  
ena orea taudia baine hahemaoro henidia  
totona.
- <sup>5</sup> “E abidadama henigumu taudia ba haboudia  
egu” e tomu,  
“idia ese boubou karadia e kara, lau ida a  
herohemaino”.
- <sup>6</sup> Guba ese ena kara maoromaoro e gwauraimu,  
badina be Iehova sibona na hahemaoro  
tauna. (Selah)
- <sup>7</sup> Egu orea taumui e, a hakala, lau baina hereva;  
Israel e, baina habadelaimu.  
Lau na Dirava, emui Dirava.
- <sup>8</sup> Asina gwau henimuimu emui boubou daidiae;  
emui ġole-oho bouboudia na lau vairagu ai  
nega idoinai.
- <sup>9</sup> Boromakau maruanena ta emui ruma amo  
basina abia,  
nani maruanena ta emui maġu amo basina  
abia dae;
- <sup>10</sup> badina be uda ġaudia iboudiae na lauegu,  
bona ororo daha-ta boromakaudia danu;
- <sup>11</sup> atai manudia iboudiae be dibagu,  
tano paka ai e laomu ġaudia iboudiae na egu.
- <sup>12</sup> Bama hitolo, umui basinama hamaoromui;  
badina be tanobada mai anina idoinai ida na  
lauegu.

- 13 Boromakau mamaruanedia hidiodia na animu  
a?  
Nani raradia na inumu a?
- 14 Hahenamo na Dirava ba henia, emui boubou  
bunai;  
emui gwauhamata anidia ihamomokanidia  
na Herea Mikamika ba henia.
- 15 Hekwakwanai dinana ai lau ba boi henigu;  
bena lau ese umui baina hamaurimui,  
bona umui ese lau ba imodaigu.
- 16 A kara dika taudia na  
Dirava ese e hereva henidiamu, e tomu:  
Badina be dahaka egu taravatu o gwauraimu?  
Dahaka dainai egu gwauhamata herevadia  
na udumui bibinadia ai mimia?
- 17 Badina be mata-hakani o inai heniamu,  
bona egu hereva na murimui ai o negediamu.
- 18 Henao tauna o itaiamu negana ai o hetura hen-  
amu;  
bona heuda-hanai taudia o bamodiamu.
- 19 Hereva dikadia na udumui amo e lasimu,  
malamui na hereva koikoidia e gwauraimu;
- 20 o helaimu, tadikekamui o habadelaidiamu,  
sinamui natudia mamaruanedia o habade-  
laidia koikoimu.
- 21 Ini vada o kara toma, asina hereva;  
umui banava oto lau na umui heğereğeremui.  
A harihari na gwau henimuimu,  
egu hahebade na vairamui ai na gwaura-  
iamu.
- 22 Ina na ba laloa, Dirava o laloa boiomu taumui,  
baina daremui, bena ta ese basine hamau-  
rimui diba, na garina.
- 23 Hahenamo e mailaiamu tauna na ena boubou  
bunai,

una tau ese e matauraigumu.  
 Ena mauri dalana e reğua namonamomu tauna na  
 Dirava ena hahemauri baina haheitalaia.

## 51

- <sup>1</sup> Dirava e, a bogagu hisi,  
     emu lalokau heğereğerena;  
     emu hebogahisi bada-herea heğereğerena ai  
     egu kara dika ba rohodia.
- <sup>2</sup> Egu kara havara ba huridia oho,  
     egu kerere amo ba hağoevagu.
- <sup>3</sup> Badina be egu kara dika na dibagu,  
     egu kerere na vairagu ai nega iboudiai.
- <sup>4</sup> Oiemu ai, oi mo sibomu emu ai, vada na kerere,  
     oi vairamu ai vada na kara havara;  
     taunabunai emu hereva na maoromaoro,  
     bona emu hahemaoro herevana na asi kerer-  
     ena.
- <sup>5</sup> Momokani, lau na kara havara ai na vara,  
     bona kara dika ai sinagu ese e havaragu.
- <sup>6</sup> Momokani, oi o uramu hereva momokani na  
     lalomai ai baine mia,  
     taunabunai, lalogu ai aonega hehunidia ba  
     hadibagu.
- <sup>7</sup> Muramura avana amo ba hağoevagu, bena baina  
     ğoevağoeva;  
     a hurigu, bena snow ena kurokuro baina  
     hereaia.
- <sup>8</sup> Moale bona lalo-namo amo ba hahonugu;  
     vada o hakwaidu turiadia do bae moale.
- <sup>9</sup> Vairamu na egu kara dika amo ba hunia,  
     bona egu kara havara iboudiai na ba rohodia.

- <sup>10</sup> Dirava e, lalo-ḡoevaḡoева na lalogu ai ba havaraia,  
bona lauma matamatana bona maoro-maorona na lalogu ai bavatoa.
- <sup>11</sup> Oi vairamu amo basio negegu daure;  
emu Lauma helāgana na egu amo basio abia oho.
- <sup>12</sup> Emu hahemauri moalena na ba henigu lou,  
bona ura-kwalimu laumana amo bavabigu isi.
- <sup>13</sup> Bena emu dala na kara kerere taudia baina hadibalaidia,  
bona kara dika taudia ese oi bae lou henimu.
- <sup>14</sup> Dirava e, lau ihamaurigu Diravana,  
rara ihahebubuna amo ba hamaurigu,  
bena lau malagu ese ane baine abia badabada,  
oiemu hahemauri anena.
- <sup>15</sup> Ġaubada e, lau bibinagu ba hapapadia,  
bena udugu ese baine imodaimu.
- <sup>16</sup> Badina be boubou karadia so moalelaidiamu,  
ḡole-oho boubouna bama henimu, to basioma moalelaia.
- <sup>17</sup> Dirava ese e abia daemu boubouna be lauma manauna;  
Dirava e, lalona e manaumu bona ena dika amo e helalo kerehaim tauna na basio dadaraia.
- <sup>18</sup> Emu lalo-namo ai Siona ba kara namo henia;  
Ierusalem maḡuna ba haginia lou;
- <sup>19</sup> bena kara maoromaoro bouboudia ba moale-laidia,  
lahi bouboudia bona ḡole-oho bouboudia;

bena boromakau mamaruanedia na emu  
ihaboulaina patana ai  
bae hahelaāadia.

## 52

- <sup>1</sup> Goada-herea taumu e,  
Dahaka dainai Dirava e matauraimu taudia  
e kara dika henidiamu  
na o heāgilaimu?
- Dina idoinai hahebua-tari daladia o haero  
heāgaeāemu.
- <sup>2</sup> Kara koikoi taumu e,  
malamu na kaia mai ganona na heto.
- <sup>3</sup> Dika o ura henia badamu, namo o ura henia  
maraāimu,  
hereva koikoi o ura henia badamu, hereva  
momokani o ura henia maragimu. (Selah)
- <sup>4</sup> Koikoi malana e,  
hahemase herevadia iboudiai o ura henidi-  
amu.
- <sup>5</sup> A Dirava ese baine huarimu ela bona hanai-  
hanai;  
ia na baine verimu oho, emu kalaga amo  
baine dadihaimu,  
mauri taudia edia tano amo baine raāgamu.  
(Selah)
- <sup>6</sup> Kara maoromaoro taudia bae itaia, bena bae  
gari,  
bae kirikirilaia, baeto
- <sup>7</sup> “Hari Dirava enai se tao tauna mani a itaia;  
ia ese ena kohu momo e abidadama henia,  
bona ena taāai mo e helalokau”.
- <sup>8</sup> A lau na olive auna mai rauna matamatadia na  
heto, Dirava ena rumai;

Dirava ena hebogahisi na abidadama henia  
hanaihanaimu.

<sup>9</sup> Lau ese baina imodaimu ela bona hanaihanai,  
badina be oi ese vada o karaia;  
oi ladamu baina heatolaia, badina ia na namo  
Dirava e matauraiamu taudia vairadai.

## 53

<sup>1</sup> Kava tauna na lalona ai e tomu  
“Dirava na lasi”.

Idia na mimiro, kara dika-hereadia e karamu;  
asi tauna ta ese kara namo e karamu.

<sup>2</sup> Dirava na guba amo e roha dobimu,  
taunimanima natudia e nenediamu;  
baine itadia, aonega taudia haida nonoho,  
eiava Dirava e tahuamu taudia haida nonoho.

<sup>3</sup> Iboudiai vada e keto,  
iboudiai vada e miro;  
asi tauna ta ese kara namo e karamu,  
lasi ona lasi waitani.

<sup>4</sup> Kara dika taudia na asi edia lalo-parara a?  
Idia na egu oreu taudia e anidiamu, flaoa e  
animu na heto;  
idia ese Dirava asie boi heniamu.

<sup>5</sup> Idia bunu, gari bada ese e butudia taomu,  
gari idauna, nega gunana ta se vara ġauna.  
Badina be Dirava ese asie matauraiamu taudia  
turiadia baine ġigidia rohoroho;  
idia na bae hahemaraidia, badina be Dirava  
ese vada e dadaraidia.

**6** Israel ihamaurina na Siona amo bema mai be  
namo!  
Dirava ese ena orea taudia baine haginidia  
lou negana ai  
Iakob baine moale, bona Israel baine hisi dae.

## 54

**1** Dirava e, oi ladamu amo ba hamaurigu,  
oi goadamu amo ba gwauraigu maoro.

**2** Dirava e, egu noinoi a kamonai,  
lau udugu herevadia ba hakala henidia.

**3** Badina be asi edia hemataurai taudia vada e tore  
isi,  
lau ihadikagu totona;  
dağedağe taudia ese egu mauri iabi-ohona e  
tahuamu,  
idia lalodia ai na Dirava asie hanohoamu.  
(Selah)

**4** A itaia, Dirava na lau ikahagu,  
Gaubada na egu mauri imudana.

**5** Lau inaigu na dava dikana baine henidia;  
emu momokani ai ba habuadia tari.

**6** Egū lalo-namo ai egū boubou ġauna baina hahe-  
laġaia oiemu;  
Iehova e, oi ladamu baina hanamo,  
badina be ia na namo.

**7** Badina be oi ese hekwawanai iboudiai lalodia  
amo vada o harohogu mauri;  
inaigu na egu kwalimu ai na itadia nenenen-  
emu.

## 55

**1** Dirava e, egu guriġuri a kamonai,

- egu noinoi na basio dadaraia.
- <sup>2</sup> A hakala henigu, a haere henigu;  
    egu hisihisi ese vada e hadareregu.
- <sup>3</sup> Inai tauna gadona ese vada e hadaradaragu,  
    kara dika taudia edia dağedağe karadia  
        daidiae;  
badina be idia ese e hahekawkwanaigumu,  
    bona edia badu ai e inai henigumu.
- <sup>4</sup> Lalogu na e hisihisi badamu;  
    mase ena hahegari na latagu ai vada e kau.
- <sup>5</sup> Gari bona kudou-hetaha ese e butugu taomu,  
    laumagu na e dauremu.
- <sup>6</sup> Na tomu “Bema mai hanigu, pune na heto,  
    bena bama roho lao, bama laga ani;
- <sup>7</sup> oibe, dauha bama lao,  
    tano ġaġaena ai bama noho; (Selah)
- <sup>8</sup> bama lao haraġa, hemetai gabuna bama tħaua,  
    lai bona medu ilao-ahudia”.
- <sup>9</sup> Ĝaubada e, edia lalo-hadai ba hadikadia,  
    gadodia ba haheġonudia;  
badina be haheala bona heatu na  
    hanua ai na itamu.
- <sup>10</sup> Dina ai bona hanuaboi ai maġuna e rakaia  
    heġeġemu,  
    hedibaġani bona hekwarahi na ia lalonai e  
        miamu,  
    hahebua-tari na ia bogaraginai;
- <sup>11</sup> dağedağe bona koikoi karadia na  
    ena ariara ai asie dokomu.
- <sup>12</sup> E kirikirilaigumu tauna na dia inai tauna,  
    bema unuheto, bama haheauka;

e ihi-ihiraigumu tauna na dia inai tauna,  
bema unuheto, iena amo bama komu.

<sup>13</sup> A tauna na oi, lau idaigu,  
lau bamogu, lau turagu korikori.

<sup>14</sup> Ta hereva-herevava mai moaleda ida,  
ta raka hebouva Dirava ena rumai ai.

<sup>15</sup> Mase na ediai baine kau,  
mauridia ai mase gabuna ai bae diho,  
mai garidia ida edia guri ai bae diho,  
be namo.

<sup>16</sup> A lau be Dirava do baina boi henia;  
Iehova ese baine hamaurigu.

<sup>17</sup> Adorahi ai bona daba ai bona dina tubua ai  
na maumaumu bona na ġanaġanamu.

Ia ese lau gadogu baine kamonaia,

<sup>18</sup> ia ese lau laumagu baine hamauria;  
na tuarilaiamu tuarina amo baine hamaurigu,  
badina be hutuma ese e tuari henigumu.

<sup>19</sup> Dirava na baine hakala, baine tuidia,  
sene negana amo e nohomu Diravana;  
badina be taravatu asie badinaiamu,  
bona Dirava garina se garimu. (Selah)

<sup>20</sup> Bamogu ese imana e haroroa, ia turana ihadika-  
dia totona,  
ena gwauhamata e hadikaia.

<sup>21</sup> Ena hereva na manada-manada, bata ena  
manada-manada e hereaia,  
a tuari be ia lalona ai.

Ena hereva na manoka-manoka, dehoro ena  
manoka-manoka e hereaia,  
a idia na e veri lasi daredia.

<sup>22</sup> Emu maduna na Iehova enai ba taho a kau,  
ia ese baine abimu isi;

ia ese kara maoromaoro taudia baine gimadia,  
idia na basie marere-marere.

<sup>23</sup> Dirava e, oi ese ba tahodia dobi,  
henu herea gurina lalonai;  
rara ihahebubuna bona koikoi karadia ikaradia  
taudia na  
edia mauri kahana basie haḡuḡurua.  
A lau ese oi baina abidadama henimu.

## 56

- <sup>1</sup> Dirava e, ame bogagu hisi,  
badina be taunimanima ese e moigu taomu,  
dina idoinai tuari taudia ese e daḡedäge  
henigumu.
- <sup>2</sup> Inaigu na dina idoinai e moigu taomu,  
hutuma ese e tuari henigumu mai heağidia  
ida.
- <sup>3</sup> Lau na garimu negadia ai na  
oi mo na abidadama henimumu.
- <sup>4</sup> Ena hereva na imodaiamu Diravana,  
Dirava mo na abidadama heniamu, asi egu  
gari;  
hidio na ede baine karagu toma?
- <sup>5</sup> Dina idoinai idia ese egu hereva e hagagevadi-  
amu,  
edia lalo-hadai iboudiai na lau ihadikagu mo  
e laloamu.
- <sup>6</sup> Idia na e heboumu, e bani taomu,  
egu raka marere e itaia taomu.  
Egu mauri iabi-ohona totona vada e narigu  
heğereğerena,
- <sup>7</sup> edia kara dika davana unu ba henidia toma.  
Dirava e, bese idau-idau taudia na

mai badumu ida ba tahodia dobi.

<sup>8</sup> Egu loa eva-eva vada o hagaudia,  
irurumatagu na emu kavabu ai ba udadia;  
emu buka ai e miamu, ani?

<sup>9</sup> Bainā boiboi dinana ai,  
lau inaigu na ba haloudia.

Ina na dibagu, Dirava na lau ida:

<sup>10</sup> Dirava, ena hereva na imodaiamu Diravana;  
Iehova, ena hereva na imodaiamu Diravana.  
<sup>11</sup> Ia mo na abidadama heniamu, asi egu gari;  
taunimanima na ede bae karagu toma?

<sup>12</sup> Dirava e, egu gwauhamata emu ai na anidia do  
baina kara;  
egu hehenamo bouboudia na oi baina hen-  
imu.

<sup>13</sup> Badina be oi ese lau laumagu na mase amo vada  
o rauaia;  
oibe, aegu na hetutuhi amo vada o hamauria.  
Dirava vairanai baina raka totona,  
mauri diarina lalonai.

## 57

<sup>1</sup> Ame bogagu hisi, Dirava e, ame bogagu hisi.  
Badina be oi lalomu ai lau laumagu e ko-  
mumu;  
oi hanimu ikerukerudia na egu hemetai  
gabuna,  
ela bona hahebua-tari baine ore.

<sup>2</sup> Dirava Herea Mikamika na tai heniamu,  
egu ai ena ura e haḡuḡuruamu Diravana.

<sup>3</sup> Ia na guba amo ena hesiai baine siaia, baine  
hamaurigu;

e moigu taomu taudia ia ese baine hahe-maraidia. (Selah)  
 Dirava ese ena hebogahisi bona ena momokani baine siai lasi.

<sup>4</sup> Leona bogaragidiai na hekuremu,  
 taunimanima natudia e anidia lava daemu  
 ġaudia;  
 isedia na io bona diba,  
 bona maladia na dare ganoka-ganokadia.

<sup>5</sup> Dirava e, guba doriva-dorivana ai bae  
 imodaimu,  
 oi hairaimu na tanobada idoinai daenai baine  
 mia.

<sup>6</sup> Idia na huo e otoa, lau aegu ihatoadia;  
 laumagu na e igo diho.  
 Idia na egu dala ai guri e ġeia,  
 a ġau be idia sibodia na lalonai e moru dobi.  
 (Selah)

<sup>7</sup> Lau lalogu na auka;  
 Dirava e, lau lalogu na auka.  
 Ane baina abia, hahenamo anedia baina abi;  
<sup>8</sup> laumagu e, a nogá.  
 Gitara bona hatai-hatai ġauna maragina, a nogá;  
 lau na daba matana ai baina nogá.

<sup>9</sup> Ġaubada e, lau oi baina hanamomu,  
 bese idau-idau bogaragidiai;  
 oi ihanamolaimu anedia baina abi,  
 oreo idau-idau bogaragidiai.

<sup>10</sup> Badina be emu hebogahisi na bada ela bona  
 guba,  
 emu momokani na bada ela bona ori.

11 Dirava e, guba doriva-dorivana ai bae imodaimu, oi hairaimu na tanobada idoinai daenai baine mia.

## 58

<sup>1</sup> Lohiamui e, emui hahemaoro herevadia na maoromaoro eiava?

Taunimanima o hahemaoro henidiamu mai maoromaoromui ida a?

<sup>2</sup> Lasi, lalomui ai kara kerere-kereredia o haeromu; imamui na dağedağe karadia e karamu tanobada ai.

<sup>3</sup> Kara dika taudia na dounu sinadia bogadia lalodai e nohova negadia amo vada e raka muri matama, edia vara dinadia amo vada e kerere, koikoi herevadia e gwauraimu.

<sup>4</sup> Idia na mai edia mase muramurana, gaigai ena mase muramurana na heto, taia kudima gaigaina na heto.

Ia na taiana e kouamu,

<sup>5</sup> mea tauna gadona basine kamonai totona, babalau tauna mai aonegana gadona basine kamonai helaooreana.

<sup>6</sup> Dirava e, isedia ba hakwaidudia ududia ai, Iehova e, leona natudia gadigadidia ba ragadia lasi.

<sup>7</sup> E aru ohomu ranuna na heto bae puki; rei na heto bae moidia tao, bena bae marai.

<sup>8</sup> Bisisi na kwari ai e hepunimu na heto bae boio,

e vara dika merona hegereggerena, dina nega  
hata se itaia.

<sup>9</sup> Ava giniñini, mauridia eiava kakorodia, siahudia  
na emui uro ese do se abi negana ai,  
ia ese baine petadia oho.

<sup>10</sup> Kara maoromaoro tauna baine moale,  
dava ihenina baine itaia negana ai;  
kara dika tauna rarana ai  
ia aena baine huridia.

<sup>11</sup> Bena taunimanima baeto:  
Momokani, kara maoromaoro na mai da-  
vana;  
momokani, tanobada ihahemaoro-henina Di-  
ravana na e nohomu.

## 59

<sup>1</sup> Egu Dirava e, inaigu edia amo ba hamaurigu,  
e tuari henigumu taudia edia amo ba gimagu;

<sup>2</sup> kara dika taudia edia amo ba hamaurigu,  
rara ihebubuna e uramu taudia edia amo ba  
harohogu mauri.

<sup>3</sup> A itaia, egu mauri iabi-ohona totona e bani  
henigumu;  
dağedağe taudia na lau ihadikagu totona e  
heboumu.

<sup>4</sup> Iehova e, dia lauegu kara dika eiava lauegu kara  
havara daidiae,  
eiava dia lauegu kerere dainai,  
idia ese e heaumu bona e hegægæemu.

A noga, ikahagu aoma, a itaia!

<sup>5</sup> Iehova Sabaota, oi na Israel edia Dirava.  
A noga, bese iboudiai matadia ba hakanidia,

kara dika e haero hehunimu taudia ta basio  
bogaia hisi. (Selah)

<sup>6</sup> Adorahi iboudiai idia na e lou maimu,  
sisia na hehetu e ġoumu,  
hanua lalonai e igo Ioamu.

<sup>7</sup> Ĝaudia bunu, ududia amo e lolomu,  
bibinadia amo e ġigimu.

Badina be idia na e tomamu  
“Daika ese baine kamonai?”

<sup>8</sup> Iehova e, oi ese o kirikirilaidiamu,  
bese iboudiai oi ese o kirikirilaidiamu.

<sup>9</sup> Egu Goada e, oi ihanamolaimu anedia baina abi,  
badina be, Dirava e, oi na egu kohoro.

<sup>10</sup> Egu Dirava na ena hebogahisi ai baine hedavari  
henigu,  
egu Dirava ese egu dala baine kehoa,  
inaigu edia darere do baina itaia.

<sup>11</sup> Basio aladia mase, egu oreia taudia bae helalo  
boio na garina,  
emu siahу amo ba hahekwanaidia bona  
ba haketodia,  
Ĝaubada e, emai kesi.

<sup>12</sup> Uduidia edia dika, bibinadia edia hereva, daidiae  
edia heaġi ai bae hedoa.

Heuduguirai bona koikoi herevadia vada e gwau-  
rai daidiae,

<sup>13</sup> badu ai ba ha-oredia,  
ba ha-oredia ela bona bae boio vaitani.

Unu amo taunimanima bae diba Dirava ese Iakob  
e lohiaiamu  
ela bona tanobada dokona.

<sup>14</sup> Adorahi iboudiai idia na e lou maimu,

sisia na heheto e ġoumu,  
hanua lalonai e igo loamu.

<sup>15</sup> Aniani itahuna e loa eva-evamu,  
bona bogadia asie kumumu negadia ai e  
ġigimu.

<sup>16</sup> A lau na oiemu goada baina anelaia,  
daba ai emu hebogahisi baina anelaia bada;  
badina be oi na egu kohoro,  
bona egu roho-mauri gabuna, egu hisihisi  
dinana ai.

<sup>17</sup> Egu Goada e, oi ihanamolaimu anedia baina abi,  
badina be, Dirava e, oi na egu kohoro;  
e bogagu hisimu Diravana.

## 60

<sup>1</sup> Dirava e, oi ese vada o dadaraimai, vada o hadar-  
eremai,  
vada o badu; mani emu kara bavabimai dae  
lou.

<sup>2</sup> Oi ese tano vada o haheude-heudea, vada o  
hapararaia;  
ba haginia lou, badina be e marere-  
mareremu.

<sup>3</sup> Kara aukadia amo emu bese taudia vada o hahi-  
sidia;  
vine ranuna vada o henimai, vada a inua,  
vada a keker.

<sup>4</sup> Pepe vada o veria dae, e gari henimumu taudia  
edia,  
ienai bae hahegoada hebou, peva bae heauta-  
nia negana ai; (Selah)

<sup>5</sup> unu amo emu lalokau taudia na bae roho  
mauri.

Imamu idibana amo kwalimu ba henimai,

bona ba haere henimai.

- <sup>6</sup> Dirava na ena gabu helāgana ai vada e hereva,  
eto,  
Mai moalegu ida Sekem baina hapararaia,  
bona Sukoto kourana baina haria.
- <sup>7</sup> Gilead na lauegu; Manase na lauegu;  
Efraim na egu kwara ġauna;  
Iuda na egu dagi auna.
- <sup>8</sup> Moab na imagu ihuridia dihuna;  
Edom Iatanai egu tamaka na tahoa kaum;  
Filistia daenai na heaġimu, na lolomu.
- <sup>9</sup> Daika ese hanua mai maġuna lalonai baine  
hakaugu vareai?  
Daika ese Edom baine haka-lgu lao?
- <sup>10</sup> Dirava e, vada o dadaraimai ani?  
Dirava e, emai tuari oreadia ida so raka  
lasimu.
- <sup>11</sup> Ame kahamai, inaimai ituari-henidia ai;  
badina be taunimanima edia hekaha na asi  
anina.
- <sup>12</sup> Dirava ida baita goada balaheni;  
ia ese ita inaida baine moidia tao.

## 61

- <sup>1</sup> Dirava e, egu taitai a kamonai,  
egu ġuriġuri bavabia dae;
- <sup>2</sup> lau kudougu e hetahamu negana ai na  
tanobada dokona amo baina boi henimu.
- Mani a hakaugu lao,  
baine hagagu tao nadina enai;
- <sup>3</sup> badina be egu roho mauri gabuna na oiemu ai,  
egu kohoro na oi, inai taudia ilao-ahudia.

- <sup>4</sup> Emu kalaga ai baina noho hanaihanai,  
    oi hanimu ikerukerudia ai baina mauri. (Selah)
- <sup>5</sup> Badina be, Dirava e, oi ese egu gwauhamata vada  
    o kamonai  
    oi ese oi ladamu e matauriamu taudia ahu-  
        dia vada o henigu.
- <sup>6</sup> Hanua pavapavana ena mauri ba hadaudaua,  
    ena mauri lağanidia bae hesiriu ela bona uru  
        iboudiai,  
<sup>7</sup> ena terono ai baine helai hanaihanai, Dirava  
        vairanai;  
lalokau bona momokani amo ba reğua.
- <sup>8</sup> Taunabunai ląu ese oi ladamu baina hanamoa  
    egu ane ai;  
dina ta ta amo egu gwauhamata anidia baina  
    kara.

## 62

- <sup>1</sup> Lau laumagu ese Dirava mo e nariamu, asi  
    reğereğegu;  
    ihamaurigu na iena amo e maimu.
- <sup>2</sup> Ia mo sibona na egu nadi-gini bona egu hahe-  
    mauri,  
    egu kohoro; lau na basina marere-marere.
- <sup>3</sup> Iboumui ai ese tau tamona bavala-ala henia ela  
    bona edena nega ai?  
    e gini sehemu mağuna eiava e marere-  
        marereremu arana na heto?
- <sup>4</sup> Edia lalo-hadai tamona be ena dagi amo bae  
    doria dobi;  
    hereva koikoidia e moalelaimu;

ududia amo hahenamo herevadia e gwauraimu,  
a lalodia ai e heuduguirai. (Selah)

- 5 Lau laumagu ese Dirava mo e nariamu, asi  
reğereğegu;  
badina be egu helaro na ienai.
- 6 Ia mo sibona na egu nadi-gini bona egu hahe-  
mauri,  
egu kohoro; lau na basina marere.
- 7 Egu mauri bona ihamomokanigu na Dirava enai;  
egu nadi-gini badana na Dirava,  
egu roho-mauri gabuna na Dirava.
- 8 Taunimanima e, nega iboudiai ia bavabidadama  
henia;  
lalomui anidia na ia vairanai ba hahedinarai;  
eda roho-mauri gabuna na Dirava enai. (Se-  
lah)
- 9 Dagi maraḡi taudia na hahodi ta na heto;  
dagi bada taudia na asi anidia;  
metau hahetoho ġauna ai e haraḡamu,  
metaudia idoinai na maraḡi,  
hahodi tamona metauna ida asie heḡereḡere.
- 10 Dadidadi karadia basio abidadama henidia,  
henao karadia basio larodia kava;  
emui taḡa bema bada, basio lalokau henia.
- 11 Nega hata Dirava vada e hereva,  
nega harua ini vada o kamonai toma:  
siahu na Dirava ena.
- 12 Ġaubada e, hebogahisi na oi mo emu;  
badina be taunimanima ta ta ena ġaukara ena  
ġaukara heḡereḡeredia,  
davadia o henidiamu.

## 63

- <sup>1</sup> Dirava e, oi na lauegu Dirava, lau oi na tahu-mumu,  
     lau laumagu e ranu masemu oiemu ai;  
 lau hidiogu na e manorimu oiemu ai,  
     tano kaukauna ai, tano gaāena ai,  
     asi ranuna tanona ai, na heto.
- <sup>2</sup> Taunabunai, lau ese vada na raraimu, gabu  
     helaāana ai,  
     oi siahumu bona hairaimu vada na itadia;
- <sup>3</sup> badina be emu hebogahisi ese mauri e herea-  
     iamu,  
     una dainai lau bibinagu ese bae imodaimu.
- <sup>4</sup> Taunabunai, egu mauri dinadia iboudiai baina  
     hanamomu,  
     imagu baina dudui isi, oi ladamu baina ha-  
     hanea.
- <sup>5-6</sup> Egu geda ai oi na lalomu negadia ai,  
 hanuaboi lalonai oi na haeromu negadia ai,  
     laumagu be bogagu na turia harana bona  
     digara amo bema kunu na heto;  
 lau udugu ese e hanamomumu, mai bibina moale-  
     dia ida;
- <sup>7</sup> badina be oi ese vada o kahagu,  
     oi hanimu ikerukerudia ai moale anedia na  
     abimu.
- <sup>8</sup> Lau laumagu na oiemu ai e taomu;  
     oi imamu idibana na egu imuda.
- <sup>9</sup> A egu mauri iabi-ohona e tahuamu taudia na  
     tanobada ena dobu gabudia ai bae diho.
- <sup>10</sup> Dare ese bae aladia;  
     uda sisiadia ese bae daredia.

**11** A hanua pavapavana ese Dirava baine moale-lai;  
ia ladana ai e gwau hamatamu taudia na hairaina bae abia,  
badina be koikoi taudia ududia na bae dai ahu.

## 64

- 1** Dirava e, egu taitai ai lau gadogu ba kamonai;  
egu mauri na inaigu igari-henidia amo ba rauaia.
- 2** Kara dika taudia edia lalohadai dikadia hehunidia amo ba hunigu,  
kara havara taudia edia ura dikadia amo ba hunigu.
- 3** Idia na maladia e segediamu dare na heheto,  
edia hereva iditadia e kinodiamu, diba na heheto;
- 4** e bani taomu, asi ena kerere tauna e tarakiamu,  
e tarakia takumu, asie garimu.
- 5** Edia ura dikadia na e dogodia taomu;  
idoa iato-hehunidia na e herevalaimu.  
E tomu “Daika ese baine itada diba?”  
**6** Daika ese eda kara dika baine tahudia diba?  
Eda ura dalana vada ta haeroa mai aonegada ida”.  
Badina be taunimanima lalona na dobu,  
ena lalo-hadai danu dobu.
- 7** A Dirava ese ena diba amo baine tarakidia;  
idia na bae bero haraā-haraā.
- 8** Badina be idia sibodia maladia daidiai ia ese edia  
dika do baine havaraia;  
bae itadia taudia iboudiai na kwaradia bae taiko-taiko.
- 9** Bena taunimanima iboudiai bae gari,

Dirava ena kara bae herevalaia,  
bona ena āgaukara bae haeroa.

<sup>10</sup> Kara maoromaoro taudia ese Iehova bae moale-laiia,  
ienai bae roho mauri;  
lalo-maoromaoro taudia iboudiai ese ia bae imodaia.

## 65

<sup>1</sup> Dirava e, Siona ai bae imodaimu;  
bona gwauhamata anidia na oi bae henimu.

<sup>2</sup> Ģuriġuri ikamonnaia Diravana e,  
taunimanima iboudiai na bae vasi,  
<sup>3</sup> kara dikā daidiae

Emai kara dikā ese e hadarereremaimu negadia ai na  
oi ese o gwaudia taomu.

<sup>4</sup> Emu maġu ai baine noho totona o abia hidimu  
bona o hakaua kahimu tauna be namo;  
emu ruma ena namo ai ese baia moalelaia,  
emu dubu helaġana bunai.

<sup>5</sup> Ai ihamaurimai Diravana e,  
hahegari karadia amo o haere henimaimu  
bona o hamaurimaimu;  
oi na tanobada dokodia iboudiai edia helaro,  
bona davara daudau-hereadiea edia danu.

<sup>6</sup> Oi ese emu goada amo ororo o hadaidia,  
oi na siahu o hariolaiamu;

<sup>7</sup> oi na davara reġedia o gwaudia taomu,  
edia hurehure reġedia bona taunimanima  
edia heloġo-heloġo danu.

<sup>8</sup> Taunabunai tanobada hetoadia daudau-  
hereadiea ai e nohomu taudia ese

- oiemu toa e gari henidiamu;  
 oi ese dina dae tanodia bona dina diho tanodia o  
     hamoalediamu.  
     bena e moale hisi daemu.
- <sup>9</sup> Tanobada o vadivadi heniamu, o haparipari-  
     amu,  
     uma tanodia o hanamodiamu;  
 Dirava ena sinavai na ranu ai e honumu,  
     uma anidia o henidiamu,  
     vada o hahēgaēgaedia tanodia lalodai.
- <sup>10</sup> E ruadia tanodia o hapariparidia badamu,  
     tano latalatadia o hataoradiam,  
 medumedu amo o hamanokadiam,  
     lalodai e tubumu āaudia o hanamodiamu.
- <sup>11</sup> Emu herahia ese lāgani ihanamona e  
     hāgūguruamu,  
     aemu gabudia amo digara e dihomu,
- <sup>12</sup> tano āāgena reidia ai e dihomu,  
     ororo ese edia moale e rioamu.
- <sup>13</sup> Rei gabudia ese mamoe seridia na e hadabuadi-  
     amu,  
     koura ese uit e hadokiamu,  
     ane e abimu, e moale hisi daemu.

## 66

- <sup>1</sup> Tanobada idoinai, Dirava ba hisi dae henia;  
     <sup>2</sup> ia ladana hairaina anedia bavabi,  
     ba imodaia badabada.
- <sup>3</sup> Dirava ba hanamo, baoto:  
     Emu kara na hahegari karadia.  
     emu siahu na bada herea,  
     oi inaimu na vairamu ai e gari igo dihomu.
- <sup>4</sup> Tanobada idoinai ese oi e toma henimu dihomu,  
     oi ihanamolaimu anedia e abimu,

- oi ladamu iheatolaina anedia.
- <sup>5</sup> Aoma, Dirava ena kara ba itaia;  
ena kara taunimanima bogaragidiai na hahe-gari karadia.
- <sup>6</sup> Davara na tano kaukauna ai e halaoa,  
taunimanima na aedia amo sinavai e rakaia hanai,  
unuseni ai ia ta moalelaiava.
- <sup>7</sup> lena siahu amo e lohia hanaihanaiamu,  
ia matana ese bese idau-idau e nenediamu;  
gwau-hemuri taudia na sibodia basie heāgi.  
(Selah)
- <sup>8</sup> Bese idau-idau e, emui Dirava ba hanamoia,  
ia iheatolaina reğedia bae dae.
- <sup>9</sup> Ia ese mauri ai vada e dogomai tao,  
aemai vada e naridia dainai asie dedi.
- <sup>10</sup> Badina be, Dirava e, oi ese vada o tohomai;  
*silver* e tohoamu na heto vada o tohomai.
- <sup>11</sup> Huo ai vada o abimai,  
koekoemai vada o hahisidia.
- <sup>12</sup> Edia hosi aedia amo e moimai tao taudia na so rudia;  
lahi amo a raka hanai, bona ranu amo danu.  
A oi ese gabu namona ai vada o hakaumai lasi.
- <sup>13</sup> Lau be ġole-oho bouboudia na emu dubu ai baina rakalai vareai,  
egu gwauhamata anidia na oiemu ai baina kara,
- <sup>14</sup> hisi na ani negana ai bibinagu ese e gwauraia heğereğerena,  
udugu ese e gwauraia hamata na heto.
- <sup>15</sup> Ubu-ubu ġaudia baina hahelağadia, emu ġole-oho bouboudia ġaudia,

bona mamoe mamaruanedia iōole-ohodia  
 kwalahuna danu;  
 boromakau mamaruanedia bona nani danu  
 ba hahelaōadua oiemu. (Selah)

- <sup>16</sup> Dirava garina o garimu taumui iboumui ai,  
 aoma, ba kamonai.  
 Ia ese ede vada e karagu toma na  
 baina gwauraia hedinarai.
- <sup>17</sup> Lau ese ia na boi henia,  
 lau malagu ese ia e imodaia.
- <sup>18</sup> Lalo-hadai dikadia na lalogu ai bema mia,  
 ēgaubada ese basinema kamonai henigu.
- <sup>19</sup> A momokani Dirava ese vada e kamonai,  
 ia ese egu noinoi herevadia vada e abi dae.
- <sup>20</sup> Dirava aina hanamoia,  
 badina be egu īuriāguri se dadaraia,  
 ena hebogahisi egu amo na se abia oho.

## 67

- <sup>1</sup> Dirava baine bogada hisi, baine hanamoda,  
 ia vairana diarina baine henida. (Selah)
- <sup>2</sup> Tanobada ai oiemu dala bae diba totona;  
 bona emu hahemauri siahuna bese iboudiai  
 bogaragidiae danu.
- <sup>3</sup> Dirava e, bese idau-idau bae hanamomu,  
 bese iboudiae bae imodaimu.
- <sup>4</sup> Bese idau-idau bae moale, moale anedia bae abi,  
 badina be tanobada taudia o hahemaoro  
 henidiamu mai maoromaoromu ida,  
 bona tanobada besedia o hakaudiamu.
- <sup>5</sup> Dirava e, bese idau-idau bae hanamomu,  
 bese iboudiae bae imodaimu.

- 6** Tano anina vada e vara ġoevaġoева;  
Dirava, iseda Dirava, ese vada e hanamoda.
- 7** Dirava vada e hanamoda;  
bona tanobada dokodia iboudiai ese ia garina  
bae gari.

## 68

- 1** Dirava baine tore isi, ia inaina baine hakarohoodia rohoroho;  
e inai heniamu taudia na ia vairanai bae heau.
- 2** Lai ese kwalahu e odaia ohomu heġereġerena  
unu bae odadia oho toma;  
*Wax* na lahi badibadinai e vevemu na heto,  
kara dika taudia na unu bae mase toma,  
Dirava vairanai.
- 3** A kara maoromaoro taudia na bae moale;  
Dirava vairanai bae hisi dae,  
moale ai bae honu honu dae.
- 4** Ane avabia, Dirava ena, ia ladana ba hanamoa  
emu ane ai;  
ane ba ladaia isi, ori ai e guimu Diravana ena;  
ia ladana na Iehova,  
ia vairanai ba hisi dae.
- 5** Dirava na ihareha tamadia bona vabu igimadia,  
ena noho gabuna helaġana ai.
- 6** Dirava ese noho-edea taudia edia iduhu e henidiamu,  
iġui taudia e hakaudia lasimu, e hataġadiamu;  
a gwau-emuri taudia na tano kaukauna ai e  
nohomu.
- 7** Dirava e, emu oreia taudia vairadai o raka lasi

bona tano gagaena o rakaia hanai negana ai,  
 (Selah)

<sup>8</sup>tano e laga bona guba medudia e diho badabada,  
 Dirava vairanai.

Sinai ororona bunai, Dirava vairanai e heude-  
 heude,

Israel Diravana vairanai.

<sup>9</sup>Dirava e, medu o hadihoa badabada;  
 emu tano e kaukauva negana ai o hapari-  
 paria;

<sup>10</sup>emu seri na ia lalonai edia noho gabuna e  
 davarria.

Dirava e, emu kara namo bagunai ogogami taudia  
 adia o henidia.

<sup>11</sup> Ĝaubada ese ena hahedua herevana e gwaura-  
 iamu

hutuma bada ese e piuamu;

<sup>12</sup> tuari oreadia pavapavadia e heaumu, e  
 heaumu.

Ruma ai e nohomu hahinedia ese tuari ai e dadi  
 kohudia e haridiamu,

<sup>13</sup> mamoe edia mağu ai e nohomu hahinedia  
 ese.

Pune hanina na *silver* amo e hegova,  
 hanina huidia na *gold* gadoka-gadokana amo  
 e hegova.

<sup>14</sup> Siahu-idoinai Diravana ese hanua pavapavadia  
 na Salmon ai e hakarohodia negana ai,  
*snow* na unuseni ai e diho.

<sup>15</sup> Ororo badana e, Basan ororona!

Dorina momo ororona e, Basan ororona!

<sup>16</sup> Dorina momo ororona e,  
 dahaka o hamuemus?

Dirava e uramu baine noholaia ororona,  
 Oibe, Iehova baine noholaia hanaihanai ororona,  
 dahaka hamuena o karaiamu?

**17** Ģaubada na Sinai amo gabu helaġana ema,  
 mai kariota aukadia gerebu rua ida,  
 oibe, mai kariota daha daha ida.

**18** Oi na ororo ġaulatalatana ai o dara dae,  
 iġui taudia na murimu ai o hakaudia dara.  
 Herahia ġaudia na taunimanima edia amo o abi,  
 oibe, gwau-hemuri taudia edia amo danu,  
 Ģaubada Iehova unuseni ai baine noho na totona.

**19** Ģaubada aita hanamo!

Ia ese dina iboudiai e abida isimu;  
 Dirava na eda mauri. (Selah)

**20** Eda Dirava na hahemauri Diravana;  
 Ģaubada Dirava ese mase amo e harohoda  
 maurimu.

**21** A Dirava ese ia inaina kwaradia baine huaridia,  
 ena kara havara ai e rakamu tauna na  
 tubuana mai huina baine huaria.

**22** Ģaubada eto:  
 Basan amo baina loulaidia,  
 davara dobuna gabudia amo baina loulaidia,  
**23** aemui na rara ai ba hadigudia totona,  
 bona emui sisia maladia na inaimui raradia  
 bae demaria totona.

**24** Dirava e, mai hairaimu ida o raka hanaimu,  
 egu Dirava, egu Pavapava, na gabu helaġana  
 ai e raka vareaimu,  
 mai hairaina ida.

**25** Ane e abimu taudia na vairai e rakamu,

hatai-hatai ġaudia e hataimu taudia na muri  
 ai,  
 bogaragi ai na ulato ese edia tareko e  
 hareğemu.

<sup>26</sup> Hebou badana ai Dirava ba hanamoa,  
 Israel ena ranu-lohilohi gabuna amo o maimu  
 taumui,  
 Ğaubada ba hanamoa.

<sup>27</sup> Beniamina, tau muritai, na vairai;  
 Iuda lohiadia na mai edia orea ida,  
 Sebulun lohiadia bona Napatali lohiadia  
 danu unuseni ai.

<sup>28</sup> Dirava e, siahumu avabia,  
 Dirava e, goadamu ba hahedinaraia,  
 emu siahu karadia vada o kara, ai daimai ai.

<sup>29</sup> Emu Dubu Helaġa Ierusalem ai dainai,  
 pavapava ese edia herahia e mailaimu emu.

<sup>30</sup> Siriho ai e nohomu boromadia ba gwau henidia,  
 boromakau mamaruanedia seridia bona  
 taunimanima edia boromakau natudia ba  
 gwau henidia.

Heaiva kohuna iabina e uramu taudia ba moidia  
 tao,  
 tuari e moalelaiamu besedia ba hakarohodia.

<sup>31</sup> Auri labora-labora na Aigupto amo bae mailaia,  
 Etiopia ese mase mauri imana na Dirava  
 baine toi roro henia.

<sup>32</sup> Tanobada basileiadia, ane bavabi, Dirava ena;  
 hahenamo anedia bavabi, Ğaubada ena, (Se-  
 lah)

<sup>33</sup> nega gunana ai e miava gubana latanai e  
 guimu Diravana ena.

A kamonai, ia gadona e siaia lasimu,

ia gadona mai siahuna ida.

<sup>34</sup> Dirava ena siahu ba gwauraia,  
ia ese Israel e lohiaiamu,  
ia siahuna na guba ai,

<sup>35</sup> Dirava na mai garina, ena gabu helaġana ai,  
ia na Israel Diravana.

Ia ese siahu bona goada ena orea taudia e henidi-  
amu;  
Dirava aita hanamo.

## 69

<sup>1</sup> Dirava e, a harohogu mauri!

Badina be abata vada e dae ema bona aiogu.

<sup>2</sup> Kopukopu dobuna ai vada na hepuni,  
aegu na asi ihadaina gabuna.

Ranu dobudia ai vada na diho,  
abata ese e habubunigu.

<sup>3</sup> Lau vada na tai mase,  
gadogu eme haurahaura;  
matagu vada e valahu-valahu,  
egu Dirava inarina ai.

<sup>4</sup> Kwaragu huidia na gagadoi,  
asi badina e inai henigumu taudia na  
hutuma;

bae hamasegu e tomu taudia na gogoada,  
edia koikoi amo e hadikagumu taudia na  
gogoada.

Asina henaoa ġauna na  
harihari baine haloua a?

<sup>5</sup> Dirava e, egu kavakava be dibamu,  
egu kerere na oiemu amo se hehunimu.

<sup>6</sup> Ġaubada e, Iehova Sabaota e,

ba durugu, oi e laromumu taudia na basie  
hemarai lau daigu ai.

Israel Diravana e,  
ba durugu, oi e tahumumu taudia na basie  
hahemaraidia lau daigu ai.

<sup>7</sup> Badina be oi daimu ai haida ese vada e gwau  
henigu;  
oi daimu ai hemarai ese vairagu vada e ġovaia.

<sup>8</sup> Tadikakagu ediai idau tauna ai vada nala;  
sinagu natuna ediai idau bese tauna ai vada  
nala.

<sup>9</sup> Badina be emu rumu iura-henina ese vada e  
hamasegu,  
bona oi e gwau henimumu taudia edia  
gwaugwau na lau latagu ai vada e kau.

<sup>10</sup> Anivaga amo laumagu na hamanaua negana ai,  
una na ihahemaraigu ġauna ai ela;

<sup>11</sup> Guma dabuadia na dokilai negana ai,  
idia ese e ihi-ihiraigu.

<sup>12</sup> Hanua ikoukouna ai e helaimu taudia ese e  
herevalaigumu,  
kekero taudia ese edia ane ai e  
herevalaigumu.

<sup>13</sup> Iehova e, oi mo na hahanemu,  
Dirava e, nega namona ai na hahanemu;  
emu hebogahisi bada-herea amo  
ba haere henigu.

<sup>14</sup> Emu hekah momokanina amo ba harohogu  
mauri,  
kopukopu ai baina hepuni na garina;  
lau inaigu amo ba hamaurigu,  
bona ranu dobudia amo danu.

<sup>15</sup> Ba durugu, abata basine habubunigu,  
dibu gabudia basie hadonogu,  
mase gurina iduarana basine kougu ahu.

<sup>16</sup> Iehova e, a haere henigu,  
badina be emu lalokau na namo;  
emu hebogahisi bada-herea heğereğerena  
ba hağeregu.

<sup>17</sup> Vairamu na emu hesiai tauna ena amo basio  
hunia,  
badina be hisi ese e gugubagumu;  
a haere henigu harağā,  
<sup>18</sup> a raka kahira, ba hamaurigu,  
ba ruhagu nege, lau inaigu daidiai.

<sup>19</sup> Dibamu ede e gwau henigu tomamu,  
egu hemarai bona egu koikoi oi dibamu,  
inaigu iboudiai na oi dibamu.

<sup>20</sup> Laumagu e dauremu, gwaugwau herevadia  
daidiai  
daragu e dokomu.

Hebogahisi na tahua, to asi ġauna;  
tauhalo taudia na tahudia, to ta asina davaria.

<sup>21</sup> Mase muramurana e henigu, agu;  
ranu e masegu ai na vine ranuna iditana e  
henigu,  
baina inua.

<sup>22</sup> Sibodia edia dabara vairadiai na idoa ai bainela,  
edia aria helagadia na rikiriki ai baela ediai.

<sup>23</sup> Matadia bae valahu-valahu, basie ita;  
batubatudia na bae heude-heude loulou.

<sup>24</sup> Emu badu na latadiai ba seia dobi,  
emu badu ġarağarana ese baine lasidia tao.

- <sup>25</sup> Edia taruha baine vahu,  
edia kalaga ai tau ta basine noho.
- <sup>26</sup> Badina be oi ese vada o hahisia tauna na  
idia ese ma e dağedağe heniamu,  
bona oi ese vada o haberoa tauna na  
idia ese ma e hahisihisiamu.
- <sup>27</sup> Mata-hakani latanai mata-hakani ma bavatoa  
idia ediai;  
emu hahemaoro ai basio ruhadia nege.
- <sup>28</sup> Ladadia na mauri taudia edia buka amo bae  
heroho,  
ladadia na kara maoromaoro taudia ladadia  
ida basie hetore.
- <sup>29</sup> A lau be na ogoğamimu bona na hisihisimu:  
Dirava e, emu hahemauri ese atai ai baine  
atogu.
- <sup>30</sup> Lau ese Dirava ladana na egu ane ai baina  
heatolaia,  
egu hahenamo herevadia ai baina imodaia.
- <sup>31</sup> Ina kara na Iehova baine moalelaia bada,  
a boromakau baine moalelaia maraḡi,  
boromakau maruanena mai doana bona mai  
aena kahaudia ida baine moalelaia maraḡi.
- <sup>32</sup> Ogoğami taumui, ba itaia bona ba moale;  
Dirava o tahuamu taumui, lalomui bae mauri  
lou;
- <sup>33</sup> badina be Iehova ese e dabumu taudia na e ka-  
monai henidiamu, ena ore a taudia iğuidia ai  
e nohomu na se dadaraidiamu.
- <sup>34</sup> Guba bona tanobada ese bae imodaia,  
davara danu, bona lalonai e loamu ġaudia.
- <sup>35</sup> Badina be Dirava ese Siona baine hamauria,  
bona Iuda hanuadiah baine haginidia lou;

ienai hesiai taudia na unuseni ai bae noho,  
 bae abia edia gabu;  
<sup>36</sup> iena hesiai taudia natudia ese bae abia, idia  
 ahudia,  
 bona ia ladana e lalokau heniamu taudia ese  
 bae noholoia.

## 70

- <sup>1</sup> Dirava e, a harohogu mauri,  
 Iehova e, ba durugu haraḡa.  
<sup>2</sup> Lauegu mauri iabi-ohona dalana e tahuamu tau-  
 dia na  
 ba hahemaraidia bona ba haheḡonudia;  
 ihahisigu e uramu taudia na  
 ba haloudia bona ba hahemaraidia.  
<sup>3</sup> E gwau henigumu, e tomu “Aha, aha”, taudia na  
 edia hemarai dainai bae kudou hetaha.  
<sup>4</sup> E tahumunu taudia iboudiai na  
 bae moale, oi bae moalelaimu;  
 emu hahemauri e ura heniamu taudia na  
 bae hereva loulou, baeto “Dirava na herea-  
 dae”.  
<sup>5</sup> A lau be na ogoḡamimu bona na dabumu;  
 Dirava e, aoma haraḡa dekegu ai.  
 Oi na lau ikahagu bona lau ihamaurigu;  
 Iehova e, basio halahe.

## 71

- <sup>1</sup> Iehova e, oi mo na abidadama henimumu;  
 ba durugu, nega ta basie hahemaraigu.  
<sup>2</sup> Emu kara maoromaoro ai ba rauagu bona ba  
 hamaurigu;  
 ba hakala henigu, ba harohogu mauri.  
<sup>3</sup> Egu roho-mauri nadina ai baola,

egu kohoro aukana ai baola, ihamaurigu totona;  
badina be oi na egu nadi-gini bona egu kohoro.

<sup>4</sup> Egu Dirava e, kara dika tauna imana amo ba hamaurigu,  
kara gageva-gageva bona dağedağe tauna imana amo.

<sup>5</sup> Badina be, Ğaubada e, egu helaro na oi,  
Iehova e, tauhaugu negana amo egu abidadama na oi.

<sup>6</sup> Egu vara dinana amo oiemu ai vada na tabe kau;  
oi ese sinagu bogana amo o abigu.

Oi mo na umodaimu hanaihanaimu.

<sup>7</sup> Lau na toa ta, hutuma ediai;  
a oi na egu roho-mauri gabuna aukana.

<sup>8</sup> Lau udugu na oi ihanamomu ai e honumu,  
bona oi hairaimu ai danu, dina idoinai.

<sup>9</sup> Bainā buruka negana ai basio negegu daure,  
egu goada e oremu negana ai basio rakatanigu.

<sup>10</sup> Badina be inaigu ese e herevalaigumu,  
egu mauri iabi-ohona totona e bani taomu taudia na e henega boumu;

<sup>11</sup> e tomu: Dirava ese vada e rakatania;  
a havaia, ba dabaia tao,  
badina be asi ihamaurina tauna ta.

<sup>12</sup> Dirava e, dauhai basio noho  
egu Dirava e, a durugu harağa.

<sup>13</sup> Ihabadelaigu taudia na hemarai bona hahebua-tari ese bae abidia,

heihi-ihirai bona hedadarai ese bae ġovadiah  
ahu.

**14** A lau be baina helaro Ioulou,  
bona oi ihanamomu baina habadaia loulou.

**15** Udugu ese emu kara maoromaoro baine  
herevalai,  
emu hahemauri karadia baine gwaurai dina  
idoinai,  
badina be iduahidia na asi dibagu.

**16** Ğaubada Iehova ena siahu karadia baina gwau-  
raidia,  
oiemu kara maoromaorodia baina  
imodaidia, oi mo sibomu emu.

**17** Dirava e, tauhaugu negana amo vada o  
hadibagu;  
emu hoa karadia doini na gwauraidiamu.

**18** Taunabunai, ena be baina iahu, huigu baine  
buruka,  
to, Dirava e, basio rakatanigu,  
ela bona oi siahumu baina gwauraia,  
do bae vara urudia iboudiai ediai.

**19** Dirava e, oi siahumu bona emu kara maoro-  
maoro na e dae e laomu.  
ela bona guba doriva-dorivana.

Oi ese kara siahudia vada o kara,  
Dirava e, daika na oi idaimu?

**20** Hisihisi dikadia momo amo vada o hahisigu,  
to vada ba hagoadagu lou;  
tanobada ena dobu gabudia amo  
ba hakaugu dae lou.

**21** Oi ese imatauraigu ba habadaia,  
bona taugu ma ba haloa lou.

- <sup>22</sup> Egu Dirava e, hatai-hatai ġauna amo danu baina hanamomu;  
 emu momokani baina hanamoa.  
 Israel ena Helaġa Diravana e,  
 gitara amo do baina hanamomu.
- <sup>23</sup> Oi ihanamolaimu anedia baina abi negadia ai,  
 bibinagu na bae lolo, moale dainai,  
 laumagu danu, oi ese o hamauria dainai.
- <sup>24</sup> Malagu danu oiemu hekaha maoromaorona  
 baine gwauraia,  
 dina idoinai;  
 badina be ihahisigu dalana e tahuava taudia na  
 vada e hahemaraidia bona vada e dadaraidia.

## 72

- <sup>1</sup> Dirava e, emu hahemaoro ġoева-daena na hanua pavapavana ba henia,  
 emu kara maoromaoro na hanua pavapavana natuna ba henia.
- <sup>2</sup> Ba durua, emu orea taudia baine hahemaoro henidia mai maoromaorona ida,  
 emu ogoġami taudia baine hahemaoro henidia ġoеваġoева.
- <sup>3</sup> Ororo badadia ese taunimanima edia maino bae havaraia,  
 ororo maraġidia ese taunimanima edia kara maoromaoro bae havara.
- <sup>4</sup> Ia na ogoġami taudia ediai baine tao;  
 e dabumu taudia na ia ese baine hamauridia,  
 e daġedäge henidiamu tauna na ia ese baine taoa tari.
- <sup>5</sup> Dina bona hua bae mia negadia iboudiai,  
 iena mauri danu do baine mia, uru iboudiai lalodiae.

- <sup>6</sup> Medu na e utua guna reina latanai e dihomu na heto,  
 medu maraḡidia na tanobada e haparipariamu na heto,  
 ia danu unu baine heto.
- <sup>7</sup> Ena dina iboudiai kara maoromaoro baine tubu,  
 maino danu baine bada, ela bona hua baine puki oho.
- <sup>8</sup> Davara ta amo ela bona davara ta, ia baine lohia;  
 sinavai badana ela bona tanobada dokodia danu.
- <sup>9</sup> Ia inaina na ia vairanai bae igo diho,  
 bae goru goru diho, kahu bae demari.
- <sup>10</sup> Tarasisi pavapavadia bona motumotu pava-pavadia ese  
 edia heaiva ġaudia bae mailai, ena.  
 Sieba bona Seba pavapavadia ese  
 herahia ġaudia bae mailai.
- <sup>11</sup> Pavapava iboudiai na ia vairanai bae goru diho;  
 bese iboudiai na ia isiaina bae lao heni.
- <sup>12</sup> Badina be e dabumu tauna e boiboimu negana  
 ai ia ese e hamauriamu,  
 ogoġami tauna bona asi iduruna tauna danu.
- <sup>13</sup> Ia ese manoka-manoka taudia bona ogoġami  
 taudia e bogadia hisimu  
 bona e dabumu taudia e hamauridiamu.
- <sup>14</sup> Daġedaġe bona ala-ala amo ia ese edia mauri e  
 rauadiamu,  
 raradia na ġau herea-daena ia vairanai.
- <sup>15</sup> Ena mauri baine daudau baine namo,  
 Sieba gold-na bae henia.  
 Ia dainai bae ġuriġuri hanaihanai,

- dina idoinai ia ihanamolaina bae noinoilaia.
- <sup>16</sup> Aniani reidia na tano ai bae vara momomomo,  
ororo doridia reidia bae helado,  
anidia bae vara Lebanon ai na heto.  
Hanua hanua lalodai taunimanima na bae  
hutuma,  
tano reidia na heheto.
- <sup>17</sup> Ia ladana baine mia hanaihanai,  
ia harina baine hesiriu,  
dina do baine mia heğereğerena.  
Ia dainai taunimanima ese namo bae davaria,  
bese iboudiai ese ia namona bae gwauraia.
- <sup>18</sup> Iehova, Israel Diravana, aita hanamo;  
ia sibona hoa karadia e karamu.
- <sup>19</sup> Ia ladana herea-daena baita imodaia hanai-  
hanai;  
ia hairaina ese tanobada idoinai baine ha-  
honua. Amen. Amen.
- <sup>20</sup> David Iese ena ġuriġuri iniseni ai e dokomu.

## 73

- <sup>1</sup> Momokani, Dirava ena kara na namo, Israel  
enai;  
lalo-ħoeva-ħoeva taudia ediai ena kara na  
namo.
- <sup>2</sup> A lau be aegu mokona e hetutuhi,  
egu raka ai mokona na dedi.
- <sup>3</sup> Badina be kara dikka taudia edia taġa na itaia  
negana ai,  
hekokoroku taudia na vaġeġe henidia.
- <sup>4</sup> Badina be idia na asi edia hisihisi,  
tau-anidia na a'auka-a'auka bona tonika-  
tonika.

- <sup>5</sup> Idia na asie hisihisimu, haida heğereğeredia,  
bona se gorereditamu, haida bamodia.
- <sup>6</sup> Taunabunai, hekokoroku na aiodia agevana,  
dağedağe ese e ġovadiamu, dabua na heto.
- <sup>7</sup> Matadia na digara ese e hagudu lasimu,  
kavakava na lalodia amo e hepurai dobimu.
- <sup>8</sup> Idia na hevaseha bona badu herevadia e gwau-  
raimu,  
atai gabudia amo dagedağe herevadia e  
gwauraimu.
- <sup>9</sup> Ududia reğedia na guba ai e daemu,  
maladia reğedia ese tanobada e hahonuamu.
- <sup>10</sup> Taunabunai, taunimanima e gini kerehaimu, e  
hanamodiamu,  
edai kerere ta asie davariamu.
- <sup>11</sup> Idia na e tomu “Dirava na ede baine diba toma  
a?  
Herea Mikamika na mai dibana a?”
- <sup>12</sup> A itaia, kara dika taudia bini;  
asie hekwarahimu, to edia tağā e bada e  
laomu.
- <sup>13</sup> Asi badina lalogu vada na hağoevaia,  
asi badina imagu na kerere amo vada na  
huridia;
- <sup>14</sup> badina be dina idoinai vada na hisihisi,  
daba iboudiai hisi na animu.
- <sup>15</sup> Bama toma “Unu baina hereva toma”,  
natumu na edia uru ai bama koidia.
- <sup>16</sup> To na haeroa ede baina dibaia toma negana ai,  
ita-itana egu ai na hekwarahi ġauna;
- <sup>17</sup> ela bona Dirava ena gabu helağana nala,  
bena edia doko daladia na diba.
- <sup>18</sup> Momokani, oi ese dedidedi gabudia ai o atodi-  
amu,

- o habuadia tarimu;
- <sup>19</sup> vada e hebua tari haraḡa-haraḡa,  
gari ese vada e butudia tao.
- <sup>20</sup> Idia na nihi na heto, e nogra tauna enai;  
o nogamu ai nihi ai o ita ġaudia o dadaraidi-amu.
- <sup>21</sup> Laumagu e hishisiva  
bona lalogu na e kodoava negana ai,
- <sup>22</sup> lau na kavakava bona mata-lahui,  
lau na boroma na heto, oi vairamu ai.
- <sup>23</sup> Ġau tamona, lau na hanaihanai oi ida,  
oi ese imagu idibana o dogoa taomu.
- <sup>24</sup> Emu sisiba amo o hakaugumu,  
gabe amo hairai ai bavabigu dae.
- <sup>25</sup> Guba ai daika baina davaria? Oi mo sibomu.  
Tanobada ai ġau ta asina ura heniamu, oi mo sibomu.
- <sup>26</sup> Hidiogu bona lalogu bae manoka,  
a Dirava na lau lalogu ena goada,  
bona lau ahugu ela bona hanaihanai.
- <sup>27</sup> A itaia, oiemu amo dauhai e nohomu taudia na  
bae mase;  
oiemu ai e koikoimu taudia na o hamasedi-amu.
- <sup>28</sup> A Dirava badibadinai na nohomu be namo;  
Ğaubada Iehova na egu roho-mauri gabuna ai  
vada na halaoa,  
emu kara iboudiai baina herevalaidia totona.

## 74

- <sup>1</sup> Dirava e, dahaka dainai o negemai daure hanai-hanaimu?

Badina be dahaka emu badu vada e siahu, o  
ubudiamu mamoedia latadai?

- <sup>2</sup> Emu oreia, idau nega ai o hoia, na ba laloa tao;  
oi ese o hamauria, emu bese korikori ai  
bainela totona;  
Siona ororona, vada o noholiaia gabuna, ba  
laloa tao.
- <sup>3</sup> Vada e hekohutani vaitani hanuana ba raka he-  
nia kahi;  
inai taudia ese gabu helāgana vada e habuaia  
tari.
- <sup>4</sup> Oi inaimu na emu gabu helāgana bogaraginai  
vada e ġou;  
sibodia edia toa vada e hagini, una gabu toana  
ai baela.
- <sup>5</sup> Atai iduarana ai perepere audia na ira amo e tara  
patapata;
- <sup>6</sup> au amo e koro ġaudia iboudiai na ira bona  
hama amo vada e hamakohidia.
- <sup>7</sup> Emu gabu helāgana vada e doua,  
oi ladamu e noholaiava gabuna vada e  
hamiroa tari ela bona tano.
- <sup>8</sup> Idia na e hereva heheni, eto “Aita hadareredia  
vaitani”;  
idia ese Dirava ena hebou gabudia iboudiai e  
doudia, tano idoinai.
- <sup>9</sup> Ai toamai na asia itadiamu,  
asi emai peroveta tauna ta,  
bogaragimai ai nega ena daudau idibana  
tauna ta lasi.
- <sup>10</sup> Dirava e, inai taudia bae kirikirilaimai ela bona  
edenia nega ai?  
inai tauna ese oi ladamu baine ihi-ihiraia  
hanaihanai a?

- 11 Dahaka dainai oi imamu o veria loumu?  
 Badina be dahaka oi imamu idibana na ke-memu dabuana ai o huniamu?
- 12 Ğau tamona, matamana negana amo Dirava na  
 egu Pavapava;  
 tanobada bogaraginai ia ese ena hahemauri  
 karadia e karamu.
- 13 Oi siahumu amo davara o hapararaia;  
 lakara-donodono kwaradia o huaridia.
- 14 Leviathan\* kwarana iboudiai o huaridia patapata,  
 tano ġaġena taudia o henidia, adia.
- 15 Tano o hapararaia, ranu baine lohilohi bona  
 baine aru totona;  
 e aru hanaihanaiva sinavaidia o hakororodia.
- 16 Dina na oiemu, hanuaboi danu oiemu,  
 diari o karaia, bona dina danu.
- 17 Tano hetoadia iboudiai oi ese o kara;  
 lahara negana o karaia, bona guitau danu.
- 18 Iehova e, inai taudia edia heihi-ihirai ba laloa  
 tao,  
 asie matauraimu taudia na oi ladamu e ihi-ihiraiamu danu.
- 19 Emu pune laumana na uda boromadia basio  
 henidia,  
 emu ogoġami taudia edia mauri na basio laloa  
 boio vaitani.
- 20 Emu gwauhamata ba laloa;

---

\* **74:14** Leviathan na uda ġauna badana ta, reana Sia na heto.  
 Heberu taudia na e laloa una ġau kwarana na momo.

badina be tano ena dibura gabudia na  
daḡedaḡe rumadia ai e honumu.

- <sup>21</sup> Vada e moidia tao taudia na basie hahe-maraidia;  
ogōgami taudia bona e dabumu taudia ese oi  
ladamu bae hanamoā.
- <sup>22</sup> Dirava e, a tore isi; emu hahemaoro na sibomu  
ba karaia;  
dina idoinai asie matauraimu taudia ese ede  
e kirikirilaimu toma na ba laloa tao.
- <sup>23</sup> Oi inaimu gurudia basio lalo boio;  
e inai henimumu taudia edia helōgo-helōgo  
reğena na e dae louloumu.

## 75

- <sup>1</sup> Dirava e, ai oi a hanamomumu, a imodaimumu;  
oi ladamu a hahaneamu, emu hoa karadia a  
gwauraidia hedinaraimu.
- <sup>2</sup> Na gwauraia guna negana baine kau,  
bena baina hahemaoro ġoevaġoева.
- <sup>3</sup> Tanobada mai inoho-henina taudia iboudiai ida  
e raragararagamu negana ai,  
lau ese na imudadiamu. (Selah)
- <sup>4</sup> Hekokoroku taudia na hamaorodiamu, na tomu  
“Basio hekokoroku”.
- Kara dika taudia na hamaorodiamu, na tomu  
“Doamui basio abi isi;
- <sup>5</sup> doamui basio dudui isi atai ai;  
basio hereva aio haboġe isi”.
- <sup>6</sup> Heabi-isi na dia dina-dae gabudia amo eiava  
dina-diho gabudia amo,  
bona dia tano ġaġena amo se maimu;

- <sup>7</sup> a Dirava ese hahemaoro e karaiamu,  
ta e atoa dihomu, ma ta e abia isimu.
- <sup>8</sup> Badina be kehere ta na Iehova imana ai,  
lalonai vine ranuna na kakakaka,  
e buloa namonamo ġauna;  
ia ese baine seia,  
bena tanobada ena kara dika taudia iboudiai  
ese bae inua ore.
- <sup>9</sup> A lau be baina moale hanaihanai,  
Iakob ena Dirava ihanamolaina anedia baina  
abi.
- <sup>10</sup> Kara dika taudia doadia iboudiai ia ese baine  
utu oho,  
a kara maoromaoro taudia doadia bae heabi  
isi.

## 76

- <sup>1</sup> Iuda ai idia dibadia Dirava,  
Israel ai ia ladana na bada.
- <sup>2</sup> Salem ai ena rumava vada e hadaia,  
Siona ai ena noho gabuna vada e haginia.
- <sup>3</sup> Unuseni ai diba kiama-kiamadia e hakwaidudia,  
kesi bona dare bona tuari ġaudia idau-idau  
danu. (Selah)
- <sup>4</sup> Oi na herea dae; oi hairaimu ese  
mia-hanaihanai ororodia hairaidia e hereadi-  
amu.
- <sup>5</sup> Goada taudia edia dadihai kohudia na edia amo  
ma e dadihai,  
mahuta ese e abidia;  
tuari taudia iboudiai na  
imadia edia goada vada e ore.
- <sup>6</sup> Iakob Diravana e, o gwau henidia negana ai  
hosí mai iguina tauna ida e habereredia.

- <sup>7</sup> A oi na mai igari-henimu;  
     emu badu baine ġaraġara negana ai,  
     daika ese oi vairamu ai baine gini diba?
- <sup>8</sup> Guba amo oi ese hahemaoro o gwauraia;  
     tanobada na e gari, bena se marere-marere.
- <sup>9</sup> Una negana ai Dirava e tore isi, hahemaoro  
     ihaginina totona,  
     tanobada ai hisi e animu taudia iboudiai  
     ihamauridia halaoreana. (Selah)
- <sup>10</sup> Momokani, taunimanima edia badu ese baine  
     hanamomu,  
     badu orena na oi ese ba haheriolaia.
- <sup>11</sup> Emu gwauhamata na Iehova, emui Dirava, ba  
     henia,  
     bona anidia danu ba kara.  
 E ginia heġegemu taudia iboudiai na herahia bae  
     mailai,  
     e gari heniamu Diravana ena.
- <sup>12</sup> Ia ese lohia laumadia e laodia ahumu,  
     bona tanobada pavapavadia e hagaridiamu.

## 77

- <sup>1</sup> Dirava na tai henia lolomu,  
     Dirava na tai henia goadagoadamu,  
     baine kamonai henigu halaoreana.
- <sup>2</sup> Egu hekwarahi dinana ai Ġaubada na tahuamu,  
     hanuaboi ai imagu na toia roromu, asina  
     hesikumu,  
     laumagu ese ihalolaina se ura heniamu.
- <sup>3</sup> Dirava na laloamu, bena na ġanaġanamu;  
     lalogu na hadaiamu, bena laumagu na e dau-  
     remu. (Selah)

- <sup>4</sup> Matagu kopidia o dogo taomu, basie kapu;  
     egu hekwarahi e badamu dainai basina  
     hereva dibamu.
- <sup>5</sup> Dina gunadia na haerodiamu,  
     vada e lao bubuni lağanidia na lalodia taomu.
- <sup>6</sup> Hanuaboi ai lalogu na tahuamu;  
     lalogu na hadaiamu, bona laumagu na  
     tahuamu.
- <sup>7</sup> Ĝaubada baine dadaraigu hanaihanai,  
     nega ta basine lalo namo henigu lou a?
- <sup>8</sup> Ena hebogahisi vada e doko vaitani,  
     ena gwauhamata vada e doko ela bona hanai-  
     hanai a?
- <sup>9</sup> Dirava ese harihari-bada vada e laloa boio,  
     ena badu ese ena hebogahisi vada e laoa ahu  
     a? (Selah)
- <sup>10</sup> Lau na tomamu “Egu lalo-hisihisi binai,  
     Herea Mikamika ese imana idibana na vada e  
     ha-idaau”.
- <sup>11</sup> Iehova ena kara baina lalodia une;  
     oibe, oiemu hoa karadia gunadia baina lalo-  
     dia tao.
- <sup>12</sup> Emu ĝaukara idoinai baina lalo-hadailaia,  
     emu siahu karadia danu baina haerodia.
- <sup>13</sup> Dirava e, emu dala na helāga.  
     Edena dirava na emai Dirava idaina?
- <sup>14</sup> Hoa karadia ikaradia Diravana na oi,  
     oi ese emu siahu vada o hahedinaraia,  
     bese idau-idau bogaragidiae.
- <sup>15</sup> Oi imamu amo emu bese taudia o hamauridia,  
     Iakob bona Iosef garadia.
- <sup>16</sup> Dirava e, ranu ese e itamu negana ai,  
     ranu ese e itamu negana ai, ia na e gari;  
     oibe, dobu gabudia e heude-heude.

- <sup>17</sup> Ori ese medu e hadihoa,  
       guba danu e rahua,  
       bona emu kevaru e kevarua isi, kaha  
       iboudiai.
- <sup>18</sup> Emu guba rahurahu e makohi dagu, koea hiri-  
       hiri lalonai,  
       emu kevaru ese tanobada e hadiaria,  
       tanobada e marere-marere bona e heude-  
       heude.
- <sup>19</sup> Emu raka na davara bogaragina amo,  
       emu dala na ranu badadia bogaragidia amo;  
       a vatağamu na tau ta ese se itadia.
- <sup>20</sup> Emu bese taudia na o hakaudia, mamoe serina  
       na heto,  
       Mose bona Aaron imadia amo.

## 78

- <sup>1</sup> Egu orea taumui e, egu hahediba herevadia a  
       kamonai,  
       taiamui a hakala, lau udugu herevadia a ka-  
       monai.
- <sup>2</sup> Sivarai heğereğerenä ta baina gwauraia,  
       sene herevadia hehunidia;
- <sup>3</sup> ai a kamonai bona dibamai,  
       tamamai ese vada e hamaoromai ġaudia,  
       baina gwaurai.
- <sup>4</sup> Besedia edia amo basia hunidia,  
       a Iehova ena kara herea-daedia bona ena  
       goadä,  
       bona hoa karadia ia ese vada e kara,  
       uru gabena taudia baia hamaorolaidia.
- <sup>5</sup> Ia ese haheğani e atoa Iakob ena,  
       bona taravatu na Israel e henia.  
       Bena seneda e hağanidia,  
       idia ese natudia bae hadibadia eto;

<sup>6</sup> uru gabena taudia bae diba totona,  
do asie vara memerodia danu;  
bena idia na bae tore isi,  
natudia ma bae hamaorolaidia.

<sup>7</sup> Unu amo Dirava bae laroa,  
bona Dirava ena ġaukara basie laloa boio,  
a ena haheġani bae badinadia.

<sup>8</sup> Unu amo danu tamadia ida basie heġereġere:  
lalo-auka bona gwau-ededede uruna bunai,  
lalodia asie hadai maoromaoro uruna,  
laumadia ese Dirava asie badinaia.

<sup>9</sup> Efraim taudia mai edia peva na  
tuari dinana ai e lou.

<sup>10</sup> Dirava ena gwauhamata asie badinaia,  
bona ena taravatu irakalaina e dadaraia.

<sup>11</sup> E kara ġaudia e lalodia boio,  
bona ena hoa karadia e hahedinaraiva ġaudia  
danu.

<sup>12</sup> Senedia vairadai ia ese hoa karadia e kara,  
Aigupto tanona ai bona Soan taorana ai.

<sup>13</sup> Davara e hapararaia, bena idia ese e rakaia  
hanai,  
ranu na e haginia tao, senu ta na heto.

<sup>14</sup> Dina ai ia ese ori dubuna amo e hakaudia,  
bona hanuaboi idoinai lahi mamana amo.

<sup>15</sup> Tano gaġaena ai nadi e hapararadia,  
inuinu ranuna momo e henidia, ranu dobuna  
heġereġerena.

<sup>16</sup> Ranu na nadi amo e ha-arua lasi,  
ranu na e aru dobi, sinavai na hehetu.

<sup>17</sup> Ĝau tamona idia ese edia kara havara e  
habadaia ienai,  
tano gaġaena ai Herea Mikamika e gwau  
ededeheenia.

- 18 Lalodia ai Dirava e tohoa,  
      edia ura anianidia e gwaurai;
- 19 Dirava e ihi-ihiraia, eto  
      “Tano gāgaena ai Dirava ese aniani baine  
      dabaraia a?”
- 20 Ia ese nadi e botaria, bena ranu e aru lasi,  
      koupa-koupa e aru rohoroho;  
a aniani danu baine henidiba,  
      eiava vamu na ena orea taudia baine henidiba a?”
- 21 Taunabunai Iehova e kamonai negana ai na e  
      badu dikadika,  
      Iahi e ara Iakob enai,  
      ena badu e ġaraġara Israel enai;
- 22 badina be Dirava asie abiabiraia,  
      ena hahemauri siahuna asie abidadama henidnia.
- 23 Ġau tamona, ia ese guba atai ai e haġanidia,  
      bona guba iduaradia e kehodia;
- 24 mana na latadiai e hadihoa medu na heto, adia,  
      guba anianidia e henidia.
- 25 Taunimanima ese aneru adia aniani e aniva;  
      ia na aniani momo e siaia, adia.
- 26 Guba ai lai mairiveina e toa, ena hahedua  
      dainai,  
      ena siahu amo lai diho e hakaua lasi;
- 27 vamu na latadiai e hadihoa gahu na heto,  
      roho manudia e hadihodia kone mirina na  
      heto;
- 28 ia ese e hamorudia edia taruha bogaraginai,  
      edia noho gabudia heġeġemadai.
- 29 Idia na e aniani, bogadia e kunu;  
      e gadodiava ai e urava ġaudia na e henidia.
- 30 A dounu e gadova negana ai,  
      aniiani na dounu ududia ai,

- 31 Dirava ena badu na e vara latadiai;  
     bena goada-herea taudia ia ese e aladia mase,  
     Israel ena abi-hidi taudia ia ese e hamasedia.
- 32 Ena be unu e kara toma, to idia na dounu e kara  
     havara;  
     ena be ena hoa karadia e ita, to idia na asie  
     abia dae.
- 33 Taunabunai, ia ese edia dina e ha-oredia, ha-  
     hodi tamona na heto,  
     edia lağani danu gari ai e ha-oredia.
- 34 E aladiava negadia ai, idia ese ia e tahuava,  
     e helalo kerehaiva, bona Dirava e tahuua  
     malaka-malakava.
- 35 E helalo taova, Dirava na edia nadi-gini,  
     Dirava Herea Mikamika na idia ihamauridia.
- 36 A ududia amo e hanamo a kava,  
     maladia amo e koia;
- 37 lalodia na asie hatutukadia ienai,  
     ena taravatu asie badinaia.
- 38 Ğau tamona, ena hebogahisi dainai  
     ia ese edia dika e gwau tao,  
     bona se habuadia tari;
- nega momo ena badu e dogoa tao,  
     ena badu siahuna idoinai asine havaraia.
- 39 E helalo tao, idia na hidio mo,  
     lai nega tamona e toa bena ma se toa lou.
- 40 Nega momo idia ese tano ġaġaena ai e gwau  
     edede heniava,  
     oibe, tano deġedeġe rahu ai lalona e hahisihisi-  
     ava.
- 41 E tohoa loulouva,  
     Israel edia Helaġa Diravana e habaduava.
- 42 Ena siahu asie laloa taova,

- inai tauna imana amo e hamauridia dinana  
na asie laloa taova.
- 43 Una negana ai, ia ese ena toa e kara Aigupto ai,  
bona ena hoa karadia Soan taorana ai.
- 44 Edia sinavai na rara ai e halaodia,  
taunabunai edia sinavai ranudia asie inu  
dibava.
- 45 Lao momo herea e siaidia, idia taudia e ani,  
bona parapara danu, idia e habuadia.
- 46 Edia uma anidia na rautunutunu e henidia,  
bona edia hekwarahi huahuadia na kwadi e  
henidia.
- 47 Edia vine na medu hetari amo e habuadia tari,  
bona edia suke audia danu keru amo.
- 48 Edia boromakau na medu hetari amo e hadika-  
dia,  
edia mamoe danu kevaru amo.
- 49 Ena badu ġaraġara na idia latadiai e halasia,  
badu bona daġedäge bona hahehis,  
hahedika anerudia oreana ta na heto.
- 50 Ena badu dalana e laila;  
mase amo se rauadia,  
a dai-hanai goreredia amo e hamasedia.
- 51 Aitupto taudia natudia roboadie iboudiai e ala-  
dia mase,  
edia goada roboadie, Ham ena kalaga lalo-  
dai.
- 52 Bena ena orea taudia e hakaudia lasiva, mamoe  
na heheto,  
tano ġaġaena ai e hakaudiava, seri na heto.
- 53 Dala namona ai e hakaudia, taunabunai asie  
gari;  
a inaidia na davara ese e habubunidie.
- 54 Ena tano helāġana ai e hakaudia lao,  
ia imana idibana e kwalimu ororona ai.

- 55 Bese idau-idau na idia vairadia amo e luludia  
       oho,  
       edia tano e haridia;  
 Israel iduhudia na  
       idia edia kalaga ai e hanohodia.
- 56 A idia ese Dirava Herea-mikamika e tohoa bona  
       e gwau edeede henia;  
       ena hereva momokanidia asie badinadia.
- 57 E raka muri, e kara koikoi, tamadia  
       heğereğeredia;  
       e kara gageva-gageva, peva dikana, koikoi  
       ḡauna, na heto.
- 58 Badina be edia atai gabudia helagadia amo e  
       habadua,  
       edia kaivakuku e koro ḡaudia amo e  
       havağegea.
- 59 Dirava e kamonai negana ai,  
       ia na e badu dikadika,  
       ia ese Israel e dadaraia vaitani.
- 60 Ena noho kalagana Silo ai e rakatania,  
       taunimanima bogaragidai e noholaiava  
       ḡauna;
- 61 ena siahu e negea, heabi-mauri ḡauna ai ela.  
       ia hairaina e negea, inai tauna imana ai.
- 62 Ena orea taudia na dare matana ai e henidia,  
       ia dihina e badu henidia.
- 63 Lahi ese edia uhau e hağoledia oho;  
       edia ulato na asi edia headava anedia.
- 64 Edia hahelağtaudia na dare matana ai e moru,  
       vabudia ese idia taidia asie tai.
- 65 Bena Ġaubada na mahuta amo e nogá,  
       goadá tauna vine ranuna e inua dainai e  
       lolomu na heto;
- 66 ia inaina e hakarohodia rohoroho,

e hahemaraidia ela hanaihanai.

- 67** Ia ese Iosef ena kalaga e dadaraia,  
bona Efraim iduhuna se abia hidi;  
**68** a Iuda iduhuna e abia hidi,  
Siona ororona, ena lalokau.  
**69** Ena gabu helaḡana e hadaia, guba doriva-  
dorivana na heto,  
eiava tanobada na heto, vada e hadaia mia  
hanaihanai ġauna.  
**70** Ia ese David e abia hidi, ena hesiai tauna,  
mamoe maġudia amo e abia;  
**71** mamoe hahinedia mai natudia ida ireġudia amo  
e hakaua mai,  
ena orea taudia, Iakob besena, ireġudia,  
ia dihina Israel ireġudia totona.  
**72** Mai lalo-maoromaorona ida e reġudia,  
bona mai ima namona ida e hakaudia.

## 79

- 1** Dirava e, bese idau-idau ese oi ahumu vada e  
abia,  
emu dubu helaḡana vada e hamiroa,  
Ierusalem vada e ġigia dobi.  
**2** Emu hesiai taudia tau-anidia na  
atai manudia vada e henidia, adia;  
emu helaḡa taudia hidiodia na  
tanobada boromadia vada e henidia.  
**3** Raradia vada e hahebubua, ranu heġereġerena,  
Ierusalem heġegemadai ai,  
asi tauna ta noho, idia baine guridia.  
**4** Dekemai taudia ese e ihi-ihiraimaimu,  
e ġeġemai daemu taudia ese e  
ġonaġonalaimaimu,  
bona e kirikirilaimaimu.

- <sup>5</sup> Iehova e, ba badu henimai ela bona edena nega ai? Ela hanaihanai a?  
 Emu vaǵeǵe baine ara lahi na heto a?
- <sup>6</sup> Asia dibamu besedia latadiai emu badu ba seja dobi,  
 oi ladamu asie hahaneamu basileiadia lata-diai danu;
- <sup>7</sup> badina be idia ese Iakob vada e ania ore,  
 ena noho gabuna vada e havahua.
- <sup>8</sup> Senemai edia kara havara na basio lalo tao, ai ihadikalaimai;  
 emu hebogahisi baine mai henimai haraǵa,  
 badina be ai na vada ame baia.
- <sup>9</sup> Ihamaurimai Diravana e, ba kahamai,  
 oi ladamu hairaina bagunai;  
 ba hamaurimai bona emai dika ba gwau tao,  
 oi ladamu dainai.
- <sup>10</sup> Anina be dahaka bese idau-idau baeto  
 “Edia Dirava be edesenai ai?”  
 Emu hesiai taudia raradia e hebubu idavalaidia  
 na  
 bese idau-idau bae diba,  
 ai vairamai ai.
- <sup>11</sup> Iǵui taudia edia ǵanaǵana na oiemu ai baine dae;  
 vada e revadia mase taudia na oi siahumu  
 badana amo ba hamauridia.
- <sup>12</sup> ǵaubada e, ai dekemai taudia latadiai  
 oi vada e ihi-ihiraimu taudia edia heihi-ihirai  
 na  
 nega hahitu ba halou henidia;
- <sup>13</sup> bena ai, emu bese taudia, emu seri mamoedia,  
 baia imodaimu hanaihanai;  
 uru ta ela bona ma uru ta  
 oi ihanamomu baia gwaurai hesiriу-hesiriу.

# 80

<sup>1</sup> Israel Ireñuna e, a hakala!

Oi ese Iosef o hakauamu, mamoe serina na heto.

Kerubi latadiai o helaimu Diravana, a diari,

<sup>2</sup> Efraim bona Beniamina bona Manase vairadai.

Mai goadamu ida ba tore isi;  
ihamaurimai totona baoma.

<sup>3</sup> Dirava e, ma bavabimai dae lou;  
oi vairamu baine diari, bena baia roho mauri.

<sup>4</sup> Iehova Sabaota e, emu bese taudia edia ġuriġuri  
na  
ba badulai ela bona edena nega ai?

<sup>5</sup> Iruru-mata o ha-anilaidia,  
bona ma o ha-inulaidia davana.

<sup>6</sup> Dekemai taudia edia ihi-ihirai ġauna ai vada o  
halaomai;  
ai inaimai ese e kirikirilaimai hehenimu.

<sup>7</sup> Iehova Sabaota e, ba hamaurimai;  
oi vairamu baine diari, bena baia roho mauri.

<sup>8</sup> Vine auna ta Aigupto amo o mailaia;  
bese idau-idau o luludia lasi, bena o hadoa;

<sup>9</sup> tano o lailaia, ia ihadona totona,  
ramuna e hedai, tano e vevea ahu.

<sup>10</sup> Ororo na ia ese e hakerukerudia,  
sida audia badadia na ia rigina ese e lahea  
ahu;

<sup>11</sup> ia rigina e toia roro ela bona davara,  
ia tuhutuhuna ela bona sinavai badana.

<sup>12</sup> Dahaka dainai ia maġuna vada o hamakohia,

bena raka-hanai taudia iboudiai ese ia  
huahuana e burukimu?

<sup>13</sup> Uda boromana ese e ragaimu;  
uda ġaudia iboudiai ese e heubulaimu.

<sup>14</sup> Iehova Sabaota e, a roha kerehai!  
Guba amo a roha dobi, a itaia.

Ina vine auna a haġerea,

<sup>15</sup> ia na oi imamu idibana ese e hadoa ġauna.

<sup>16</sup> Idia ese lahi amo e doua, bona e utua oho;  
oi vairamu baduna ese baine hamasedia be  
namo.

<sup>17</sup> Oi imamu na idibamu kahana tauna latanai  
baine mia,  
bona taunimanima natuna, o hagoadaia si-  
boru emu, latanai.

<sup>18</sup> Bena oiemu amo basia raka muri;  
mauri ba henimai, bena oi ladamu baia ha-  
hanea.

<sup>19</sup> Iehova Sabaota e, ba hamaurimai;  
oi vairamu baine diari, bena baia roho mauri.

## 81

<sup>1</sup> Ane avabia lolololo, eda goada Diravana ena;  
a hisi dae, Iakob ena Dirava enai.

<sup>2</sup> Ane a ladaia isi, tareko a hareġedia;  
gitara bona hatai-hatai ġauna badana danu a hatai.

<sup>3</sup> Hua matamatana negana ai kibi a hiriria,  
hua e idoi negana ai danu,  
eda aria dinana bunai.

<sup>4</sup> Badina be taravatu bunai Israel ena;  
Iakob ena Dirava ena haheġani bunai;

<sup>5</sup> ena hahediba herevana Iosef e henia,  
Aigupto ai e loa eva-eva negana ai.

- Asi dibagu gadona ta na kamonaia;
- 6 Maduna na paḡamu amo na abia oho,  
imamu na bosea amo na kokidia.
- 7 Emu hisihisi ai o boi henigu, bena na hamau-  
rimu;  
guba rahu-rahu ena gabu hehunina ai na  
haere henimu,  
Meriba ena ranu gabudia ai na tohomu. (Se-  
lah)
- 8 Egu bese taumui e, a hakala, baina sisiba hen-  
imui;  
Israel e, boma kamonai henigu bema namo.
- 9 Bogaragimui ai dirava idauna ta basine noho,  
idau taudia edia dirava ta basio toma henia  
dihō.
- 10 Lau binai Iehova, emui Dirava,  
Aigupto amo na hakaumui lasi.  
Udumui a haḡadia, bena baina hahonudia.
- 11 A egu bese taudia na gadogu asie kamonaia;  
Israel ese e dadaraigu.
- 12 Taunabunai na negedia,  
sibodia edia lalo-auka bae badinaia,  
sibodia edia lalo-hadai karadia bae kara.
- 13 Egu bese taudia bema kamonai henigu bema  
namo;  
Israel na egu dala ai bema raka bema namo.
- 14 Bena idia inaidia bama hadareredia haraga,  
e tuari henidia taudia bama tuari henidia.
- 15 Iehova e inai heniamu taudia na ia vairanai  
bema igo diho;  
matadia ihakanidia bema hesiriu  
hanaihanai.
- 16 Uit namo-hereana amo bama ubumui,

bada-ranuna nadi amo e abiamu na bama  
ubulaimui.

## 82

- <sup>1</sup> Dirava ese dirava edia hebou lalonai ena gabu  
vada e abia,  
dirava idau-idau bogaragidiai hahemaoro e  
karaiamu.
- <sup>2</sup> Umui na ba hahemaoro kerere-kerere ela bona  
edena nega ai?  
Kara dika taudia ediai ba tao ela bona edena  
nega ai? (Selah)
- <sup>3</sup> Asie goadamu taudia bona ihareha na hahe-  
maoro maorona ba henidia,  
hisihisi taudia bona ogoğami taudia edia dala  
maorodia ba gwaurai.
- <sup>4</sup> Asie goadamu taudia bona e dabumu taudia ba  
hamauridia;  
kara dika taudia imadia amo ba harohodia  
mauri.
- <sup>5</sup> Idia na asi edia aonega bona asi edia lalo-parara,  
dibura ai a loa eva-evamu;  
tanobada badidia iboudiai na e heude-  
heudemui.
- <sup>6</sup> Lau na tomamu: Umui na dirava;  
iboumui ai na Herea Mikamika natuna;
- <sup>7</sup> ġau tamona, taunimanima heğereğeredia do ba  
mase,  
hanua pavapavana natuna ta heğereğerena ba  
keto.
- <sup>8</sup> Dirava e, a tore isi, tanobada ba hahemaoro  
henia;  
badina be bese iboudiai na oiemu.

## 83

- <sup>1</sup> Dirava e, basio noho hedavauhe,  
     Dirava e, eremu basio kumaia, Iaǵamu basio  
     ania.
- <sup>2</sup> A itaia, oi inaimu na e heloǵo-heloǵomu,  
     e inai henimumu taudia na e gaga isimu.
- <sup>3</sup> Oiemu bese idoadia daladia e ato hatamu,  
     o reǵudiamu taudia ihadikadia totona e  
     henega boumu.
- <sup>4</sup> Idia na e tomu “Aoma, una bese baita habuaia  
     tari,  
     Israel ladana basie laloa tao Iou ela bona  
     hanaihanai”.
- <sup>5</sup> Oibe, mai lalodia tamona e henegamu,  
     oi ihadikamu totona e gwau hamata hehen-  
     imu.
- <sup>6</sup> Taudia bini: Edom bona Ismael iduhudia  
     iboudiai,  
     bona Moab taudia, bona Hagara besena  
     danu;
- <sup>7</sup> Gebala bona Amono bona Amalek,  
     bona Filistia bona Turo taudia danu.
- <sup>8</sup> Asuria danu idia ida vada e hebou,  
     idia na Lot garana e ima henia heboumu.  
     (Selah)
- <sup>9</sup> Midian taudia o kara henidia heǵereǵerena,  
     idia danu unu ba kara henidia toma;  
     eiava Sisera bona Iabin na Kison sinavaina isena  
     ai  
     o kara henidia heǵereǵerena.
- <sup>10</sup> En-doro ai o habuadia tari,  
     tano seriserina ai o halaodia.
- <sup>11</sup> Edia lohia na Oreb bona Sebe heǵereǵeredia ai ba  
     halaodia,

edia pavapava iboudiai na Sebaha bona  
Salmuna heğereğeredia ai.

<sup>12</sup> Idia na eto “Dirava ena rei gabudia na  
baita abidia iseda”.

<sup>13</sup> Egu Dirava e, mariu nadinadidia e morumu e  
hegiromu heğereğeredia ai ba halaodia,  
eiava uit momodia lai ese e oda ohomu  
heğereğeredia ai.

<sup>14</sup> Lahi ese uda e ġoleamu na heto,  
lahi hururuna ese ororo udadia e aradiamu  
na heto,

<sup>15</sup> emu lai badana ese unu baine havadia toma,  
emu lai gubana ese unu baine hagaridia  
toma.

<sup>16</sup> Iehova e, vairadia ba hahemaraidia,  
oi ladamu bae tahua helaooreana;

<sup>17</sup> ba hahemaraidia bona ba hadaradaradia  
hanaihanai,

edia hemarai ai do bae mase.

<sup>18</sup> Ba hadibadia, bena bae diba,  
oi ladamu na Iehova;  
oi mo sibomu Herea Mikamika, tanobada  
idoinai daenai.

## 84

<sup>1</sup> Iehova Sabaota e,  
emu noho gabuna na mai hairaina.

<sup>2</sup> Lau laumagu na e ganaganamu,  
Iehova ena mağu e mase heniamu;  
lalogu bona hidioGU na moale anedia e abimu,  
mauri Diravana ena.

<sup>3</sup> Iehova Sabaota e,  
egu pavapava, egu Dirava,

- bisini na ena noho gabuna e davariamu,  
     emu pata helağana enai;  
 aibisi danu ena ruma unuseni ai e karaiamu,  
     bona natuna e havaradiamu.
- <sup>4</sup> Emu ruma ai e nohomu taudia na nanamu,  
     idia ese oi ihanamomu anedia e abi hanai-  
     hanaimu. (Selah)
- <sup>5</sup> Edia goada oiemu amo e abiamu taudia na  
     nanamu,  
     Siona ilao-henina daladia na idia lalodia ai.
- <sup>6</sup> Baka kourana e rakaia hanaimu negana ai,  
     idia ese ranu lohilohi gabuna ai e halaoamu;  
 medu matamana ai danu,  
     una koura na gohugohu ai e hahonuamu.
- <sup>7</sup> Edia goada na e bada e laomu;  
     dirava edia Dirava na Siona ai baine hed-  
     naraí.
- <sup>8</sup> Iehova Sabaota e, egu guriğuri a kamonaia;  
     Iakob ena Dirava e, a hakala henigu. (Selah)
- <sup>9</sup> Dirava e, emai kesi a itaia;  
     o horoa tauna vairana ba hağerea.
- <sup>10</sup> Badina be dina tamona emu mağu ai ese  
     dina daha idau gabu ai na e hereadiamu;  
 egu Dirava ena ruma iduarana inarina ai bama  
     lao hari namo herea,  
     a kara dika taruhadìa ai bama noho na dia  
     namo.
- <sup>11</sup> Badina be Ğaubada Iehova na dina bona kesi,  
     ia na harihari-bada bona hailai e henimu.  
 Iehova ese ġau namona ta se ruamu,  
     e raka maoromaoromu taudia ediai.
- <sup>12</sup> Iehova Sabaota e,  
     oi e abidadama henimumu tauna be namo.

## 85

- <sup>1</sup> Iehova e, emu tano o lalo namo heniava,  
Iakob ena noho o hanamoava.
- <sup>2</sup> Emu bese taudia edia dika o gwau tao,  
edia kara dika idoinai o laloa nege.
- <sup>3</sup> Emu badu idoinai o abia oho,  
emu badu ġaraġarana amo o kerehai.
- <sup>4</sup> Ihamaurimai Diravana e, ba hamaurimai lou;  
emu badu emai ai ba negea daure.
- <sup>5</sup> Ba badu henimai hanaihanai a?  
Emu badu ba hadaudaua ela bona uru  
iboudiai a?
- <sup>6</sup> Emu bese taudia bae moalelaimu totona  
basio hamaurimai lou a?
- <sup>7</sup> Iehova e, emu hebogahisi na emai ai ba hahedi-  
naraia,  
emu hahemauri ba henimai.
- <sup>8</sup> Ĝaubada Iehova ena hereva mani aina kamonai;  
badina be ia ese maino herevadia baine gvau-  
rai, ena orea taudia ediai,  
ena helāga taudia danu, lalodia ai ia e  
haġereamu taudia, ediai.
- <sup>9</sup> Momokani, iena hahemauri na ia e gari heniamu  
taudia ediai e kaum,  
hairai na emai tano ai baine noho helooreana.
- <sup>10</sup> Hebogahisi bona heabidama bae hedavari,  
kara maoromaoro bona maino bae haherahu  
heheni.
- <sup>11</sup> Heabadadama na tano amo baine tubu,  
kara maoromaoro na guba amo baine igo  
dobi.
- <sup>12</sup> Momokani, Iehova ese ġau namodia baine hen-  
imai,

bona emai tano ese anina baine hatubua.  
 13 Kara maoromaoro na ia vairanai bainela,  
     ia aena gabudia baine lailai.

## 86

- 1 Iehova e, taiamu a hakala, a haere henigu,  
     badina be na ogoğamimu, na dabumu.
- 2 A hamaurigu, badina be oiemu ai na taomu;  
     emu hesiai tauna oi e abidadama henimumu  
     ba hamauria.
- 3 Oi na egu Dirava. Gaubada e, ba bogagu hisi;  
     badina be oi na tai henimumu dina idoinai.
- 4 Emu hesiai tauna laumana ba hamoalea.  
     Gaubada e, lau laumagu ese e tahumumu.
- 5 Gaubada e, oi na namo, oi na dika o gwaua taomu;  
     emu hebogahisi na bada, oi e tai henimumu  
     taudia iboudiai ediai.
- 6 Iehova e, egu ġuriġuri a hakala henia,  
     egu noinoi a kamonaia.
- 7 Egu hekwarahi dinana ai na tai henimumu,  
     badina be oi ese o haere henigumu.
- 8 Gaubada e, dirava idau-idau bogaragidiai oi na asi  
     idaimu;  
     ta ena ġaukara danu dia oiemu heġereġeredia.
- 9 Gaubada e, o karadia besedia iboudiai na baema,  
     oi vairamu ai bae igo diho,  
     bona oi ladamu bae heatolaia.
- 10 Badina be oi na bada, bona hoa karadia o  
     karamu,  
     oi mo sibomu Dirava.
- 11 Iehova e, emu dala ba hadibagu,  
     emu momokani ai baina raka helaoreana;  
     lau lalogu ba haheboua tamona,  
     oi ladamu imatauraina ai.

- 12 Ģaubada Dirava e, lau oi na hanamomumu mai  
lalogu idoinai ida,  
oi ladamu baina imodaia hanaihanai.
- 13 Badina be emu hebogahisi na bada egu ai,  
lau laumagu na mase ena dobu gabudia amo  
vada o hamauria.
- 14 Dirava e, hekokoroku taudia vada e tuari  
henigu;  
daġedäge taudia ese lauegu mauri iabi-ohona  
dalana e tahuamu,  
oi asie atomu lasi idia vairadai.
- 15 A Ģaubada e, oi na hebogahisi bona harihari-  
bada Diravana,  
emu badu e halahemu emu hebogahisi bona  
emu heabidadama na bada herea.
- 16 A hageregu, a bogagu hisi;  
emu goada na emu hesiai tauna na henia,  
emu hesiai hahinena natuna ba hamauria.
- 17 Emu lalo-namo toana ta ba hahedinarai henigu,  
bena e inai henigumu taudia na bae itaia,  
bona bae hemarai;  
badina be, Iehova e, oi ese vada o durugu,  
bona taugu vada o haloa.

## 87

- 1 Ororo helaġana ai Iehova ese e hadaia hanuana  
na e ginimu;
- 2 ia ese Siona ikoukoudia e ura henidia  
badamu,  
Iakob ena noho gabudia iboudiai na e ura  
henidia maraġimu.
- 3 Dirava ena hanua e,  
oi hairaimu na e imodaiamu. (Selah)
- 4 Rahaba bona Babulono na dibadia lau,

- Filistia bona Turo bona Etiopia danu:  
 “Ina na unuseni ai e vara”, e tomu.
- <sup>5</sup> Siona danu bae herevalaia, baeto  
 “Ina bona una na ia lalonai e vara”.
- Badina be Herea Mikamika ese  
 baine haginia tutuka-tutuka.
- <sup>6</sup> Bese idau-idau e hagaudiamu negana ai Iehova  
 na e gwaumu  
 “Ina na unuseni ai e vara”. (Selah)
- <sup>7</sup> Ane-abi taudia bona mavaru taudia na e  
 gwaumu  
 “Lau badigu idoinai na oiemu ai”.

## 88

- <sup>1</sup> Iehova, ihamaurigu Diravana e,  
 dina ai na boi henimumu, ba kahagu totona,  
 hanuaboi ai danu na tai henimumu.
- <sup>2</sup> Egu ġuriġuri baine dae vasi emu ai,  
 egu taitai ba hakala henia.
- <sup>3</sup> Lau laumagu na e hekwarahi masemu,  
 egu mauri na mase gabuna e kahi laomu.
- <sup>4</sup> Mase gurina ai e dihomu taudia ida vada e gwau-  
 raigu hebou;  
 lau na asi goadagu,
- <sup>5</sup> mase taudia bogaragidiai vada e kahua nege  
 tauna na heto,  
 e aladia taudia guri ai e hekuremu na hehetu,  
 oi so lalodia taomu badina be oi imamu ese  
 vada e negedia daure taudia na hehetu.
- <sup>6</sup> oi ese mase gurina ena dobu gabudia ai vada o  
 atogu,  
 dibura masemase bona dobu masemase  
 gabudia ai;

- <sup>7</sup> oiemu badu na metau lau latagu ai,  
     emu hurehure iboudiai ese vada e  
     habubunigu. (Selah)
- <sup>8</sup> Bamogu na lalodia vada o ani, bena e  
     dadaraigumu;  
     hahegari ġauna ai vada o halaogu ediai.  
 Vada name hekou ahu, asi egu roho mauri dalana;
- <sup>9</sup> matagu vada eme valahu-valahu, Ialo-  
     hisihisi dainai.
- Iehova e, dina iboudiai na boi henimumu,  
     lau imagu na oiemu ai na toi roro henimumu.
- <sup>10</sup> Hoa karadia o karamu mase taudia edia,  
     eiava mase taudia laulaudia na oi  
     ihanamomu totona e tore isimu a? (Selah)
- <sup>11</sup> Mase gurina ai oiemu hebogahisi e gwauraia  
     hedinaraimu,  
     eiava dobu masemase gabuna ai oiemu  
     heabidadama sivaraina e gwauraiamu  
     a?
- <sup>12</sup> Dibura gabuna ai oiemu hoa karadia na mai  
     dibadia,  
     eiava helalo-boio tanona ai oiemu hahemauri  
     karadia na e helalo taomu a?
- <sup>13</sup> Iehova e, lau oi na tai henimumu,  
     daba ai egu ġuriġuri e dae vasimu.
- <sup>14</sup> Iehova e, dahaka dainai vada o kahugu nege?  
     Dahaka dainai oi vairamu na egu ai o huni-  
     amu?
- <sup>15</sup> Merogu negana amo mai hisihisigu ida vada na  
     noho,  
     mase kahira-kahirana ai;  
 emu hahegari ese e hadikagumu,  
     lau na asi ikahagu.
- <sup>16</sup> Emu badu ese e habubunigumu,

- emu hahedika ese e habuagu tarimu;  
<sup>17</sup> abata na heto e kougu heğegemu dina idoinai,  
 vada e kougu ahu heboumu.  
<sup>18</sup> Egu lalokau tauna bona turagu lalodia vada o  
 ani,  
 bena e dadaraigumu;  
 bamogu na dibura ai nonoho.

## 89

- <sup>1</sup> Iehova e, emu hebogahisi na do baina anelaia  
 hanaihanai;  
 lau udugu amo emu heabidadama baina  
 gwauraia hedinarai uru iboudiai ediai.  
<sup>2</sup> Badina be emu hebogahisi vada o haginia hanai-  
 hanai,  
 emu heabidadama na auka, guba na heto.  
<sup>3</sup> Oi na vada oto: Na abia hidi tauna ida vada a  
 hegwau hamata heheni;  
 egu hesiai tauna David na ini vada na gwau  
 henia hamata toma,  
<sup>4</sup> “Oi garamu baina haginidia hanaihanai,  
 oiemu terono baina haginia uru iboudiai lalo-  
 diai.” (Selah)  
<sup>5</sup> Iehova e, guba ese oiemu hoa ġaudia bae  
 imodaidia,  
 bona emu heabidadama helaġa taudia edia  
 hebou ai danu.  
<sup>6</sup> Badina be Iehova idaina be daika guba ai?  
 Guba taudia bogaragidiai daika na Iehova  
 heğereğerena?  
<sup>7</sup> Ia na helaġa taudia edia hebou ai e gari heniamu  
 Diravana;  
 ia na bada bona mai garina, e ginia hegegemu  
 taudia iboudiai bogaragidiai.

- <sup>8</sup> Iehova Sabaota e,  
     Iehova e, emu heabidadama ese e ġeġemu dae;  
     daika na mai siahuna oi heġereġeremu?
- <sup>9</sup> Davara hurehuredia o biagudiamu;  
     hurehure e daemu, to oi ese o hadokodiamu.
- <sup>10</sup> Rahaba o taoa kohi, mase ġauna na heto;  
     oi inaimu na imamu siahuna amo o hakaro-  
     hodia rohoroho.
- <sup>11</sup> Guba na oiemu, tano danu oiemu;  
     tanobada mai lalona ġaudia iboudiai na oi ese  
     o karadia.
- <sup>12</sup> Mirigini kahana bona diho kahana na oi ese o  
     karadia,  
     Taboro bona Heremon ese oi ladamu e heato-  
     laiamu, mai moaledia ida.
- <sup>13</sup> Oi imamu na mai siahuna,  
     imamu palapalana na mai goadana,  
     imamu idibana na atai ai.
- <sup>14</sup> Emu terono badidia na kara maoromaoro bona  
     hahemaoro goevadie;  
     hebogahisi bona heabidadama na oi vairamu  
     ai e laomu.
- <sup>15</sup> Heimodai honedia mai dibadia taudia be  
     nanamo;  
     Iehova e, idia na oi vairamu diarina ai e  
     rakamu.
- <sup>16</sup> Idia ese oi ladamu e heaġilaiamu dina idoinai,  
     idia ese oiemu kara maoromaoro e imoda-  
     iamu.
- <sup>17</sup> Badina be oi na edia goada hairaina;  
     oiemu hahenamo ese emai doa e haduduia  
     isimu.
- <sup>18</sup> Badina be emai kesi na Iehova ena;  
     emai hanua pavapavana na Israel ena Helaga  
     Diravana ena.

- 19 Sene negana ai e abidadama henimumu tauna  
 na  
 oi ese mata-hanai ai o hereva henia, oto:  
 Goada tauna kwarana ai havava ġauna vada na  
 atoa,  
 hanua taudia bogaragidia amo na abia hidi  
 tauna vada na imodaia.
- 20 Egu hesiai tauna David vada na davaria;  
 egu dehoro helaġana amo vada na horoa,
- 21 lau imagu palapalana ese ia baine bamoa hanai-  
 hanai  
 bona lau imagu ese ia baine hagoadaia to-  
 tonia.
- 22 Inai tauna ese basine haerotania,  
 bona kara dika tauna ese basine hahemaraia.
- 23 Ia inaina baina taodia kohi ia vairanai;  
 e inai heniamu taudia baina rahudia mase.
- 24 Egu heabidadama bona egu hebogahisi na ia  
 ida,  
 lau ladagu ai ena doa baine heabi isi.
- 25 Ia imana na davara latanai baine atoa kau,  
 ia imana idibana sinavai latadiai danu.
- 26 Ia ese baine tai henigu, baineto “Oi na lau Tam-  
 agu,  
 egu Dirava, ihamaurigu Nadi-ginina.”
- 27 Bena lau ese tau roboana ai baina halaoa,  
 bona pavapava herea-daena, tanobada pava-  
 pavadia bogaragidiae.
- 28 Egu hebogahisi na ienai baina hamomokania  
 hanaihanai,  
 egu gwauhamata na ienai baine gini tutuka-  
 tutuka.
- 29 Ia garana baina haginidia hanaihanai,  
 iena terono do baine mia, guba baine mia  
 dinadia heġereġerena.

- 30 Ia natuna ese egu taravatu bema rakania,  
     bona egu hahedua heğereğeredia basiema  
     raka,
- 31 egu taravatu bema tata utu,  
     bona egu haheğani basiema badinadia,
- 32 bena edia kerere davadia na hedadaba auna  
     amo,  
     bona edia kara dika davadia na hekwadi var-  
     odia amo  
     baina henidia.
- 33 A lau be egu hebogahisi na iena amo basina abia  
     oho,  
     egu heabidadama basina ha-idaua;
- 34 egu gwauhamata na basina rakania,  
     eiava udugu bibinadia amo e lasi herevadia  
     na basina ha-idaudia.
- 35 Egu heläga ai vada na gwau hamata vaitani;  
     David na basina koia.
- 36 Ia garana bae hesiri hanaihanai,  
     ieno terono baine mia, dina na lau vairagu ai  
     e miamu heğereğerena;
- 37 hua heğereğerena baine gini hanaihanai,  
     baine gini tutuka-tutuka, guba e hesiriumu  
     heğereğerena. (Selah)
- 38 A harihari vada o kahua nege bona vada o  
     dadaraia,  
     o horoa tauna na o badu henia lalodikamu.
- 39 Emu gwauhamata na emu hesiai tauna ena amo  
     vada o haloua;  
     ena havava ġauna na gahu ai vada o hadikaia.
- 40 Ena mağu iboudiai vada o hamakohidia,  
     ena kohoro vada o ġigidia dobi.
- 41 Raka-hanai taudia iboudiai ese ena kohu e dadi-  
     haimu;

- ia dekena taudia ese e ġonaġonalaiamu.
- <sup>42</sup> Ia inaina imadia idibadia vada o abi isi,  
ia inaina iboudiai vada o hamoaledia.
- <sup>43</sup> Oibe, iena dare matana vada o haloua;  
tuari ai so haginia auka.
- <sup>44</sup> Ena ġoeva-dae vada o abia oho,  
ena terono na tano ai vada o ġigia dobi.
- <sup>45</sup> Ena malaġa dinadia vada o hakwadogidia,  
vada o hahemaraia vaitani. (Selah)
- <sup>46</sup> Iehova e, ba noho hehuni ela bona edena nega  
ai? Elä hanaihanai ai?  
emu badu baine ġaragħara lahi na heto ela bona  
edena nega ai?
- <sup>47</sup> Ba laloa tao, egu mauri dinadia na dia hoho;  
dahaka badina ai taunimanima natudia o  
havaradia!
- <sup>48</sup> Tau be daika ena mauri baine hesiri, mase  
basine mamia toho?  
Daika sibona mase siahuna amo ia laumana  
baine hamauria? (Selah)
- <sup>49</sup> Ĝaubada e, emu hebogahisi gunana,  
emu heabidadama amo David o gwaurai he-  
nia hamata hebogahisina,  
ġauna be edesenai ai?
- <sup>50</sup> Ĝaubada e, emu hesiai tauna e dadaraiamu na ba  
laloa tao;  
bese iboudiai edia heuduguirai na lau ese na  
huaiamu;
- <sup>51</sup> Iehova e, heuduguirai bunu, oi inaimu edia  
heuduguirai,  
unu amo idia ese oi o horoa tauna ena raka e  
ġonaġonalaiamu.
- <sup>52</sup> Iehova baita hanamo hanaihanai.  
Amen. Amen.

## 90

- <sup>1</sup> Ġaubada e, emai noho gabuna oi mo,  
    uru iboudiai lalodai.
- <sup>2</sup> Ororo do asie vara,  
    tanobada bona motumotu do so kara,  
una negana ema bona hari ela bona hanaihanai  
    oi mo Duava.
- <sup>3</sup> Oi ese taunimanima na ġahu ai ma o halaodiamu,  
    ini o gwau tomamu  
        “Taunimanima natuna loġora e, ba lou”.
- <sup>4</sup> Badina be laġani daha oi vairamu ai na varani na  
    heto vada e ore,  
    eiava hanuaboi hegima negana tamona na  
    heto.
- <sup>5</sup> Oi ese taunimanima na o ha-arudia oho; idia na  
    nihi na heto;  
    idia na rei daba ai e vara loumu na heto:
- <sup>6</sup> daba ai e varamu, e tubumu;  
    adorahi ai e maraimu bona e kakoromu.
- <sup>7</sup> Badina be emu badu ese e habuamai tari,  
    emu badu ese e ġovamai.
- <sup>8</sup> Emai kara havara na oi vairamu ai vada o ato  
    lasi,  
    bona emai kerere hehunidia na oi vairamu  
    diarina ai danu.
- <sup>9</sup> Badina be emai dina iboudiai na oiemu badu  
    henunai vada e lao bubuni;  
    emai mauri laġanidia vada e oremu,  
    hahodi tamona na heto.
- <sup>10</sup> Emai mauri laġanidia na hitu-ahui,  
    eiava goada dainai bae taurahani-ahui rea-  
    dia;  
to idia na hekwarahi ai bona lalo-hisihisi ai e honu  
    honu daemu;

idia na e ore haraḡamu, bena ai na dauha a  
roho laomu.

- <sup>11</sup> Daika ese emu badu siahuna e laloamu?  
Daika ese emu badu na igari-henimu ida e  
haheḡereḡereamu?
- <sup>12</sup> Oi ese emai dina ihagaudia ba hadibamai,  
bena lalomai ese aonega bae davari.
- <sup>13</sup> Iehova e, a lou mai! Edena nega ai baoma?  
Emu hesiai taudia a bogadia hisi.
- <sup>14</sup> Daba ai emu hebogahisi amo ba ubumai;  
emai dina iboudiai baia hisi dae bona baia  
moale helaoreana.
- <sup>15</sup> Ba hamoalemai dinadia na o hahisimaiva dina-  
dia ida ba haheḡereḡeredia,  
bona dika a mamiava laḡanidia ida danu bae  
heḡereḡere.
- <sup>16</sup> Emu ġaukara baine hedinarai emu hesiai taudia  
vairadai,  
bona emu siahу herea-daena na idia natudia  
vairadai.
- <sup>17</sup> Iehova, emai Dirava, ena lalo-namo na latamai  
ai baine mia,  
bona imamai ġaukaradia ba haginidia ai emai  
ai;  
oibe, imamai gaukaradia ba haginidia.

## 91

- <sup>1</sup> Herea Mikamika metaina ai e nohomu tauna,  
Siahу-idoinai Diravana ikerukeruna ai e no-  
homu tauna ese
- <sup>2</sup> Iehova baine hereva henia, baineto,  
“Egu roho-mauri gabuna bona egu kohoro;  
egu Dirava, na abidadama henimumu”.

- <sup>3</sup> Ia ese manu-tahu tauna ena idoa amo baine  
    harohomu mauri,  
    mase gorerena amo baine hamaurimu.
- <sup>4</sup> Ia ese ia hanina amo baine gorumu ahu,  
    ia hanina henudiae emu roho-mauri gabuna  
        ba davaria;  
    ienah eabidadama na emu kesi bona keme  
        aurina.
- <sup>5</sup> Hanuaboi ena hahegari na basio garilaia,  
    dina ai e kinomu dibana danu garina basio  
        gari;
- <sup>6</sup> hanuaboi ai e dai hanaimu gorerena,  
    bona dina tubua ai e kaumahahebua-tarina  
        danu.
- <sup>7</sup> Taunimanima daha na ohemu ai bae keto,  
    bona gerebu na oi imamu idibana kahana ai;  
        a basine hakahikahimu.
- <sup>8</sup> Matamu amo ba roha roha,  
    kara dika taudia davadia e abimu ba itaia.
- <sup>9</sup> Iehova na emu roho-mauri gabuna ai vada o  
    halaoa,  
    Herea Mikamika na emu noho gabuna bunai;
- <sup>10</sup> una dainai dika ta emu ai basine kau,  
    gorere ta emu kalaga basine hakahikahia.
- <sup>11</sup> Badina be ia ese ena aneru baine haduadia,  
    emu dala iboudiae bae gimamu.
- <sup>12</sup> Idia ese imadia ai bae abimu isi,  
    aemu na nadi ai ba tutuhia na garina.
- <sup>13</sup> Leona bona hekori gaigaina do ba moidia,  
    leona natuna bona gaigai na aemu amo ba  
        moidia tao.

- <sup>14</sup> Ia ese e lalokau henigumu dainai,  
       lau ese baina hamauria;  
 lau ese baina gimaia,  
       badina be lau ladagu na dibana.
- <sup>15</sup> Baine boi henigu negana ai,  
       lau ese baina haere henia;  
 lau ese ena hekwarahi ai baina bamoa,  
       baina hamauria, bona imatauraina baina he-nia.
- <sup>16</sup> Mauri dinadia momo baina henia;  
       egu hahemauri baina hahedinarai henia.

## 92

- <sup>1</sup> Iehova ihanamona be namo.  
       Herea Mikamika e, oi ladamu iheatolaina be  
               namo:
- <sup>2</sup> emu hebogahisi igwauraina daba ai,  
       bona emu heabidadama hanuaboi ai,
- <sup>3</sup> gitara bona ivilikou reğedia amo,  
       bona hatai-hatai ġauna reğena amo.
- <sup>4</sup> Badina be, Iehova e, oi ese emu ġaukara amo vada  
       o hamoalegu;  
       oi imamu ġaukaradia daidiae ane na abimu mai  
               moalegu ida.
- <sup>5</sup> Iehova e, emu ġaukara na babada;  
       emu lalo-hadai na dodobu heherea.
- <sup>6</sup> Lalo duhu tauna basine diba,  
       kavakava tauna lalona basine parara:
- <sup>7</sup> ena be kara dika taudia na bae vara rei na heto,  
       ena be kara havara taudia na bae tubu,  
       to bae bua tari hanaihanai.
- <sup>8</sup> A oi, Iehova e, na atai ai hanaihanai;  
       <sup>9</sup> Iehova e, oi inaimu ba itadia.  
 A itaia, oi inaimu bae mase ore,

kara dika taudia iboudiai bae karoho.

- <sup>10</sup> A oi ese egu doa vada o duduia isi,  
 uda boromakauna maruanena doana na  
 heto;  
 dehoro matamata na latagu ai vada o seia.
- <sup>11</sup> Lau matagu ese inaigu ihadareredia vada e  
 itaia,  
 bona lau taiagu ese e kara havara henigu tau-  
 dia ihabua-taridia reğedia vada e kamonai.
- <sup>12</sup> Kara maoromaoro taudia na e varamu, pamu  
 auna na heto,  
 e tubumu, Lebanon sidana auna na heto;
- <sup>13</sup> Iehova ena ruma ai vada e hadodia,  
 eda Dirava ena ikoukou ai e tubumu.
- <sup>14</sup> Sene audia na huahuadia dounu e havaramu;  
 todedia e arumu, rau matamatadia e  
 hekaramu;
- <sup>15</sup> unu ese e hahedinaraiamu Iehova na  
 maoromaoro.  
 Ia na egu nadi-gini;  
 ia lalonai na asi kara dikana ta.

### 93

- <sup>1</sup> Iehova na pavapava, ia ese hairai e hahedokila-  
 iam;
- Iehova ese goada e hahedokilaiamu, bona e  
 rioamu.
- Oibe, tanobada vada e gini tutuka-tutukamu,  
 ia basine marere.
- <sup>2</sup> Oiemu terono sene negana amo vada o  
 haginia;  
 oi na o noho hanaihanaimu.
- <sup>3</sup> Iehova e, abata vada e dae,

abata reğedia vada e daemu,  
abata gurudia na babada.

<sup>4</sup> Ranu momo regedia na babada,  
davara hurehuredia na gogoada;

A Iehova na atai ai e nohomu,  
ena siahу ese idia e hereadiamu.

<sup>5</sup> Iehova e, emu hereva na momokani;  
emu rumu na helāga,  
bona do baine helāga hanaihanai.

## 94

<sup>1</sup> Iehova e, dika davana ihenina Diravana,  
dika davana ihenina Diravana e, a diari.

<sup>2</sup> Tanobada ihahemaoro-henina Diravana e, a tore  
isi,

heāgi taudia na davadia ba henidia.

<sup>3</sup> Iehova e, kara dika taudia na ela bona edena  
nega ai,

ela bona edena nega ai, bae heāgi?

<sup>4</sup> Edia heāgi herevadia e gwaurai momomu,  
kara havara taudia iboudiai na e hekoko-  
rokumu.

<sup>5</sup> Iehova e, emu bese taudia e moidia taomu,  
emu tano e hadikaiamu;

<sup>6</sup> vabu bona idau tauna e aladiamu,  
ihareha e aladia masemu.

<sup>7</sup> Idia na e tomu: Iehova ese se itaiamu;  
Iakob ena Dirava ese se laloamu.

<sup>8</sup> Lalo-duhu herea taumui e, ba diba.  
Kavakava taumui e, edena nega ai lalomui  
bae parara?

<sup>9</sup> Taia vada e ato Diravana na se kamonaimu a?  
Mata vada e kara Diravana na se itamu a?

- 10** Bese idau-idau matadia e hakanimu Diravana  
na  
dava basine hen i a?  
Taunimanima e ha-aonegadiamu Diravana,  
**11** Iehova, ia na taunimanima edia lalo-hadai  
dibana;  
ia dibana idia na hahodi tamona na heto.
- 12** Iehova e, matana o hakaniamu tauna be namo,  
emu taravatu o hadibalaia tauna danu.  
**13** Hekwarahi dinadia ai na laḡa-ani o heniamu,  
ela bona kara dika taudia iabidia rikirikina  
gurina baine heġei.  
**14** Badina be Iehova ese ena bese taudia na basine  
rakatanidia;  
ena tano danu basine rakatania.  
**15** Badina be hahemaoro ġoevaġgoevana ese kara  
maoromaoro taudia baine lou henidia,  
bona lalo-ġoevaġgoeva taudia iboudiai ese bae  
ġavaia.
- 16** Daika baine tore isi, baine durugu,  
kara dika taudia ilao-ahudia?  
Daika baine gini tore, baine kahagu,  
kara havara taudia ilao-ahudia?  
**17** Iehova basinema durugu,  
lau laumagu na asi reġereġena tanona bema  
hanoho haraġa.  
**18** Lau banava nato “Aegu e dedimu” negana ai,  
Iehova e, emu hebogahisi ese e dogogu tao;  
**19** Ialogu e hekwarahi momomu negadia ai,  
emu tauhalo ese laumagu e hamoaleamu.  
**20** Lohia dikadia na oi ida bae hebou diba a?  
Idia ese edia taravatu amo dika e havara-  
iamu.

- <sup>21</sup> Idia na e henega boumu, kara maoromaoro  
taudia edia mauri iabiohona totona;  
idia ese asi edia kerere taudia na e revadia  
mase.
- <sup>22</sup> A Iehova na egu kohoro;  
egu Dirava na egu roho-mauri nadi-ginina.
- <sup>23</sup> Edia kara havara na idia latadai ma baine  
haloua,  
bona edia kara dika daidai baine ha-oredia;  
Iehova iseda Dirava ese baine havahuradia.

## 95

- <sup>1</sup> Aoma, ita ane baita abia, Iehova ena;  
hamaurida nadi-ginina baita moale hisi dae  
henia.
- <sup>2</sup> Ia vairanai baita hebou, ia baita hanamo; ba  
ita moale hisi dae henia mai ihanamolaina  
anedia ida.
- <sup>3</sup> Badina be Iehova na Dirava badana,  
Gaubada hereana, dirava iboudiai e hereadi-  
amu.
- <sup>4</sup> Tanobada ena dobu gabudia na ia imana ai,  
ororo doridia danu iena.
- <sup>5</sup> Davara danu iena, badina be ia ese e karaia;  
tano danu ia imana ese e karaia.
- <sup>6</sup> Aoma, baita toma diho, baita igo diho,  
Iehova, ita ikarada Diravana, vairanai tuida  
baita hadai;
- <sup>7</sup> badina be ia na iseda Dirava;  
ita na iena heubu taudia,  
bona h imana mamoeida.

Hari dina ai gadona boma kamonai bema namo.

- <sup>8</sup> Lalomui basio ha-aukadia, Meriba ai  
heğereğerena,

eiava Masa tano-ḡagaena ai o nohova dinana  
ai na heto.

<sup>9</sup> Una negana ai senemui ese e tohoku;  
ena be egu ḡaukara vada e itaia,  
to e dibaḡanigu.

<sup>10</sup> Laḡani hari-ahui una uru na inai heniava,  
nato: Idia na lalo-kerere besena,  
egu dala asie badinaiamu.

<sup>11</sup> Taunabunai egu badu ai na gwau hamata,  
idia na egu laḡa-ani ai basie vareai nato.

## 96

<sup>1</sup> Ane matamatana avabia, Iehova ena;  
tanobada idoinai, ane avabia, Iehova ena.

<sup>2</sup> Ane avabia, Iehova ena; ia ladana ba hanamoa;  
daba daba iboudiai ena hahemauri ba  
herevalaia,

<sup>3</sup> Tanobada besedia bogaragidiai ia hairaina ba  
gwauraia hedinarai,  
ena hoa karadia danu taunimanima iboudiai  
bogaragidiai.

<sup>4</sup> Badina be Iehova na bada ia ihanamona danu  
baine bada;  
ia mo bae matauraia, dirava idaudia iboudiai  
na basie matauraidia.

<sup>5</sup> Badina be bese idau-idau edia dirava na  
kaivakuku mo,  
a Iehova ese guba vada e karaia.

<sup>6</sup> Hemataurai bona heimodai na ia vairanai,  
goadha bona hairai na ena dubu ai.

<sup>7</sup> Bese idau-idau taumui kikina badana, Iehova ba  
herevalaia,

hairai bona goada ba gwaurai, Iehova ena;

<sup>8</sup> hairai ba gwauraia, Iehova ladana ena,

boubou ġauna ba mailaia, ena ikoukou ai ba  
raka vareai.

<sup>9</sup> Dabua helaġadiah ai Iehova ba toma henia diho;  
tanobada idoinai, ia vairanai ba heude-  
heude.

<sup>10</sup> Bese idau-idaubogaragidiai baoto: Iehova na  
pavapava.

Oibe, tanobada vada e haginia, basine marere  
ela bona hanaihanai.

Ia ese tanobada besedia baine hahemaoro hen-  
dia, mai maoromaorona ida.

<sup>11</sup> Guba baine moale, tanobada baine hisi dae,  
davara baine lolo, mai lalona ġaudia iboudiai  
ida;

<sup>12</sup> uma danu bae moale, mai anidia iboudiai.  
Una negana ai uda audia iboudiai na moale ane-  
dia bae abi

<sup>13</sup> Iehova vairanai.  
Badina be ia na e maimu,  
tanobada iħahemaoro henina totona e  
maimu.

Ia ese tanobada baine hahemaoro henia mai  
maoromaorona ida,  
bese idau-idaubaudia baine hahemaoro hen-  
dia mai momokanina ida.

## 97

<sup>1</sup> Iehova na pavapava, tanobada baine moale,  
kone tanodia momo bae hisi dae.

<sup>2</sup> Ori bona dagadaga ese e ġeġea ahumu,  
kara maoromaorodia bona hahemaoro  
goevaġgoevadia na ena terono badidia.

<sup>3</sup> Lahi na ia vairanai e daemu,  
inaina e aradia eva-evamu.

- <sup>4</sup> Ena kevaru ese tanobada idoinai e hadiariamu;  
tanobada ese e itaiamu, bena e heude-  
heudem.
- <sup>5</sup> Ororo na e vevemu *wax* na heto, Iehova vairanai,  
tanobada idoinai Lohiana vairanai.
- <sup>6</sup> Guba ese ena kara maoromaorodia e gwauraidia  
hedinaraimu;  
bese iboudiai na ia hairaina e itaiamu.
- <sup>7</sup> Ģau laulaudia e toma henidia dihomu taudia  
iboudiai na e hahemaraidiamu,  
kaivakuku asi anidia e heāgilaidiamu taudia  
danu;  
dirava iboudiai na ia vairanai e goru dihomu.
- <sup>8</sup> Iehova e, Siona e kamonaimu, bena e moalemu,  
Iuda natuna kekenidia na e hisi daemu,  
oiemu hahemaoro herevadia daidai.
- <sup>9</sup> Badina be, Iehova e, oi na herea dae tanobada  
idoinai daenai;  
oi na o heabi isi hereamu dirava iboudiai  
daedai.
- <sup>10</sup> Iehova ese kara dika e inai heniamu taudia na e  
ura henidiamu;  
ia ese ena helāga taudia e hamauridiamu,  
kara dika taudia imadia amo e harohodia  
maurimu.
- <sup>11</sup> Diari na e taramu, kara maoromaoro taudia  
edia;  
moale na e varamu, lalo-ğoevağoeva taudia  
edia.
- <sup>12</sup> Kara maoromaoro taumui iboumui ai, Iehova  
ba moalelaia,  
ia ladana helāgana ba heatolaia.

## 98

<sup>1</sup> Ane matamatana avabia, Iehova ena;

- ia ese hoa karadia vada e kara.  
 Ia imana idibana, ia imana helañana ese  
 kwalimu vada e abia, ena.
- <sup>2</sup> Iehova ese ena kwalimu vada e hahedinaraia,  
 ena kara maoromaoro vada e hamomokania,  
 bese idau-idau vairadai.
- <sup>3</sup> Ena hebogahisi bona ena heabidadama Israel  
 garana ediai  
 vada e lalo tao;  
 tanobada dokodia iboudiai ese  
 eda Dirava ena kwalimu vada e itaia.
- <sup>4</sup> Iehova ba moale hisi dae henia, tanobada  
 idoinai;  
 moale anedia ba lada isi, hahenamo anedia  
 bavabi.
- <sup>5</sup> Gitara anedia amo Iehova ba hanamoia,  
 gitara bona ane reğedia amo;
- <sup>6</sup> kibi badadia bona kibi marağidia reğedia amo ba  
 moale hisi dae,  
 Pavapava Iehova vairanai.
- <sup>7</sup> Davara reğena baine dae, bona e hahonuamu  
 ġaudia iboudiai,  
 tanobada, bona e noholaiamu taudia  
 iboudiai.
- <sup>8</sup> Abata na imadia bae patapata,  
 ororo na moale anedia bae abi hebou  
<sup>9</sup> Iehova vairanai.
- Badina be ia na e maimu,  
 tanobada baine biagua totona;  
 ia ese tanobada baine hahemaoro henia mai  
 maoromaorona ida,  
 bona bese idau-idau ahudia korikoridua baine  
 henidia.

## 99

- <sup>1</sup> Iehova na pavapava, bese idau-idau bae heude-heude;  
 ena terono ai e helaimu, kerubi latadiai;  
 tanobada na baine laga.
- <sup>2</sup> Iehova na herea dae Siona ai;  
 ia na e heabi isimu, bese iboudiai daediai.
- <sup>3</sup> Oi ladamu herea-daena, oi ladamu mai garina,  
 bae hanamoai;  
 ia na Helaāga.
- <sup>4</sup> Siahu Pavapavana, oi ese hahemaoro  
 īgoevaīgoevadia o ura henimu,  
 oi ese taunimanima ahudia korikoridia o  
 henidiamu;  
 oi ese hahemaoro īgoevaīgoevadia o karamu,  
 bona kara maoromaorodia, Iakob garana  
 ediai.
- <sup>5</sup> Iehova, iseda Dirava, ba heatolaia,  
 ia aena ihadaina īgauna vairanai ba toma diho:  
 ia na Helaāga.
- <sup>6</sup> Mose bona Aaron na iena hahelaāga taudia raru,  
 Samuel na ia ladana e hahaneava taudia ta.  
 Iehova e tai henia, bena ia ese e haere henidia,  
<sup>7</sup> ori dubuna lalona amo ia ese e hereva henidia.  
 Idia ese iena hahegāni e badinadia,  
 bona e henidia taravatudia danu.
- <sup>8</sup> Iehova e, ai emai Dirava, oi ese o haere henidia;  
 oi na dika igwau-taona Diravana idia ediai,  
 to, edia kerere davadia ihenidia Diravana  
 danu.
- <sup>9</sup> Iehova eda Dirava ba heatolaia,  
 ena ororo helaāgana ai ba toma diho;

badina be Iehova, eda Dirava, na helaāga.

## 100

- <sup>1</sup> Tanobada idoinai, Iehova ba moale hisi dae henia.  
<sup>2</sup> Iehova isiaina ba lao hen i mai moalemui ida,  
     ia vairanai baoma mai anemui ida.  
<sup>3</sup> Umui ba diba Iehova na Dirava.  
     Ia ese e karada, ita na iena;  
     ita na ia besena, bona ena heubu mamoedia.  
<sup>4</sup> Ena ikoukou ai ba raka vareai mai hahenamomui ida,  
     ena dubu ai danu mai anemui ida  
     ia ba hanamoa, ia ladana ba imodaia.  
<sup>5</sup> Badina be Iehova na namo;  
     ena hebogahisi na e hesiri hanaihanaimu,  
     bona ena heabidadama ela bona uru iboudiai.

## 101

- <sup>1</sup> Hebogahisi bona hahemaoro ġoevaġoevana baina aneiaid; Iehova e, oiemu ai egu ane baina abi.  
<sup>2</sup> Asi kerere dalana baina badinaia:  
     edenia nega ai dekegu ai baoma?  
     Mai lalo-ġoevaġoevagu ida baina raka,  
     egu rumalalonai;  
<sup>3</sup> lau matagu vairadai,  
     ġau mirona ta basina atoa.

Raka muri taudia edia ġaukara na inai heniamu;  
     lau na basina badinaia;  
<sup>4</sup> Ialo-gagevagageva na lauegu amo baine daudau;

kara dika ta basina dibaia.

<sup>5</sup> Ia dekena tauna e habadelaia hehunimu tauna  
na  
lau ese baina alaia mase;  
e hekokorokumu bona lalona e heagimu tauna na  
lau basina haheauka henia.

<sup>6</sup> Heabidadama taudia ina tano ai baina lalo namo  
henidia  
idia na lau dekegu ai bae noho;  
asi kererena dalana ai e rakamu tauna ese  
lau isiaigu baine lao henia.

<sup>7</sup> Koikoi karadia e karamu tauna na  
lauegu ruma ai basine noho;  
koikoi herevadia e gwauraimu tauna na  
lau vairagu ai basine noho.

<sup>8</sup> Daba ta ta amo kara dika taudia ina tano ai na  
iboudiai baina aladia mase;  
kara havara taudia iboudiai na  
Iehova ena hanua amo baina luludia oho.

## 102

<sup>1</sup> Iehova e, egu noinoi a kamonai;  
egu taitai na dekemu aine vasi,

<sup>2</sup> Oi vairamu na egu amo basio hunia,  
egu hisihisi dinana ai.

Taiamu ae kirara egu ai;  
baina boiboi dinana ai ba haere henigu  
haraña.

<sup>3</sup> Badina be egu mauri dinadia na e lao bubunimu,  
kwalahu na heto;

turiagu na e aramu, lahi hururuna na heto.

<sup>4</sup> Lalogu na vada e kakoro, rei na heto, bena vada  
e marai;

- agu aniani ianina na reaiamu.
- 5 Egu āganaāgana bada dainai,  
tau-anigu na e varoda-varodamu.
- 6 Lau na boebedi tano āgāena ai na heto,  
eiava baimumu gahu āgāena ai na heto.
- 7 Na noga ranimu;  
lau na manu edeana ta rumu guhina ai na  
heto.
- 8 Dina idoinai inaigu ese e ihi-ihiraigumu;  
e kirikirilaigumu taudia ese lau ladagu na  
hahedika āgauna ai e halaoamu.
- 9 Badina be kahu na aniamu, aniani āgauna na heto,  
bona iruru-mata na agu inuinu āgauna ida na  
buloamu,
- 10 emu lalo-dika bona emu badu daidiai;  
badina be oi ese vada o abigu isi bona ma o  
tahogu nege.
- 11 Egu mauri dinadia na dina e dihomu  
ikerukeruna na heto;  
na maraimu, rei na heto.
- 12 Iehova e, oi na o lohia, bainela hanaihanai;  
oi ladamu na e hesiriumu ela bona uru  
iboudiai.
- 13 Oi na ba tore isi, Siona ba bogaia hisi;  
ilalonamo-henina negana binai,  
o gwauraia hamata negana vada e gini dae.
- 14 Badina be emu hesiai taudia ese ia nadina e  
lalokau henidiamu  
ia āgahuna e bogaia hisimu.
- 15 Bese idau-idau ese Iehova ladana garina bae  
gari,  
tanobada pavapavadia iboudiai ese oi  
hairaimu garina bae gari.

- <sup>16</sup> Badina be Iehova ese Siona baine haginia,  
mai hairaina ida baine hedinarai.
- <sup>17</sup> Ia ese ogogami taudia edia ġuriġuri baine lalodia,  
bona edia noinoi na basine dadaraidia.
- <sup>18</sup> Ina na bae toreia, uru gabedia edia,  
do asie vara taudia ese Iehova bae imodaia  
totona:
- <sup>19</sup> ia na ena gabu helaġana amo e roha dobi,  
guba amo Iehova ese tanobada e nenea,
- <sup>20</sup> iġui taudia edia ġanaġana baine kamonai  
bona e revadia mase taudia baine ruhadia  
nege helaoreana,
- <sup>21</sup> Siona ai taunimanima ese Iehova ladana bae  
gwauraia,  
bona Ierusalem ai bae imodaia totona.
- <sup>22</sup> Una negana aï bese idau-idau bona basileia  
idau-idau bae hebou,  
Iehova bae toma henia diho.
- <sup>23</sup> Egu mauri dinadia bogaragidiai ia ese egu  
goadia vada e abia oho,  
egu mauri dinadia vada e hagadoidia.
- <sup>24</sup> Lau na tomamu: Egu Dirava e,  
egu mauri dinadia bogaragidiai basio abigu  
daudau;  
oi emu laġani na e hesiriumu,  
uru iboudiai lalodiai.
- <sup>25</sup> Oi ese gunaguna tanobada badina o hadaia,  
guba danu oi imamu ese e karaia.
- <sup>26</sup> Idia na bae ore, a oi na ba hesiri;  
idia iboudiai na bae mouka-mouka, dabua na  
heto.  
Oi ese o bolodiamu, hahedoki na heto,

bena idia na e boiomu;

<sup>27</sup> a oi na so idaumu, bona emu laḡani na asi dokodia.

<sup>28</sup> Emu hesiai taudia natudia na bae noho namon-amo;  
idia garadia na vairamu ai bae gini.

## 103

- <sup>1</sup> Laumagu e, Iehova ba hanamoa;  
lalugu idoinai, ia ladana helaḡana ba hanamoa.
- <sup>2</sup> Laumagu e, Iehova ba hanamoa;  
ena harihari-bada iboudiai na basio lalo boio.
- <sup>3</sup> Ia ese emu kara dikadia iboudiai e gwau taomu,  
ia ese emu gorere iboudiai lalodia amo e hamaurimumu.
- <sup>4</sup> Emu mauri ia ese mase gurina amo e rauaiamu,  
ia ese oi kwaramu na heuraheni bona hebo-gahisi e havavalaiamu.
- <sup>5</sup> Emu goada na ia ese ġau namodia amo e ubuamu;  
una dainai emu eregabe na e hamatamatiamu ugava na heto.
- <sup>6</sup> Daġedāġe ese vada e hadikadia taudia iboudiai na Iehova ese e kara maoromaoro henidiamu,  
bona e hahemaoro henidia ġoevaġoevamu.
- <sup>7</sup> Ia ese ena dala na Mose e hadibalaia,  
ena kara danu Israel taudia e hadibalaidia.
- <sup>8</sup> Iehova na mai ena hebogahisi bona mai ena harihari-bada;  
ena badu na e halahemu, ena hebogahisi na e honu honu daemu.
- <sup>9</sup> Ia na basine gwau henida hanaihanai,  
ena badu na basine mia hanaihanai.
- <sup>10</sup> Eda kara dika heġereġeredia se kara henidamu,  
eda kara havara na davadia se henidamu.

- 11** Badina be guba bona tanobada padadia na bada  
herea heğereğerena,  
iena hebogahisi na unu e bada tomamu ia  
garina e garimu taudia ediai;
- 12** laurabada kahana bona lahara kahana padadia  
edia daudau heğereğerena,  
eda kara dika na ita eda amo unu e abidia oho  
tomamu.
- 13** Tamana ese natuna e bogadia hisimu  
heğereğerena,  
Iehova ese ia garina e garimu taudia na unu e  
bogadia hisi tomamu.
- 14** Badina be ede e karada toma na ia dibana;  
ia vada e helalo une, ita na tano ġahuna mo.
- 15** Taunimanima ena mauri dinadia na rei na heto,  
au heraheradia na heheto e tubumu;
- 16** badina be lai e odaiamu, bena vada e boiomu;  
ena gabu na basine itaia lou.
- 17** A Iehova ena hebogahisi na sene ereguna amo,  
doini mia,  
bona baine mia ela bona hanaihanai,  
ia garina e garimu taudia ediai;
- ena kara maoromaoro danu,  
uru gabedia ediai;
- 18** ena taravatu e badinaiamu taudia ediai,  
bona ena haheğani e lalo taomu bona e  
karamu taudia ediai.
- 19** Iehova ese ena terono na guba ai vada e hadaia;  
ena basileia ese taunimanima iboudiai e lo-  
hiadiamu.
- 20** Iehova ena aneru, ia ba hanamo;  
umui goada taumui, ena hereva o badinamu,

bona erena o kamonaimu.

<sup>21</sup> Ena tuari oreadia iboumui ai, Iehova ba hanamoa;  
 ena hesiai taumui, ena ura o karamu taumui.

<sup>22</sup> Iehova ena karakara ġaudia iboumui ai, ia ba hanamoa,  
 ia e lohiadiamu gabudia iboudiai lalodai.  
 Laumagu e, Iehova ba hanamoa.

## 104

<sup>1</sup> Laumagu e, Iehova ba hanamoa.  
 Iehova, egu Dirava, oi na herea dae.  
 Hairai bona siahu vada o riodia,  
<sup>2</sup> diari vada o hahedokilaia, dabua na heto.  
 Guba vada o idia roro, dabua kalagana na heto,  
<sup>3</sup> emu rumu mukurodia na ranu latadiiai vada  
 o atodia,  
 ori na emu kariota ai o halaodiamu,  
 lai hanidia ai o guimu;  
<sup>4</sup> lai na emu gwaukau taudia ai o halaodiamu,  
 lahi mai hururudia ida na emu hesiai taudia.

<sup>5</sup> Tanobada na ia badina latanai vada o hadaia,  
 una dainai nega ta basine heude-heude diba.  
<sup>6</sup> Gadobada amo o tarua ahu, dabua heġereġerena;  
 utu-utu ese ororo e habubunidia.  
<sup>7</sup> O gwau henia negana ai na e karoho,  
 emu guba rahurahu reġena dainai e heau.  
<sup>8</sup> Ororo e dae, koura e diho;  
 edia gabu o gwauraidia hidi, bena unua ela.  
<sup>9</sup> Hetoa o karaia, idia basie hanaia,  
 una dainai tanobada basie habubunia lou.

<sup>10</sup> Ranu o halohidia dae koura ai,

- unu ranu na ororo padadia amo e aru e laomu;
- 11** uda boromadia iboudiai adia ranu e henidiamu,  
uda donikidia ranu e inumu;
- 12** idia badibadidiai atai manudia na edia ruma e karamu,  
au rigidia lalodiae taimu.
- 13** Emu noho gabuna na atai ai, unu amo ororo o hapariparidiamu;  
emu ġaukara huahuadia ese tanobada e hanouamu.
- 14** Rei o havaraiamu, boromakau adia,  
bona hadohado ġaudia, taunimanima edia;  
aniani na tano amo bae abia totona,  
**15** bona vine ranuna, taunimanima lalodia ihamoaledia,  
bona dehoro, idia vairadia ihakimoredia,  
bona flaoa, taunimanima lalodia ihagoadalaidia.
- 16** Iehova ese ena au e hapariparidia badamu,  
Lebanon ena sida audia, ia ese e hado ġaudia.
- 17** Idia lalodiae manu ese edia ruma e karamu;  
boğe na beroso\* audia ai e nohomu.
- 18** Ororo badadia na uda nanidia edia gabu;  
nadi hagahagadia na koni† edia komu gabudia.
- 19** Hua vada o karaia, nega hetoadia;  
dina na ena diho negana na mai dibana.
- 20** Dibura o karaiamu, bena hanua vada e boimu;  
una negana ai uda ġaudia iboudiae raka lasimu.

---

\* **104:17** “beroso” na au ta ladana, Heberu gado ai.      † **104:18**  
“konī” na uda ġauna maragina ta, mada na heto.

- 21 Leona natudia e ġoumu, adia vamu e tahumu,  
Dirava enai edia aniani e tahumu.
- 22 Dina e daemu, idia na e raka ohomu,  
edia kohua ai e hekuremu.
- 23 Taunimanima na e raka lasimu, e ġaukaramu,  
e hekwarahimu ela bona adorahi.
- 24 Iehova e, o kara ġaudia dahaka ini heġiġi-boudia;  
iboudiai na mai aonegamu ida vada o kara,  
o kara ġaudia ese tanobada e hahonuamu.
- 25 Davara bunai, bada herea bona mai lababana,  
ia lalonai na ġau momo, diaġau duahiduahi,  
mauri ġaudia, maraġidia bona badadia.
- 26 Unuseni ai lagatoi na e heaumu;  
bona lakara donodono, oi ese o karaia,  
davara ai baine gadara loaloa totona.
- 27 Ini ġau iboudiai ese oi e haġeremumu,  
aniani negadia ai adia ba henidia e tomamu.
- 28 O henidiamu negadia ai na idia ese e abi isimu;  
oi imamu o kehoamu negadia ai na idia bogadia e kunumu, ġau namodia ai.
- 29 Oi vairamu o huniamu negadia ai na daradia e  
dokomu;  
idia laġadria o abi ohomu negadia ai na e  
masemu,  
ġahu ai ma e lou heniamu.
- 30 Oi laumamu o siaia laomu negadia ai, idia na e  
varamu,  
tanobada kopina o hamatamatia.
- 31 Namona binai: Iehova hairaina baine hesiriu  
hanaihanai;  
Iehova ese ia e kara ġaudia na baine moale-laidia.
- 32 Ia ese tanobada e raraiamu,

bena tanobada na e heude-heudem;  
 ia ese ororo e daudia tohomu,  
     bena kwalahu na doridia amo e daemu.  
<sup>33</sup> Lau ane baina abia Iehova ena, egu mauri dina-  
     dia iboudiai;  
     egu Dirava na egu ane ai baina hanamo, na  
         mauri nohomu ai.  
<sup>34</sup> Egu lalo-hadai na ia ihamoalelaina īgauna ai  
         bema lao,  
     badina be lau ese Iehova na moalelaiamu.  
<sup>35</sup> Kara dika taudia na tanobada ai bae mase ore,  
     bona kara havara taudia na bae puki be  
         namo.  
 Laumagu e, Iehova ba hanamo.  
     Iehova ba imodaia.

## 105

<sup>1</sup> Iehova ba hanamo, ia ladana ba hahanea;  
     ena kara ba gwauraidia hedinarai bese idau-  
         idau vairadiai.  
<sup>2</sup> Ane bavabi iena, ia ihanamolaina anedia bavabi,  
     ena hoa karadia iboudiai sivaraidia ba gwau-  
         rai.  
<sup>3</sup> Ia ladana helāgana ba heatolaia;  
     Iehova e tahuamu taudia lalodia do bae  
         moale.  
<sup>4</sup> Iehova ba tahua, bona ena goada danu;  
     ia vairana ba tahua loulou.  
<sup>5-6</sup> Ena hesiai tauna Abraham garana e!  
     Iakob natuna, ena abi-hidi taudia, e!  
 Hoa karadia ia ese vada e kara ba lalodia tao,  
     ena siahu karadia bona ena hahemaoro here-  
         vadia danu.  
<sup>7</sup> Ia na Iehova, eda Dirava;

- ena hahemaoro na tanobada idoinai e mi-  
    amu.
- <sup>8</sup> Ia ese ena gwauhamata e laloa hanaihanaimu,  
    bona ena hahegani herevadia danu ela bona  
    uru daha.
- <sup>9</sup> Abraham ida e hegwauhamata heheni,  
    Isaak e gwau henia hamata;
- <sup>10</sup> Iakob enai e hamomokania, taravatu ai bainela,  
    Israel enai baine mia hanaihanai ġauna.
- <sup>11</sup> Eto “Kanaan tanona baina henimu,  
    oi ahumu korikori ai bainela”.
- <sup>12</sup> Idia na dounu gagadoi,  
    asi haridia, e noho hedoava una tano ai,
- <sup>13</sup> bese ta bese ta lalodia amo e loa eva-evava,  
    basileia ta lalona amo ela bona ma orea ta ai;
- <sup>14</sup> una negana ai ta asine gwau maoro henia idia  
    baine dağedağe henidia;  
    hanua pavapavadia ia ese e gwau henidia,  
    idia daidai.
- <sup>15</sup> Eto “Vada na horodia taudia basio daudia toho,  
    egu peroveta taudia na basio hadikadia”.
- <sup>16</sup> Doe e gwauraia tano latanai,  
    aniani ġaudia iboudiai e utudia oho;
- <sup>17</sup> una negana ai ia ese idia edia amo tau ta e siaia  
    guna;  
    ladana na Iosef, e hoia, hesiai tauna ai ela.
- <sup>18</sup> Ia aena na auri gadeadia ese e haberodia,  
    ia aiona na auri amo e ġuia;
- <sup>19</sup> Iehova ena hereva ese e dibaia toho,  
    ela bona e gwaurai guna ġaudia vada e hekara.
- <sup>20</sup> Hanua Pavapavana ese haida e siaidia, bae  
    ruhaia nege,  
    bese lohiana ese e kahua nege;

- 21 ena rumia inarina tauna ai e halaoa,  
     bona ena kohu iboudiai iregudia ai ela,
- 22 ena hanua lohiadia baine hadibadia ena ura  
     heğereğerena  
     bona ena tau badadia baine ha-aonegadia  
     totona.
- 23 Bena Israel na Aigupto ema,  
     Iakob na Ham ena tano ai e nohova.
- 24 Bona Iehova ese ena orea taudia e hahutumadia,  
     e hagoaadadia, ela bona idia vada e goada,  
     inaidia vada e manoka.
- 25 Bena ia ese inaidia lalodia e ha-idaudia,  
     ena orea taudia bae inai henidia,  
     bona ena hesiai taudia bae koidia.
- 26 Ia ese Mose e siaia,  
     bona Aaron danu, ena abi-hidi tauna;
- 27 raruosi ese iena toa e karava, taunimanima  
     bogaragidiae,  
     hoa karadia danu, Ham ena tano ai.
- 28 Dibura e siaia, tano e hadiburaia,  
     to idia ese iena hereva e gwaua ede ede.
- 29 Edia ranu na rara ai e halaoa,  
     edia gwarume e hamasedia.
- 30 Parapara e hahegigia bou edia tano ai,  
     edia pavapava edia rumia ai danu.
- 31 Ia e gwau isi, bena lao momo ema,  
     bona namo momo danu, edia tano idoinai.
- 32 Medu-hetari na latadiae e hadihoa,  
     bona kevaru danu edia tano idoinai e hakevarua isi.
- 33 Edia vine bona edia suke audia e hakwaidudia,  
     bona edia tano audia iboudiai e hagaridiae.

- 34 Ma e gwau isi, bena kwadi ema,  
     bona kwadi natudia asi iduahidia;
- 35 edia tano reina idoinai bona edia uma anidia  
     danu  
     e ani ore.
- 36 Natudia roboadia iboudiai edia tano ai na e  
     aladia mase,  
     edia goada anidia roboadia iboudiai.
- 37 Bena Israel taudia na ia ese e hakaudia lasi,  
     mai edia *silver* bona *gold* ida;  
     ena iduhu iboudiai lalodiae  
     tau ta se hetutuhi.
- 38 E raka lasi negana ai Aigupto e moaleva,  
     badina be idia garidie e gariva.
- 39 Ori e hapapaia, idia igovadie,  
     bona lahi, hanuaboi ai edia diari ai bainela.
- 40 Idia e noinoi, bena ia ese kibi e siaidie,  
     bona aniani momo na guba amo e henidie  
     dobi.
- 41 Nadi hagahaga e hapararaia, bena ranu e aru  
     lasi,  
     tano ġaġaena ai e aruva, sinavai na heto.
- 42 Badina be ena gwauhamata helaġana e laloa tao,  
     bona ena hesiai tauna Abraham danu.
- 43 Ena orea taudia na unu e hakaudia lasi toma  
     mai moaledie ida,  
     ena abi-hidi taudia mai anedia ida.
- 44 Bese idau-idau edia tano ia ese e henidie;  
     beni idia ese unu bese taudia edia biru anidia  
     e abi,
- 45 ena hahedua karadia bae kara  
     bona ena taravatu bae badinadie helaoreana.
- Iehova ba imodaia!

# 106

<sup>1</sup> Iehova ba imodaia!

Iehova ba hanamo, badina be ia na namo,  
ena hebogahisi na e hesiriu hanaihanaimu.

<sup>2</sup> Daika ese Iehova ena siah karadia baine  
herevalaidia?

Daika ese ena heimodai karadia iboudiai  
baine hahedinaraidia?

<sup>3</sup> E hahemaoro goevañoevamu bona nega iboudiai  
kara maoromaoro e karamu  
taudia na nanamo.

<sup>4</sup> Iehova e, emu orea taudia ba hanamodia negana  
ai na lau danu ba lalogu;

ba hamauridia negana ai na lau danu ba du-  
rugu;

<sup>5</sup> unu amo emu abi-hidi taudia edia namo  
ihabadana baina itaia,  
emu orea taudia edia moale baina moalelaia,  
bona oi ahumu baina heágilaia.

<sup>6</sup> Ai bona tamamai vada a kerere,  
vada a kara dika, vada a kara havara.

<sup>7</sup> Senemai na Aigupto ai e nohova negana ai na  
oiemu hoa karadia asie haerodia;  
asie laloa tao emu hebogahisi na bada herea,  
a Davara Kakakakana isena ai idia ese Herea  
Mikamika e gwau ede ede henia.

<sup>8</sup> Ğau tamona ia ese e hamauridia, ia ladana bagu-  
nai,  
ena siah herea-daena baine hahedinarai  
helaoreana.

<sup>9</sup> Ia ese Davara Kakakakana e gwau henia, bena e  
kororova,  
beno dobū gabuna amo e hakaudia hanai,

tano ġaġaena amo bema hakaudia hanai  
heġereġerena.

<sup>10</sup> Unu amo ia ese inaidia imadia amo e hamauridia,  
inai taudia edia siahu amo e harohodia  
mauri.

<sup>11</sup> Davara ese idia inaidia e habubunidia,  
ta se roho mauri.

<sup>12</sup> Bena idia ese ena hereva e abidia dae,  
bona ia ihanamolaina anedia e abi.

<sup>13</sup> A idia ese ena kara e lalodia boio haraġa;  
ena hahealo asie nariava.

<sup>14</sup> Idia na tano ġaġaena ai e ura kava ura kavava,  
tano ġaġaena ai idia ese Dirava e dibaġania.

<sup>15</sup> Bena ia ese edia ura e henidia,  
a gorere dikana ta e siaia, idia tau-anidia  
ihavarodavarodadia.

<sup>16</sup> Taruha taudia haida ese Mose bona Iehova ena  
hahelaġa tauna Aaron  
e vaġeġe henidiava.

<sup>17</sup> Una negana ai tano ese uduna e haġaia, Datan e  
hadonoa;

bona Abiram ena orea taudia e habubunidia;

<sup>18</sup> lahi danu e ara edia orea bogaraginai,  
lahi hururuna ese kara dikta taudia e haġoledia  
oho.

<sup>19</sup> Boromakau natuna laulauna e karaia Horeb ai,  
*gold* kaivakukuna e toma henia diho;

<sup>20</sup> Dirava hairaina na e bodoquia,  
boromakau maruanena, rei e aniamu ġauna,  
laulauna na ia gabuna ai e abia.

- 21** Ihamauridia Diravana, Aigupto ai kara badadia  
e karava  
**22** bona Ham ena tano ai hoa karadia e karava  
bona Davara Kakakakana isena ai hahegari kara-  
dia e karava  
Diravana na e laloa boio.
- 23** Taunabunai baine habuadia tari eto,  
a iena abi-hidi tauna Mose na pada ai e gini,  
ia vairanai,  
ena badu baine laoa ahu bena basine habua-  
dia tari helaoreana.
- 24** Bena idia ese tano namo-hereana e dadaraia,  
ien a gwauhamata asie abidadama henia.
- 25** Edia kalaga ai e maumau,  
bona Iehova gadona asie kamonai henia;
- 26** taunabunai ia ese imana e duduia isi, e gwau  
henidia hamata,  
tano ġaġaena ai baine hamorudia,
- 27** bona garadia na baine hakarohodia bese idau-  
idau bogaragidiai,  
baine hakarohodia rohoroho tano idau-idau  
ai eto.
- 28** Peoro ena Baal e badinaia,  
mase iboulaina ġauna e ani.
- 29** Edia kara amo Iehova e habadua,  
bena gorere dikana na ediai e dai hanai;
- 30** Fineha e tore isi, e oro oro,  
bena gorere e doko.
- 31** Una na e gwauraia iena kara maoromaoro;  
uru iboudiai ese bae herevalaia ela bona  
hanaihanai.
- 32** Meriba ranudia badidiai idia ese e habadua,

bona Mose na siriana e reaia, idia daidiae;  
 33 badina be idia daidiae ia lalona e turiariki,  
 bena hereva kavakavadia e gwaurai.

- 34 Idia ese bese idau-idau taudia asie habuadia  
 tari,  
 Iehova ese e hağanidia heğereğerena;  
 35 a unu bese ida e noho hebouva,  
 edia kara e manadalaiva.  
 36 Edia kaivakuku e toma henidia dihova,  
 bena idoa ai ela idia ediae.  
 37 Natudia mamaruanedia bona natudia hahine-  
 dia na  
 boubou ġaudia ai e halaodiava,  
 lauma dikadia iboulaidia.  
 38 Kanaan taudia edia kaivakuku e boudia nega-  
 dia ai na  
 asi edia kerere taudia raradia e hahebubuva,  
 natudia mamaruanedia bona natudia hahinedia  
 raradia;  
 bena rara ese tano idoinai e hadikaiava.  
 39 Unu amo edia kara ese e hamirodiava;  
 lebulebu karadia e karava.  
 40 Bena Iehova ena badu e ġaragħara, ena orea tau-  
 dia ediae;  
 ena abi-hidi taudia e ihi-ihiraidia;  
 41 bese idau-idau taudia imadia ai e atodia,  
 bena e inai henidia taudia ese e biagudia.  
 42 Inaidia ese e dağedaġe henidia,  
 bena edia iġui taudia ai ela;  
 43 nega momo ia ese e ruhadia nege,  
 to lalodia na e gwau ede ede,  
 bona edia kara dikka ese e hahekwa-  
 wanaidia.  
 44 Ĝau tamona, edia taitai e kamonai negadia ai,  
 edia hisihisi e laloa;

- 45** idia daidiae ena gwauhamata e laloa tao,  
 ena hebogahisi bada-herea dainai edia dika e  
 lalo nege.
- 46** Ia ese ibogahisidia dalana e havaraia,  
 unu e ġuidia taudia ese bae bogadia hisi to-  
 tona.
- 47** Iehova e, emai Dirava, a hamaurimai;  
 bese idau-idau bogaragidia amo ba haboumai  
 gogogogo,  
 oi ladamu helaġana baia imodaia totona,  
 oi ihanamomu baia heaġilaia helaoreana.
- 48** Iehova, Israel Diravana, bae hanamoia,  
 matamana amo ela bona dokona.  
 Taunimanima iboudiai na baeto “Amen”.

Iehova ba imodaia!

## 107

- 1** Iehova ba hanamoia;  
 badina be ia na namo,  
 ena hebogahisi na e hesiriu hanaihanaimu.
- 2** Iehova ese vada e hamauridia taudia,  
 hisihisi amo vada e rauadie taudia,
- 3** tano idau-idau amo,  
 laurabada amo bona lahara amo,  
 mirigini amo bona tahodiho amo,  
 vada e haboudia taudia na  
 unu bae gwau toma.
- 4** Haida na tano ġaġaedia ai e loava,  
 bae noholaia hanuana ta dalana asie davaria;
- 5** idia na hitolo bona ranu-mase ese e abidiava,  
 laumadia na lalodiae manoriva.
- 6** Benia edia hisihisi ai idia ese Iehova e tai henia,  
 benia ia ese edia hisihisi amo e hamauridia,

- <sup>7</sup> bona dala maoromaorona amo e hakaudia  
laova,  
ela bona bae noholoia hanuana ai e kau.
- <sup>8</sup> Iehova bae hanamoia,  
ena hebogahisi bona ena hoa karadia tauni-  
mima natudia ediai daidiae.
- <sup>9</sup> Badina be ranu-mase tauna na ia ese e ha-  
inuamu,  
bona hitolo tauna na ġau namodia amo bo-  
gana e hakunuamu.
- <sup>10</sup> Haida na hanuaboi diburana ai e nohova, bona  
lalodia e diburava,  
hisihisi ai bona auri iguidia ai;
- <sup>11</sup> badina be Dirava ena hereva vada e gwau ede  
ede henidia,  
bona Herea Mikamika ena hahealo vada e  
dadaraia.
- <sup>12</sup> Hekwarahi ese lalodia e hametaudia;  
idia na e keto, asi idurudia ta.
- <sup>13</sup> Bena edia hekwarahi lalonai idia ese Iehova e  
tai henia,  
benia ia ese edia hisihisi amo e hamauridia;
- <sup>14</sup> hanuaboi diburana bona lalo-dibura amo e  
hakaudia lasi,  
edia īgui e hamotudia.
- <sup>15</sup> Iehova bae hanamoia,  
ena hebogahisi bona ena hoa karadia tauni-  
mima natudia ediai daidiae.
- <sup>16</sup> Badina be ia ese auri labora-labora iduaradia e  
huaridia,  
bona auri e rahu utu.
- <sup>17</sup> Haida na e goreredia, edia kara dikia daidiae,  
edia kara havara daidiae hisi e ani;
- <sup>18</sup> aniani idau-idau iboudiae e dadaraidiae,

- mase ikoukoudia e raka henidia kahi.
- <sup>19</sup> Edia hisihisi ai Iehova e tai henia,  
     bena ia ese edia hisihisi amo e hamauridia;
- <sup>20</sup> iena hereva e halasia, e hamauridia,  
     hahebua-tari amo e harohodia mauri.
- <sup>21</sup> Iehova bae hanamoaa,  
     ena hebogahisi bona ena hoa karadia tauni-  
         manima natudia ediai daidiae;
- <sup>22</sup> boubou ġaudia bae hahelaġadie mai heimodai  
     herevadia ida,  
     ienaa kara bae gwauraidia hedinarai, edia  
         moale anedia ai.
- <sup>23</sup> Haida na davara ai e laolaova,  
     bona gadobada ai e gaukarava;
- <sup>24</sup> Iehova ena kara e itadia,  
     ena hoa karadia dobu gabudia ai.
- <sup>25</sup> Badina be ia e gwau isi, lai gubana e hatoaia,  
     bena davara hurehuredia na e heabi isi.
- <sup>26</sup> Guba ai e daeva, dobu gabudia ai e dihova,  
     edia hekwarahi ai edia haheauka e veve  
         ohova.
- <sup>27</sup> Matadia e madai-madai, e raraga, kekeretaudia  
     na hehetoo,  
     daradia e doko.
- <sup>28</sup> Bena edia hekwarahi ai Iehova e tai henia,  
     bena ia ese edia hisihisi amo e hamauridia.
- <sup>29</sup> Lai gubana e gwaua tao, bena e vea,  
     bona davara hurehurena e gaima.
- <sup>30</sup> Bena e moaleva, lagadia e aniva dainai;  
     metai gabuna, e ura heniava gabuna, Ialonai  
         e hakaudia vareai.
- <sup>31</sup> Iehova bae hanamoaa,  
     ena hebogahisi bona ena hoa karadia tauni-  
         manima natudia ediai daidiae.

- 32 Bese taudia edia hebou ai bae heatolaia,  
     bona hanua tau-badadia edia henega ai bae  
     imodaia.
- 33 Ia ese sinavai na tano ġaġaena ai e halaodiamu,  
     bona ranu e lohilohimu gabudia na tano  
     kaukaudia ai.
- 34 Tano mai anina na laguta ai e halaoamu,  
     inoholaina taudia edia kara dika daidiae.
- 35 Ma tano ġaġaena na gohu ai e halaoamu,  
     bona tano kaukauna na ranu e lohilohimu  
     gabuna ai.
- 36 Unuseni ai ia ese hitolo taudia e hanohodiamu,  
     bena idia ese hanua ta e hadaiamu, bae noho-  
     laia totona;
- 37 idia ese uma e karamu, bona vine imeadia e  
     hadomu,  
     anidia badadia e abimu.
- 38 lena hahenamo dainai idia na e hutuma e  
     laomu;  
     bona edia seri e gimadiamu, basie gadoi.
- 39 Daġedäge eiava hekwakwanai eiava hisihisi  
     daidiae,  
     idia na e gadoimu bona e morumu,
- 40 una negana ai ia ese pavapava e ihi-  
     ihiraidiamu,  
     e siaidia laomu, tano ġagaedia ai bae loaloa;
- 41 a ogogami taudia na edia hisihisi amo e abidia  
     isimu,  
     bona garadia e hahohodiamu, mamoe seridia  
     na heheto.
- 42 Kara maoromaoro taudia ese e itaiamu, bera e  
     moalemu;

kara dika taudia iboudiai na ududia e hakapumu.

<sup>43</sup> Daika na mai aonegana, ia ese ini ġau do baine lalodia,  
taunimanima ese Iehova ena hebogahisi bae haeroa.

## 108

<sup>1</sup> Lalogu vada eme heġaeġae,

Dirava e, lalogu vada eme heġaeġae;  
ane baina abi, hahenamo anedia baina abi.  
Laumagu e, a nogā.

<sup>2</sup> Ivilikou e, gitara e, a nogā;  
daba mamana baina haoa.

<sup>3</sup> Iehova e, oreá idau-idau bogaragidiai baina hanamomu,  
bese idau-idau bogaragidiai oi ihanamolaimu  
anedia baina abi.

<sup>4</sup> Badina be emu hebogahisi na bada guba daenai,  
oiemu heabidadama na ori ai e kaumū.

<sup>5</sup> Dirava e, guba daenai ba heaġi,  
oi hairaimu na tanobada idoinai baine hedinarai.

<sup>6</sup> Imamu idibana amo ba kahagu, ba haere henigu,  
emu lalokau tauna baine roho mauri totona.

<sup>7</sup> Ena helaġa gabuna ai Dirava vada e gwau  
hamata, eto:

Sekem ihapararana baina heaġilaia,  
Sukoto kourana baina haria.

<sup>8</sup> Gilead na egū; Manase na egū;  
Efraim na kwaragu aurina;  
Iuda na egū dagi auna.

<sup>9</sup> Moab na imagu iħurilaina dihuna;

Edom latanai egu tamaka baina tahoia kau;  
Filistia latanai baina hone.

- <sup>10</sup> Daika ese hanua mai mağuna lalonai baine  
hakaugu vareai?  
Daika ese Edom enai baine hakaugu lao?
- <sup>11</sup> Dirava e, vada o dadaraimai a?  
Dirava e, emai tuari oreadia ida so raka lasi.
- <sup>12</sup> A durumai, inai taudia imadia amo ba hamau-  
rimai,  
badina be taunimanima edia hekaha na asi  
anina.
- <sup>13</sup> Dirava na ita ida baita goada;  
ia ese ita inaida baine moidia tao.

## 109

- <sup>1</sup> Na imodaiamu Diravana e,  
udumu basio hakapua.
- <sup>2</sup> Badina be dika bona koikoi taudia ududia ese lau  
ihadikagu herevadia e gwauraimu,  
maladia mai koikoidia ese lau e hadikagumu.
- <sup>3</sup> Inai herevadia amo e haheğeğegu daemu,  
asi badina e heatu henigumu.
- <sup>4</sup> Egu uraheni davana na e habadelaigumu,  
a lau be na ġuriġurimu.
- <sup>5</sup> E kara dika henigumu, egu kara namo davana;  
e inai henigumu, egu lalokau davana.
- <sup>6</sup> Kara dika tauna ta ba gwauraia hidi, ia  
ihadikana;  
hahebade tauna ta ese baine mailaia,  
ihahemaoro-heninatotona.
- <sup>7</sup> Bae hahemaoro henia negana ai, kererena bae  
gwauraia;  
ena ġuriġuri be kara dikana ai bae halaoa.

<sup>8</sup> Ena mauri dinadia bae gadoi;  
ta ese ena kohu baine dadihai.

<sup>9</sup> Natuna bae ihareha,  
adavana na baine vabu;

<sup>10</sup> natuna bae loa eva-eva, bae noi hegame,  
e kohu rumana e noholaiamu amo bae lulu-  
dia lasi.

<sup>11</sup> Enai e abi torehai tauna ese ena ġau iboudiai  
baine dadihai;  
idau taudia ese ena hekwarahi anina bae  
henao ore.

<sup>12</sup> Asi tauna ta ese baine kara namo henia,  
asi tauna ta ese natuna baine bogadia hisi.

<sup>13</sup> Garana na bae mase ore;  
ladana na baine heroho, uru iharuana ai.

<sup>14</sup> Senena edia kara havara na Iehova vairanai bae  
helalolai une,  
sinana ena kara dika na basine heroho.

<sup>15</sup> Unu kara na Iehova ese baine lalodia hanai-  
hanai,  
a ia ilalolaina na tanobada amo baine boio.

<sup>16</sup> Badina be hebogahisi ihahedinaraina se laloa  
tao,  
a ogogami taudia bona e dabu taudia na ia ese  
e havadia,

hisি ese e gugubadia taudia na ia ese e havadia,  
ela bona edia mase negadia.

<sup>17</sup> Heuduguirai e urava; ia danu bae uduguiraiia;  
hahenamo se urava; iena amo dauhai baine  
mia.

<sup>18</sup> Heuduguirai e hahedokilaia, ena hahedoki  
dabuana na heto,  
ia tauna ai baine dodoa vareai, ranu na heto,  
ia turiana ai baine vareai, digara na heto.

<sup>19</sup> E rioamu dabuana heġereġerena ai bainela,

dina iboudiai gabana ai e ġeġeamu ġauna na heto.

- <sup>20</sup> Davadia bunu e habadelaigumu taudia ese Iehova ena amo bae abi, edia hereva ai egu mauri e hadikaiamu taudia danu.
- <sup>21</sup> A oi, Iehova e, egu Ġaubada, lau daigu ai ba ġaukara, oi ladamu bagunai; ba harohogu mauri, badina be emu hebogahisi na namo.
- <sup>22</sup> Badina be lau be na ogogamimu, na dabumu, lalogu na e hisihisi badamu.
- <sup>23</sup> Vada na boio, adorahi ikerukeruna e boiomu na heto; vada e tapogu oho, kwadi na heto.
- <sup>24</sup> Na anivaga dainai tuigu eme manoka, taugu danu eme varoda-varoda.
- <sup>25</sup> E habadelaigumu taudia ese e ihi-ihiraigumu, e itagumu negadia ai na kwaradia e taiko-taikomu.
- <sup>26</sup> Iehova e, egu Dirava, emu hebogahisi dainai ba hamaurigu.
- <sup>27</sup> Ba hadibadia ina na oi imamu; Iehova e, oi ese vada o karaia.
- <sup>28</sup> Bae heuduguirai, a oi na ba hahenamo, iheatu-henigu taudia na ba hahemaraidia; emu hesiai tauna baine moale.
- <sup>29</sup> E habadelaigumu taudia na hemarai bae hahe-dokilaia; sibodia edia hemarai bae rioa, dabua na heto.
- <sup>30</sup> Lau udugu amo Iehova baina hanamoa,

hutuma bogaragidiai baina imodaia;  
 31 badina be e dabumu tauna imana idibana ai e  
     ginimu,  
     vada e revaia mase taudia imadia amo baine  
     hamauria totona.

## 110

- <sup>1</sup> Iehova ese egu lohia e hamaoroamu, e tomu  
     “Lau idibagu kahana ai ba helai,  
     ela bona oi inaimu na aemu ihadaidia ġaudia ai  
     baina halaodia”.
- <sup>2</sup> Iehova ese ena siahu dagina auna na Siona amo  
     vada e siaia,  
     oi inaimu bogaragidiai ba lohia.
- <sup>3</sup> Emu tuari oreana na ororo helagadia ai ba  
     hakaua lao dinana ai,  
     emu orea taudia ese kunudia bae rahu pou;  
     Daba matana ai, hunu na heto,  
     emu goada matamatana bainema.
- <sup>4</sup> Iehova vada e gwau hamata,  
     bona lalona basine ha-idaua:  
     oi na hahelaġa tauna hanaihanai,  
     Melkisedek ena orea tauna.
- <sup>5</sup> Ĝaubada na oi idibamu kahana ai;  
     ena badu dinana ai pavapava baine huaridia.
- <sup>6</sup> Bese idau idau bogaragidiai hahemaoro baine  
     karaia,  
     edia gabu na mase tau-anidia ai baine ha-  
     honudia;  
     ia ese ikwaradia taudia baine huaridia, tanobada  
     heġġemadai ai.
- <sup>7</sup> Dala ai ia na sinavai ranuna baine inua;  
     taunabunai ia na baine gaga dae.

# 111

<sup>1</sup> Iehova ba imodaia.

Lau ese Iehova baina hanamoai mai lalogu  
idoinai,  
kara maoromaoro taudia edia orea ai,  
hebou taudia bogaragidai.

<sup>2</sup> Iehova ena ġaukara na babada,

e moalelaidiamu taudia iboudiai ese e haero-  
diamu.

<sup>3</sup> Ena ġaukara na mai imatauraina bona mai  
siahuna,

ena kara maoromaoro na e mia  
hanaihanaimu.

<sup>4</sup> Ena hoa karadia vada e kara, taunimanima ese  
bae lalodia tao totona;

Iehova na mai ena harihari-bada bona mai  
ena hebogahisi.

<sup>5</sup> E gari heniamu taudia na adia e henidiamu;  
ena gwauhamata e laloa hanaihanaimu.

<sup>6</sup> Ena oreā taudia na ena kara siahudia e haheita-  
laidia,

bese idau-idau edia tano e henidia negana ai.

<sup>7</sup> Ia imana ġaukaradia na momomokakani bona  
mamaoromamaoro,

ena haheġani iboudiai na mai heabidadama-  
dia.

<sup>8</sup> Idia na bae gini hanaihanai;

taunimanima ese karadia bae kara mai  
momokanidia bona

mai maoromaorodia ida.

<sup>9</sup> Ia ese hahemauri na ena oreā taudia ediai e siai;

ena gwauhamata vada e gwauraia, baine mia  
hanaihanai,

ia ladana na helāġa, bona mai garina.

<sup>10</sup> Iehova igari-henina na aonega imatamana;

e badinaiamu taudia iboudiai na e diba na-  
monamomu,  
ia ihanamona e hesiriu hanaihanaimu.

## 112

<sup>1</sup> Iehova ba imodaia.

Iehova garina e garimu tauna be namo,  
ena hahegani e moalelaidiamu tauna danu.

<sup>2</sup> Ia garana bae goada edia tano ai;

kara maoromaoro taudia edia uru baine  
hanamo.

<sup>3</sup> Moni bona kohu na ena rumai ai,

bona ena kara maoromaoro e hesinu hanai-  
hanaimu.

<sup>4</sup> Diari na dibura ai e taramu, kara maoromaoro  
taudia edia;

Iehova na mai ena harihari-bada bona mai  
ena hebogahisi bona mai ena kara maoro-  
maoro.

<sup>5</sup> E hariharimu bona e henri torehaimu bona ena  
kara e karamu

mai maoromaorona ida tauna be namo;

<sup>6</sup> badina be kara maoromaoro tauna na nega ta  
basine mareremarere;

bae laloa hanaihanai.

<sup>7</sup> Ia na hari dikadia garidia se garimu;

lalona na auka, Iehova e abidadama hen-  
amu.

<sup>8</sup> Lalona na auka, basine gari,

ela bona ena ura baine hedinarai, ana inai  
taudia latadiai.

<sup>9</sup> Vada e harihari momo, ogoāami taudia vada e  
harihari henidia;

ena kara maoromaoro e hesiriu  
hanaihanaimu,

ena doa na mai hairaina ida e heabi isimu.

<sup>10</sup> Kara dika tauna ese e itaiamu, bena e badumu,

gadigadina a hahedaimu, bena e veve ohomu;  
 kara dika tauna ena ura na  
 anina basine vara.

## 113

<sup>1</sup> Iehova ba imodaia.

Iehova ena hesiai taumui, ia ba imodaia,  
 Iehova ladana ba heatolaia.

<sup>2</sup> Iehova ladana na bae hanamoai,

ina harihari ela bona hanaihanai;

<sup>3</sup> dina dae ela bona dina diho,

Iehova ladana na bae heatolaia.

<sup>4</sup> Iehova na atai ai, bese iboudiai daediai;

ia hairaina na guba daenai.

<sup>5</sup> Iehova, eda Dirava, idaina be daika?

Ia na atai ai e helaimu,

<sup>6</sup> e igo dobimu,

guba bona tanobada e nenediamu.

<sup>7</sup> Ia ese ogoğami taudia na ġahu amo e abidia isimu,

e dabumu taudia na kahu gabuna amo e  
 veridia isimu;

<sup>8</sup> pavapava ida e hahelaidia heboumu,

ena orea taudia edia pavapava ida.

<sup>9</sup> Ia ese gabani hahinena na ena noho gabuna e

heniamu,

e hamoaleamu, memero kekeni sinadia ai e  
 halaoamu.

Iehova ba imodaia.

## 114

<sup>1</sup> Israel na Aigupto amo e raka lasi,

Iakob besena na gado-idau taudia edia amo e  
 raka oho,

<sup>2</sup> una negana ai Iuda na ena gabu helāgana ai ela,

- Israel na ena basileia ai ela.  
<sup>3</sup> Davara e itaia, bena e heau,  
     Ioridane sinavaina e lou ela;  
<sup>4</sup> ororo badadia e roho isi roho isi, mamoe ma-  
     maruanedia na heheto,  
     bona ororo maraġidia mamoe-mamoe na  
     heheto.  
<sup>5</sup> Davara e, oi be edeheto, be o heaumu?  
     Ioridane e, oi danu edeheto, be o Ioumu?  
<sup>6</sup> Ororo badadia e, umui be edeheto, be o roho  
     isi roho isimu, mamoe mamaruanedia na  
     heheto?  
     Ororo maraġidia e, umui danu edeheto, be  
     mamoe-mamoe na o hetomu?  
<sup>7</sup> Tanobada e, Ĝaubada vairanai a heude-heude,  
     Iakob ena Dirava vairanai.  
<sup>8</sup> Ia ese haga-nadina na gohu ai e halaoa,  
     vasiga na ranu e lohilohimu gabuna ai e halaoa.

## 115

- <sup>1</sup> Dia ai emai ai, Iehova e, dia ai emai ai,  
     a oi ladamu enai hairai bae henia,  
     emu hebogahisi bona emu heabidadama  
     daidiae.  
<sup>2</sup> Namona be dahaka bese idau-idau baeto  
     “Edia Dirava be edesenai ai?”  
<sup>3</sup> Eda Dirava na guba ai,  
     ena ura heġereġeredia e karamu.  
<sup>4</sup> Idia edia kaivakuku na *silver* bona *gold*,  
     taunimanima imadia e kara ġaudia.  
<sup>5</sup> Mai uduidia, to asie herevamu;  
     mai matadia, to asie itamu;  
<sup>6</sup> mai taiadia, to asie kamonaimu;  
     mai udu-baubaudia, to asie bonabonamu;

- <sup>7</sup> mai imadia, to ġau ta asie daua tohomu;  
       mai aedia, to asie rakamu;  
       bona gadodia na asi reġedua.
- <sup>8</sup> Ikaradia taudia na idia heġereġeredia,  
       bona e abidadama henidiamu taudia  
       iboudiai danu.
- <sup>9</sup> Israel e, Iehova bavabidadama henia;  
       ia na ikahadia bona edia kesi.
- <sup>10</sup> Aaron iduhuna e, Iehova bavabidadama henia;  
       ia na ikahadia bona edia kesi.
- <sup>11</sup> Iehova garina o garimu taumui, Iehova bav-  
       abidadama henia;  
       ia na ikahadia bona edia kesi.
- <sup>12</sup> Iehova vada e laloda tao; ia baine hanamoda;  
       ia ese Israel besena baine hanamo,.  
       ia ese Aaron iduhuna baine hanamo;
- <sup>13</sup> ia ese Iehova garina e garimu taudia baine  
       hanamodia,  
       maraġidia bona badadia danu.
- <sup>14</sup> Iehova ese garamui baine hahutumadia,  
       umui garamui bona natumui garadia.
- <sup>15</sup> Iehova, guba bona tanobada ikaradia Diravana,  
       ia ese baine hanamomui.
- <sup>16</sup> Guba na Iehova ena guba,  
       a tanobada be ia ese taunimanima natudia  
       vada e henidia.
- <sup>17</sup> Mase taudia ese Iehova asie imodaiamu,  
       asi reġereġerena gabuna e lao heniamu taudia  
       danu.
- <sup>18</sup> A ita ese Iehova baita hanamo,  
       hari ina negana amo ela bona hanaihanai.  
       Iehova ba imodaia.

## 116

- <sup>1</sup> Iehova na lalokau heniamu,  
     badina be gadogu bona egu noinoi danu vada  
     e kamonai.
- <sup>2</sup> Badina be taiana vada e kirara egu ai;  
     taunabunai lau ese ia baina boi henia, egu  
     mauri dinadia iboudiai.
- <sup>3</sup> Mase ena idoa e ġeġegu ahuva,  
     mase gabuna hisidia ese e gugubaguva,  
     lalo-hisihisi bona dara-doko danu e alaguva.
- <sup>4</sup> Bena Iehova ladana na hahanea, nato  
     “Iehova e, lau na noi henimumu, ba hamau-  
     rigu”.
- <sup>5</sup> Iehova na mai ena harihari-bada bona mai ena  
     kara maoromaoro,  
     eda Dirava na mai ena hebogahisi.
- <sup>6</sup> Iehova ese asi aonegana tauna e nariamu;  
     na hekwakwanaiva negadia ai e hamau-  
     riguva.
- <sup>7</sup> Laumagu e, emu laġa-ani gabuna ba lou henia,  
     badina be Iehova ese vada e harihari henimu.
- <sup>8</sup> Badina be oi ese laumagu na mase amo vada o  
     rauaia,  
     iruru-matagu vada o dahu oho,  
     aegu vada o rudia, basie hetutuhi.
- <sup>9</sup> Iehova vairanai na rakamu,  
     mauri taudia edia tano ai.
- <sup>10</sup> Ena be lau nato “Vada na hisihisi hereamu”,  
     to egu abidadama na ha-aukaia.
- <sup>11</sup> Egu kudou-hetaha ai lau nato  
     “Taunimanima iboudiai ibadinadia na asi an-  
     ina”.
- <sup>12</sup> Dahaka Iehova baina henia,

- ena harihari-bada idoinai egu ai na davana?
- <sup>13</sup> Hahemauri keherena baina abia isi,  
Iehova ladana baina hahanea.
- <sup>14</sup> Egu gwauhamata anidia na Iehova baina henia,  
ena orea taudia iboudiai vairadiae.
- <sup>15</sup> Iehova vairanai ġau herea-daena na  
ena helaġa taudia edia mase.
- <sup>16</sup> Iehova e, lau na emu hesiai tauna,  
lau na emu hesiai tauna, emu hesiai hahinena  
natuna;  
oi ese iġuigu vada o ruha.
- <sup>17</sup> Oi ihanamomu na egu boubou ġauna ai baina  
halaoa,  
bona Iehova ladana baina hahanea.
- <sup>18</sup> Egu gwauhamata anidia na Iehova baina henia,  
ena orea taudia iboudiai vairadiae,
- <sup>19</sup> Iehova ena rumma maġudia lalodiae,  
Ierusalem e, oi bogaragimu ai.  
Iehova ba imodaia.

## 117

- <sup>1</sup> Bese idau-idau iboumui ai, Iehova ba imodaia;  
orea idau-idau taumui iboumui ai, ia ba  
heatolaia.
- <sup>2</sup> Badina be ena hebogahisi na bada ita edai,  
bona Iehova ena heabidadama na e hesiriu hanai-  
hanaimu.  
Iehova ba imodaia.

## 118

- <sup>1</sup> Iehova ba hanamo, badina be ia na namo;  
ena hebogahisi e hesiriu hanaihanaimu.
- <sup>2</sup> Israel na baineto,  
lena hebogahisi e hesiriu hanaihanaimu.

- <sup>3</sup> Aaron ena iduhu baineto,  
lena hebogahisi e hesiriu hanaihanaimu.
- <sup>4</sup> Iehova garina e garimu taudia baeto,  
lena hebogahisi e hesiriu hanaihanaimu.
- <sup>5</sup> Egu hisihisi lalona amo Iehova na boi henia,  
bena Iehova ese e haere henigu,  
bona e ruhagu nege.
- <sup>6</sup> Iehova na lau badibadigu ai dainai lau na asina  
garimu:  
taunimanima ese ede bae hadikagu toma?
- <sup>7</sup> Iehova na lau badibadigu ai, ikahagu totona;  
e inai henigumu taudia baina hadareredia.
- <sup>8</sup> Iehova enai baita roho mauri be namo,  
taunimanima baita abidadama henidia na  
dika.
- <sup>9</sup> Iehova enai baita roho mauri be namo,  
hanua pavapavadia baita abidadama henidia  
na dika.
- <sup>10</sup> Bese iboudiai e ġeġegu ahu,  
a Iehova ladana ai na hadareredia.
- <sup>11</sup> E geġegu ahu, kaha iboudiai amo e kougu,  
a Iehova ladana ai na hadareredia.
- <sup>12</sup> E daigu kou, nanigo na heheto,  
e hururu-hururu, ava ġinġini e aramu na  
heto,  
a Iehova ladana ai na hadareredia.
- <sup>13</sup> E dorigu lalo-dika, mokona na keto,  
a Iehova ese e durugu.
- <sup>14</sup> Iehova na egu goada bona egu ane;  
ia na vada e hamaurigu.
- <sup>15</sup> A hakala, kwalimu moale anedia,

kara maoromaoro taudia edia kalaga ai;  
 Iehova imana idibana na e āgaukaramu mai  
 kwalimuna ida.

<sup>16</sup> Iehova imana idibana eme heabi isi,  
 Iehova imana idibana na e āgaukaramu mai  
 kwalimuna ida.

<sup>17</sup> Lau na basina mase, a do baina mauri;  
 Iehova ena kara baina gwauraidia.

<sup>18</sup> Iehova ese matagu vada e hakania, mata-  
 hakani aukana amo,  
 a se negegu mase enai.

<sup>19</sup> Kara maoromaoro ikoukoudia na egu ai a keho-  
 dia,  
 bena idia edia amo baina raka vareai,  
 bona Iehova baina hanamoa.

<sup>20</sup> Iehova ena ikoukou binai,  
 kara maoromaoro taudia na iena amo bae  
 raka vareai.

<sup>21</sup> Lau na hanamomumu, badina be vada o haere  
 henigu,  
 bona vada o hamaurigu.

<sup>22</sup> Ruma ilarebana taudia ese e dadaraia nadina  
 na  
 daiguni nadina ai vada ela.

<sup>23</sup> Ina na Iehova ena kara;  
 ta itaiamu, ta hoamu.

<sup>24</sup> Ina na Iehova vada e karaia dinana;  
 ia lalonai baita hisi dae, baita moale.

<sup>25</sup> Iehova e, ai a noimumu, ba hamaurimai;  
 Iehova e, ai a noimumu, kwalimu ba henimai.

<sup>26</sup> Iehova ladana ai e maimu tauna aita hanamoa;

Iehova ena ruma lalona amo vada a hanamo-muimu.

<sup>27</sup> Iehova na Dirava,

ia ese diari vada e henida.

Ba aru lao, imamui mai au heraheradia ida,

ela bona ihaboulaina patana doana.

<sup>28</sup> Oi na egu Dirava, baina hanamomu,

oi na egu Dirava, baina heatolaimu.

<sup>29</sup> Iehova ba hanamoia, badina be ia na namo;

badina be ena hebogahisi e hesiriu hanai-hanaimu.

## 119

<sup>1</sup> Asi edia kerere e rakamu taudia,

Iehova ena taravatu ai e rakamu taudia,  
idia na nanamo.

<sup>2</sup> Ena hahediba herevadia e badinadiamu

bona ia e tahuamu mai lalodia idoidiai taudia,  
idia na nanamo.

<sup>3</sup> Idia na kara dika asie karamu,

a iena dala ai e rakamu.

<sup>4</sup> Oi ese vada o haǵanimai,

emu hahedua herevadia na baia badinadia  
tarika-tarika.

<sup>5</sup> Bama raka balaheni emu taravatu ibadinadia ai  
bema namo,

<sup>6</sup> bena tau ta basine hahemaraigu;

badina be emu haheǵani iboudiai baina  
raraidia tao.

<sup>7</sup> Emu hahemaoro herevadia maoromaorodia

baina diba negadia ai na baina imodaimu,  
mai lalogu maoromaorona ida.

<sup>8</sup> Emu taravatu baina badinadia;

basio negegu daure.

- <sup>9</sup> Eregabe tauna na ede baine raka ġoеваġoева  
toma?  
Ena raka baine gimaia, emu hereva  
heġereġerena.
- <sup>10</sup> Mai lalogu idoinai na tahumumu,  
ba durugu, emu haheġani basina rakatanidia.
- <sup>11</sup> Emu hereva na lalogu ai na balaia henimu,  
emu ai basina kara dika totona.
- <sup>12</sup> Iehova e, oi na namo;  
emu taravatu ba hadibagu.
- <sup>13</sup> Lau udugu bibinadia amo,  
oi udumu ena hahemaoro herevadia na  
gwauraimumu.
- <sup>14</sup> Emu hahediba herevadia dalana na moalelaia  
badamu,  
taġa idoinai na moalelaia maraġimu.
- <sup>15</sup> Emu hahedua herevadia baina haerodia,  
emu dala baina raraidia tao.
- <sup>16</sup> Emu taravatu baina moalelaidia,  
emu hereva na basina laloa boio.
- <sup>17</sup> Emu hesiai tauna ba hanamoa,  
bena baina mauri, bona emu hereva baina  
badinaia.
- <sup>18</sup> Matagu ba hapapa, bena emu taravatu lalona  
amo  
hoa ġaudia baina itadia.
- <sup>19</sup> Lau na noho-kau taugu tanobada ai;  
emu haheġani na egħi amo basio hunidia.
- <sup>20</sup> Laumagu na eme daure,  
nega idoinai emu hahemaoro herevadia na  
ura henidia lalo-dikamu dainai.
- <sup>21</sup> Hekokoroku taudia, vada e baia taudia, oi ese  
vada o gwau henidia;  
idia ese oiemu haheġani vada e rakatanidia.

- <sup>22</sup> Edia ihi-ihirai bona edia hedadarai na egu amo  
bavabi oho,  
badina be oiemu hahediba herevadia vada na  
badinadia.
- <sup>23</sup> Ena be hanua lohiadia na lau ihadikagu totona  
e henega boumu,  
to emu hesiai tauna ese emu taravatu baine  
haerodia.
- <sup>24</sup> Oiemu hahediba herevadia na egu moale ġaudia,  
idia ese e hakaugumu.
- <sup>25</sup> Laumagu na ġahu ai e goru dihomu;  
ba hamaurigu, emu hereva heġereġerena.
- <sup>26</sup> Egu dala na gwauraidia negana ai, oi ese o haere  
henigu;  
emu taravatu ba hadibalaigu.
- <sup>27</sup> Emu hahedua herevadia dalana ba hadibal-  
aigu,  
bena emu hoa karadia baina haerodia.
- <sup>28</sup> Lalo-hisihisi dainai laumagu na e veve ohomu,  
emu hereva heġereġerena ai ba hagoadagu.
- <sup>29</sup> Dala koikoidia na egu amo bavato daudau;  
emu harihari-bada ai emu taravatu ba  
hadibalaigu.
- <sup>30</sup> Heabidadama dalana vada na abia hidi;  
emu hahemaoro herevadia na vairagu ai  
vada na atodia.
- <sup>31</sup> Iehova e, emu hahediba herevadia na badinadi-  
amu;  
ba durugu, tau ta basine hahemaraigu.
- <sup>32</sup> Egu lalo-parara ba habadaia negana ai na  
emu haheġani dalana ai baina heau.
- <sup>33</sup> Iehova e, emu taravatu dalana ba hadibagu,  
lau ese baina badinaia ela bona dokona.

- <sup>34</sup> Lalo-parara ba henigu, emu taravatu baina bad-  
inaia,  
bona baina abia dae mai lalogu idoinai.
- <sup>35</sup> Emu hahegani dalana ai ba hakaugu,  
badina be una dala na moalelaiamu.
- <sup>36</sup> Lalogu na ba hamanadaia, emu hahediba here-  
vadia ai,  
bena basina mata ġaniġani.
- <sup>37</sup> Matagu na ba naridia, ġau asi anidia basie  
haġeredia;  
emu dala ai ba hamaurigu.
- <sup>38</sup> Emu hesiai tauna enai emu gwauhamata ba  
hamomokania;  
una gwauhamata na e gari henimumu taudia  
edia.
- <sup>39</sup> Gwau-gwau, na gari heniamu ġauna, na egu amo  
bavabia oho,  
badina be emu hahemaoro herevadia na  
nanamo.
- <sup>40</sup> A itaia, emu hahedua herevadia na ura henidia  
lalo-dikamu;  
emu kara maoromaoro ai ba hamaurigu.
- <sup>41</sup> Iehova e, emu hebogahisi ba henigu,  
bona emu hahemauri, emu gwauhamata  
heġereġerena.
- <sup>42</sup> Bena e ġonaġonalraigumu taudia na baina haere  
henidia diba,  
badina be emu hereva na abidadama hen-  
amu.
- <sup>43</sup> Hereva momokanina na udugu amo basio abia  
oho vaitani,  
badina be emu hahemaoro herevadia na egu  
helaro.
- <sup>44</sup> Emu taravatu ibadinana basina hadokoa

- ela bona hanaihanai;
- 45** ura-kwalimu ai baina raka,  
badina be emu hahedua herevadia vada na  
tahudia.
- 46** Emu hahediba herevadia danu hanua pava-  
pavadia vairadai baina herevalai,  
bona tau ta basine hahemaraigu;
- 47** badina be emu hahegani na ura henidiamu,  
idia lalodai egu moale na davariamu.
- 48** Emu hahegani, na ura henidiamu gaudia, na na  
matauraidiamu;  
emu taravatu baina haerodia.
- 49** Emu hesiai tauna o henia herevana na ba laloa  
tao,  
ienam amo helaro o henigu.
- 50** Egu hisihisi ai egu tauhalo binai:  
emu gwauhamata ese e hamaurigumu.
- 51** Dirava garina asie garimu taudia ese e  
dadaraigu vaitanimu,  
a emu taravatu amo asina raka muri.
- 52** Emu hahemaoro herevadia gunadia na lalodi-  
amu negana ai,  
Iehova e, taugu na e lomu.
- 53** Badu garaaga ese e abigumu, kara dika taudia  
daidiae,  
idia ese emu taravatu e rakataniamu dainai.
- 54** Emu taravatu na egu ane,  
egu dae-kau rumana ai.
- 55** Iehova e, hanuaboi ai oi ladamu na laloa taomu,  
emu taravatu na badinaiamu.
- 56** Ina hahenamo na egu ai vada e kau,  
emu hahedua herevadia vada na badinadia.
- 57** Iehova na lauegu;

lau na gwau hamatamu, emu hereva baina  
badinadia.

<sup>58</sup> Mai lalogu idoinai na noimumu, ba hanamogu,  
ba bogagu hisi, emu gwauhamata  
heğereğerenä.

<sup>59</sup> Emu dala na haerodia negadia ai,  
aegu na emu hahediba herevadia daladia ai e  
rakamu.

**60** Lau na raka haraǵa-haraǵamu, asina halahemu,  
emu haheǵani ibadinadia ai,

61 Ena be kara dika taudia edia idoa ese e  
idoagumu,  
to emu taravatu asina reajamu.

**62** Malokihi ai na tore isimu, oi ihanamomu totona,  
emu hahemaoro herevadia maoromaorodia  
daidai.

<sup>63</sup> Lau na e gari henimumu taudia iboudiai  
bona emu hahedua herevadia e badinadia  
taudia bamodia.  
<sup>64</sup> Ila n'goumou bokonon ba bokonon ba bokonon ba

<sup>64</sup> Iehova e, tanobada na emu hebogahisi ai eme  
    honu honu dae,  
    emu taravatu ba hadibagu.

<sup>65</sup> Iehova e, emu hesiai tauna vada o kara namo  
henia,  
emu hereva heğereğerena.

<sup>66</sup> Lalo-parara bona aonega ba hadibagu,  
badina be emu hahegani na abi daemu.

<sup>67</sup> Hisihisi do se abigu negana ai na raka muri,  
a harihari emu hereva na badinaiamu.

**68** Oi na namo, bona o kara namomu;  
emu taravatu ba hadibagu.

<sup>69</sup> Dirava garina asie garimu taudia ese hereva  
koikoidia amo e hadikagumu,

a lau ese mai lalogu idoinai emu hahedua  
herevadia na badinadiamu.

<sup>70</sup> Lalodia na digara uduna masemasedia na  
heheto;

a lau na emu taravatu na moalelaiamu.

<sup>71</sup> Hisi na ani be namo,

unu amo emu taravatu na lalo davari.

<sup>72</sup> Udumu taravatuna na namo herea egu ai,

*gold* bona *silver* monidia daha daha e herea-  
diamu.

<sup>73</sup> Oi imamu ese vada e karagu, oromagu vada e  
henigu;

lalo-parara danu ba henigu, emu haheğani  
baina lalo davari helaoreana.

<sup>74</sup> Oi garimu e garimu taudia bae itagu, bena bae  
moale,

badina be emu hereva vada na laroa.

<sup>75</sup> Iehova e, lau dibagu emu hahemaoro herevadia  
na mamaoro,

bona heabidadama ai vada o hahisigu.

<sup>76</sup> Emu lalokau ese taugu ihalona baine lailaia,  
emu hesiai tauna o gwau henia hamata  
heğereğerenen.

<sup>77</sup> Emu hebogahisi na egu ai baine kau, baina  
mauri totona;

badina be emu taravatu na egu moale ġauna.

<sup>78</sup> Dirava garina e garimu taudia na bae hahe-  
maraidia,

badina be edia koikoi amo vada e dibağanigu;  
a lau ese emu hahedua herevadia baina  
haerodia.

<sup>79</sup> Oi garimu e garimu taudia ese lau bae hağeregu,  
ben a emu hahediba herevadia bae dibadia.

- 80 Lalogu na asi kererena baine noho emu taravatu ai,  
bena basie hahemaraigu diba.
- 81 Laumagu ese emu hahemauri e ura henia lalo dikamu;  
emu hereva na laroamu.
- 82 Matagu e vaburamu emu gwauhamata inarina ai;  
na henanadaimu, na toma “Edena nega ai taugu ba haloa?”
- 83 Lau na vine ranuna ivedailaina kopina kwalahu ai e hetau daemu na heto,  
to emu taravatu asina lalodia boio.
- 84 Emu hesiai tauna baine haheauka ela bona edena nega ai?  
Edena nega ai e dağedağe henigumu taudia ba hahemaoro henidia?
- 85 Dirava garina se garimu taudia ese rikiriki vada e karaia, lau iabigu totona,  
idia na emu taravatu asie badinaiamu.
- 86 Emu haheğani iboudiai na momomo kakani;  
kara koikoi amo e hadikagumu; a kahagu.
- 87 Mokona vada e hamasegu tanobada ai,  
a lau ese emu hahedua herevadia asina rakatanidia.
- 88 Emu hebogahisi ai ba hamaurigu,  
bena udumu ena hahediba herevadia baina badinadia.
- 89 Iehova e, emu hereva na  
guba ai e mia hanaihanaimu.
- 90 Emu heabidadama na e hesiriumu ela bona uru.  
iboudiai;

- tanobada vada o hadaia, e gini tutuka-tutukamu.
- 91 Oi o gwau maoro dainai hari dina ai idia na gigini,  
     badina be ġau iboudiai ese oi isiaimu e lao henimu.
- 92 Emu taravatu basinama moalelaia,  
     egu hisihisi ai bama mase.
- 93 Emu hahedua herevadia basina lalodia boio,  
     lasi vaitani;  
     badina be idia edia amo mauri vada o henigu.
- 94 Lau na oiemu, ba hamaurigu;  
     badina be emu hahedua herevadia vada na tahudia.
- 95 Kara dika taudia na e bani taomu, bae alagu mase totona,  
     a lau ese emu hahediba herevadia na haerodiamu.
- 96 Vada na itaia, asi ġauna ta tanobada ai vada e namo guġuru,  
     a emu haheġani na ġamoġa bada.
- 97 Emu taravatu na ura henia lalo dikamu;  
     ia na egu haero-haero ġauna dina idoinai.
- 98 Egu aonega ese inaigu edia aonega e hereaiamu,  
     emu haheġani ese lalogu vada e hapararaia dainai;  
     badina be ia na egu ai hanaihanai.
- 99 Egu lalo-parara ese e hadibagu taudia iboudiai edia lalo-parara e hereadiamu,  
     badina be emu hahediba herevadia na egu haero-haero ġaudia.
- 100 Egu diba ese tatau burukadia edia diba na e hereaiamu,

- badina be emu hahedua herevadia na badi-nadiamu.
- 101 Aegu na dala dikadia iboudiai amo na rudi-amu,  
emu hereva ibadinana totona.
- 102 Emu hahemaoro herevadia amo asina raka siri,  
badina be oi ese vada o hadibagu.
- 103 Emu hereva mamidia egu ai na daka gaiho!  
Edia gaiho mamina ese bada-ranuna gaihona e hereaiamu udugu ai.
- 104 Emu hahedua herevadia ese lalogu vada eme hapararaia,  
una dainai lau ese dala koikoidia iboudiai na inai henidiamu.
- 105 Emu hereva na lau aegu lamepana,  
bona egu dala diarina.
- 106 Vada na gwau hamata, bona egu gwauhamata  
vada na hamomokania,  
emu hahemaoro herevadia maoromaorodia baina badinadia.
- 107 Egu hisihisi na bada;  
Iehova e, ba hamaurigu, emu hereva heğereğerena.
- 108 Iehova e, egu heimodai herevadia bavabi dae;  
emu hahemaoro herevadia ba hadibagu.
- 109 Nega idoinai egu mauri na imagu ai,  
a emu taravatu asina reaiamu.
- 110 Kara dika taudia ese idoa vada e karaia, bae  
idoagu eto;  
a emu hahedua herevadia amo asina raka siri.
- 111 Emu hahediba herevadia na lau ahugu, ela  
bona hanaihanai;

- oibe, idia na lalogu ena moale badina.
- 112 Lalogu vada eme heḡaeḡae, emu taravatu kara-dia baina kara,  
nega iboudiai, ela bona dokona.
- 113 Lalo-rua taudia na inai henidiamu,  
a emu taravatu na ura heniamu.
- 114 Oi na egu komu gabuna bona egu kesi;  
emu hereva na laroamu.
- 115 Kara dika taumui e, egu amo ba raka oho,  
bena egu Dirava ena haheḡani baina badina-dia diba.
- 116 Ba imudagu, emu gwauhamata heḡereḡerena,  
bena baina mauri,  
bona egu helaro ai tau ta ese basine hahe-maraigu.
- 117 Egu imuda ai baola, bena baina mauri,  
bona emu taravatu baina lalodia loulou.
- 118 Emu taravatu amo e raka siri taudia iboudiai  
na o dadaraidiamu;  
oibe, edia aonega na asi anina.
- 119 Tanobada ena kara dika taudia iboudiai na  
negenege ǵaudia ai o halaodiamu;  
taunabunai emu hahediba herevadia na ura  
henidiamu.
- 120 Hidiogu e heude-heudem, oi garimu na  
garimu dainai;  
emu hahemaoro herevadia danu na gari  
henidiamu.
- 121 Vada na kara ǵoevaǵoeva, vada na kara maoro-maoro;  
e daǵedaǵe henigumu taudia imadia ai basio  
rakatanigu.
- 122 Turagu ai baola;

Dirava garina asie garimu taudia ba laodia  
ahu, basie dağedağe henigu.

- 123 Matagu vada eme hesiku, emu hahemauri iro-hana ai,  
bona emu gwauhamata maoromaoro  
ihagūğuruna irohana ai danu.
- 124 Emu hebogahisi heğereğerenai ai emu hesiai  
tauna ba kara henia,  
emu taravatu ba hadibagu.
- 125 Lau na emu hesiai tauna; lalo-parara ba  
henigu,  
bena emu hahediba herevadia baina diba.
- 126 Iehova ena kara baine hedinarai negana vada  
eme kau,  
badina be haida ese emu taravatu vada e  
tataia utu.
- 127 Taunabunai emu haheğani na ura henidia  
badamu,  
*gold* daenai, oibe, *gold* namo-hereana daenai.
- 128 Una dainai emu hahedua herevadia iboudiai  
heğereğeredia ai aegu na davemu,  
dala koikoidia iboudiai na inai henidiamu.
- 129 Emu hahediba herevadia na nanamo heherea;  
una dainai laumagu ese e badinadiamu.
- 130 Emu hereva ikehodia ese diari e havaraiamu,  
asi aonegadria taudia lalodia e hadiaridiamu.
- 131 Udugu na hağaiamu, na hodi dae hodi daemu,  
badina be emu haheğani na ura henidia lalo-dikamu.
- 132 Ba hağeregu, ba bogagu hisi,  
vaia oi ladamu e ura heniamu taudia o kara  
henidiamu heğereğerenai.

- 133 Egu raka ba ha-aukaia, emu gwauhamata  
heğereğerena,  
kara dika ta basine biagugu.
- 134 Taunimanima edia dağedağe amo ba hamau-  
rigu,  
emu hahedua herevadia baina badinadia to-  
tona.
- 135 Oi vairamu diarina amo emu hesiai tauna ba  
hadiaria,  
emu taravatu ba hadibagu.
- 136 Iruru-matagu e aru badabadamu,  
badina be taunimanima ese emu taravatu  
asie badinaiamu.
- 137 Iehova e, emu kara na mamaoro-mamaoro;  
emu hahemaoro herevadia na mamaoro-  
mamaoro.
- 138 Emu hahediba herevadia na kara maoro-  
maorodia ai vada o duanai,  
bona heabidadama idoinai Ialonai danu.
- 139 Lalogu siahuna ese e aragumu,  
badina be inaigu ese emu hereva e lalodia  
boiomu.
- 140 Emu gwauhamata vada e hekara toho ġoeva;  
emu hesiai tauna ese e ura heniamu.
- 141 Lau na marağı, bona vada e dadaraigu,  
ġau tamona, emu hahedua herevadia asina  
lalodia boiomu.
- 142 Emu kara maoromaorodia na maoromaoro  
hanaihanai,  
bona emu taravatu na momokani.
- 143 Hekwarahi bona hisihisi badadia na latagu ai  
eme kau,  
to emu haheğani na moalelaidiamu.
- 144 Emu hahediba herevadia na maoromaoro  
hanaihanai,

lalo-parara ba henigu, bena baina mauri.

- 145 Mai lalogu idoinai na taimu;  
Iehova e, a haere henigu; emu taravatu baina  
badinadia.
- 146 Na tai henimumu; a hamaurigu,  
bena emu hahediba herevadia baina badina-  
dia.
- 147 Daba do se kiniamu na tore isimu,  
hekaha totona na taimu, emu hereva na laro-  
diamu.
- 148 Hanuaboi gima negana ai matagu e nogamu,  
emu gwauhamata baina haeroa totona.
- 149 Emu hebogahisi ai gadogu a kamonai;  
Iehova e, emu kara maoromaoro ai do ba  
hamaurigu.
- 150 Edia lalo-hadai dikadia daidiae e dağedağe  
henigumu taudia na e raka kahimu;  
idia bona emu taravatu padadia na daudau.
- 151 A oi, Iehova e, oi na kahira-kahira,  
bona emu haheğani iboudiai na momomo-  
kakani.
- 152 Nega daudau emu hahediba herevadia vada na  
dibadia;  
vada o haginidia, bae gini hanaihanai.
- 153 Egu hisihisi ba itaia, ba hamaurigu,  
badina be emu taravatu asina laloa boiomu.
- 154 Idurugu herevana ba gwauraia, ba hamaurigu;  
mauri ba henigu, emu gwauhamata  
heğereğeredia.
- 155 Hahemauri bona kara dika taudia padadia na  
daudau,  
badina be idia ese emu taravatu asie tahudi-  
amu.

- 156 Iehova e, emu hebogahisi na bada;  
       mauri ba henigu, emu kara maoromaoro  
       hegeregeregedia ai.
- 157 E da gedagaē henigumu bona e inai henigumu  
       taudia na hutuma,  
       a emu hahediba herevadia amo asina raka  
       sirimu.
- 158 Asi edia heabidadama taudia na itadiamu ai na  
       lalogu e dikamu,  
       badina be emu hahegani asie badinadiamu.
- 159 Ba laloa, emu hahedua herevadia na ura henid-  
       dia badamu;  
       ba hamaurigu, emu hebogahisi hegeregeregena  
       ai.
- 160 Emu hereva iboudiai anidia na momokani,  
       bona emu hahemaoro herevadia  
       maoromaorodia iboudiai na e hesiriu  
       hanaihanaimu.
- 161 Lohia ese e da gedagaē henigumu, asi badina;  
       a lalogu ese emu hereva e matauraidiamu.
- 162 Emu hereva na moalelaiamu,  
       abi-dadi kohudia e davarimu tauna ena  
       moale na heto.
- 163 Koikoi na inai heniamu, na inai henia badamu;  
       a emu taravatu na lalokau heniamu.
- 164 Dina ta ta ai, nega hahitu na imodaimumu,  
       emu hahemaoro herevadia maoromaorodia  
       daidiae.
- 165 Emu taravatu e wa heniamu taudia na maino  
       badana e abiamu,  
       gau ta ese basine hahekwanaidia diba.
- 166 Iehova e, emu hahemauri na laroamu,  
       bona emu hahegani na badinadiamu.
- 167 Laumagu na emu hahediba herevadia e badi-  
       nadiamu;

na ura henidia lalo-dikamu.

<sup>168</sup> Emu hahedua herevadia bona emu hahediba  
herevadia na badinadiamu,  
badina be egu dala iboudiai na oi vairamu ai.

<sup>169</sup> Iehova e, egu taitai aine vasi oi vairamu ai;  
lalo-parara ba henigu, emu hereva  
hegereggerena ai.

<sup>170</sup> Egu ninoi aine dae vasi emu ai;  
ba hamaurigu, emu hereva hegereggerena ai.

<sup>171</sup> Udugu bibinadia ese heimodai herevadia e  
gwaurai momomu,  
emu taravatu o hadibalaigumu dainai.

<sup>172</sup> Malagu ese emu hereva baine anelaia,  
badina be emu haheganiboudiai na  
mamaoro-mamaoro.

<sup>173</sup> Imamu na lau ikahagu baine hegaege,  
badina be emu hahedua herevadia vada na  
abidia hidi.

<sup>174</sup> Iehova e, emu hahemauri na ura henia lalo-  
dikamu,  
bona emu taravatu na moalelaiamu.

<sup>175</sup> Mauri ba henigu, baina imodaimu totona;  
emu hahemaoro herevadia amo ba durugu.

<sup>176</sup> Lau vada na raka boioboio, dobi mamoena na  
heto;  
emu hesiai tauna ba tahua,  
badina be emu haheganiboudiai asina lalo-  
dia boiomu.

## 120

<sup>1</sup> Egu lalo-hisihisi ai Iehova na tai henia,  
baine haere henigu totona.

<sup>2</sup> Nato: Iehova e,

koikoi bibinadia bona hedibagani maladia  
amo ba hamaurigu.

<sup>3</sup> Hedibaġani malana e, dahaka baine henimu?  
ede ma baine kara henimu toma?

<sup>4</sup> Tuari tauna ena diba mai matadia,  
roteme\* audia e aramu gidadia.

<sup>5</sup> Madi ihabaigu, Mesek ai na noho hedoamu,  
Kedara kalagadia bogaragidiai na nohomu.

<sup>6</sup> Egu noho vada eme daudau herea,  
maino e inai heniamu taudia bogaragidiai.

<sup>7</sup> Lau na maino na uramu,  
a na herevamu negadia ai,  
idia na tuari e uramu.

## 121

<sup>1</sup> Lau matagu na gaga isimu, ororo na haġerediamu;  
ikahagu na ede amo e maimu?

<sup>2</sup> Ikahagu na Iehova ena amo e maimu;  
ia ese guba bona tanobada e karadia.

<sup>3</sup> Oi aemu ia ese baine naria, basine marere;  
oi igimamu Diravana na basine mahuta.

<sup>4</sup> Oibe, Israel igimana Diravana na  
matana basine ġaraia, basine mahuta.

<sup>5</sup> Iehova na oi igimamu Diravana;  
Iehova na oi ihahemetaimu, idibamu kahana  
ai.

<sup>6</sup> Dina siahuna basine hagoreremu dina ai,  
eiava hua hanuaboi ai.

---

\* **120:4** “Roteme” na au ta ladana Heberu gado ai.

- <sup>7</sup> Iehova ese dika iboudiai lalodia amo baine gitimamu;  
ia ese emu mauri baine gimaia.
- <sup>8</sup> Emu raka lasi ai bona emu raka vareai ai  
Iehova ese baine gimamu,  
harihari ela bona hanaihanai.

## 122

- <sup>1</sup> “Iehova ena ruma aitala”;  
unu e hamaorogu toma negana ai na moale.
- <sup>2</sup> Ierusalem e, ai aemai vada e gini,  
emu ikoukou lalodai.
- <sup>3</sup> Ierusalem na vada e hadaia, hanua badana,  
vada e hahekuboua tutuka-tutuka;
- <sup>4</sup> iduhu hidaosi ese e dara heniamu,  
Iehova ena bese iduhudia;  
hahediba herevana na Israel e henia heğereğerena,  
Iehova ladana bae hanamoatotona.
- <sup>5</sup> Hahemaoro teronodia unuseni ai e hadai,  
David garana edia terono bunu.
- <sup>6</sup> Ierusalem ena maino dainai ba guriğuri!  
E ura henimumu taudia na bae namo.
- <sup>7</sup> Maino na emu mağu ialodiai baine mia,  
bona mauri na emu kohoro lalodiai.
- <sup>8</sup> Tadikakagu bona bamogu bagudiai bainato  
“Maino na oi lalomu ai baine mia”.
- <sup>9</sup> Iehova, eda Dirava, ena rum a bagunai,  
oi namomu baina tahua.

## 123

- <sup>1</sup> Matagu na roha isimu oiemu ai,  
guba ai emu terono ai o helaimu Diravana e!
- <sup>2</sup> Hesiai taudia matadia ese  
biagudia imana e raraia taomu

eiava hesiai kekenina matana ese  
 biaguna hahinena imana e raraia taomu na  
 heto,  
 ita matada ese Iehova, eda Dirava, unu ta raraia  
 tao tomamu,  
 ela bona ia ese baine bogada hisi.

- <sup>3</sup> A bogamai hisi, Iehova e, a bogamai hisi,  
 badina be taunimanima ese vada e kirikiri-  
 laimai ai vada a hesiku.  
<sup>4</sup> Nega daudau herea tağā taudia edia heihi-ihirai  
 bona heāgi taudia edia hekinkirilai ese  
 lalomai vada e hahonu.

## 124

- <sup>1</sup> Iehova na bema dia iseda kaha ai,  
 (Harihari Israel ini baine gwau toma),  
<sup>2</sup> Iehova na bema dia iseda kaha ai,  
 taunimanima ese e tuari henida neganai,  
<sup>3</sup> idia ese maurida ai bema hadonoda,  
 edia badu na ita eda ai e siahuva ai;  
<sup>4</sup> bena aru ese bema aruda oho,  
 abata ese bema habubunida,  
<sup>5</sup> hurehure ese bema ġovada ahu.  
<sup>6</sup> Iehova aita hanamoia,  
 badina be ia ese ita na idia dinadia ai se  
 halaoda.  
<sup>7</sup> Vada ta roho mauri,  
 manu ese manu-tahu taudia edia idoa amo e  
 roho maurimu na heto;  
 idoa vada e motu,  
 bona vada ta roho mauri.  
<sup>8</sup> Ikahada na Iehova ladana ai;  
 ia ese guba bona tanobada e karadia.

## 125

- <sup>1</sup> Iehova e abidadama heniamu taudia na Siona  
ororona na heto;  
basine marere diba, baine mia hanaihanai.
- <sup>2</sup> Ororo ese Ierusalem e ġeġea ahumu heġereġerena,  
Iehova ese ena orea taudia unu e ġeġedia ahu  
tomamu,  
hari ina negana amo ela bona hanaihanai.
- <sup>3</sup> Badina be kara dika ena dagi auna na  
kara maoromaoro taudia e henidia tanona  
latanai basine mia  
kara maoromaoro taudia na imadia bema toia  
roro  
bona kara dika bema kara na garina.
- <sup>4</sup> Iehova e, kara namo taudia na ba hanamodia,  
bona lalodia mamaoro-mamaoro taudia  
danu.
- <sup>5</sup> A dala gageva-gagevadia ai e rakamu taudia na  
Iehova ese kara dika taudia ida baine hakau-  
dia lao.  
Maino na Israel ai baine mia.

## 126

- <sup>1</sup> Iehova ese Siona e hanamo lou negana ai,  
ita na e nihimu taudia na heheto.
- <sup>2</sup> Una negana ita ududa na kiri ai e honu honu  
dae,  
bona malada e moale hisi dae.  
Bena bese idau-idau bogaragidiae ini e gwau  
toma:
- Iehova ese kara badadia vada e kara idia edia.
- <sup>3</sup> Oibe, Iehova ese kara badadia vada e kara  
ita eda;  
ita na ta moalemu.
- <sup>4</sup> Iehova e, ma ba hanamomai lou,

dihō kahana sinavaidia na heheto.

<sup>5</sup> Mai iruru-matadia ida e hadohadomu taudia na  
mai moaledia ida bae ġeigei;

<sup>6</sup> uhe ihadodia totona mai taitaina ida e raka  
lasimu tauna na  
mai hisi-daena ida ena rum a baine lou henia,  
ena uit iġuidia baine lasilaidia.

## 127

<sup>1</sup> Iehova ese rum a basinema haginia negana ai,  
e haginiamu taudia na bema hekwarahi kava;  
Iehova ese hanua basinema gimaia negana ai,  
gima taudia na bema noga kava.

<sup>2</sup> Asi anina daba ai o tore boiboi mu,  
e laomu bona hanuam u e boim u, bena  
lagamu o animu,  
murinai lalo-hekwarahi anidia o animu;  
badina be ia ese ena lalokau taudia na  
mahuta e henidiamu.

<sup>3</sup> A itaia, memero na Iehova ena herahia,  
boga anidia na ena harihari ġaudia.

<sup>4</sup> Eregabe tauna natuna na tuari tauna imana  
dibadia na heheto,  
<sup>5</sup> ena diba pauana e honumu tauna na e  
moalemu.

Hanua ikoukouna ai ia inaina ida bae hereva  
negana ai,  
tau ta ese basine hahemaraia.

## 128

<sup>1</sup> Iehova garina e garimu taudia iboudiai na  
nanamo;

idia na iena dala ai e rakamu.

<sup>2</sup> Imamu edia hekwarahi anidia do bavani;  
ba moale bona ba namo danu.

- <sup>3</sup> Adayamu emu ruma ai na  
     vine auna mai huahuana na heto;  
 natumu na olive tuhutuhudia na heheto,  
     emu pata bae helaia heğeğe.
- <sup>4</sup> A laloa, Iehova garina e garimu tauna na  
     unu baine namo toma.
- <sup>5</sup> Siona amo Iehova ese baine hanamomu,  
     Ierusalem ena namo do ba itaia, emu mauri  
         dinadia iboudiai;
- <sup>6</sup> tubumu do ba itadia danu.  
     Maino na Israel latanai baine mia.

## 129

- <sup>1</sup> Merogu negana amo vada e hahisigu bada,  
     (Harihari Israel ini baine gwau toma),
- <sup>2</sup> Merogu negana amo vada e hahisigu bada,  
     to asie hadareregu.
- <sup>3</sup> Ruarua taudia ese dorugu e ruaia,  
     edia ruarua gabudia e halatadia.
- <sup>4</sup> Iehova ena kara na maoromaoro;  
     ia ese kara dika varodia vada e utudia.
- <sup>5</sup> Siona e inai heniamu taudia iboudiai na  
     bae hahemaraidia bona bae haloudia.
- <sup>6</sup> Idia na ruma guhidia ai rei e varamu na heto:  
     do se huahua ai na e maraimu,
- <sup>7</sup> bena iutuna tauna na imana ai se abiamu,  
     bona iğuina tauna na kemena ai se rosiamu;
- <sup>8</sup> e raka hanaimu taudia danu asie herevalaiamu,  
     asie tomu  
     “Iehova ena hahenamo na latamu ai baine  
         mia,  
     Iehova ladana ai a hanamomumu”.

## 130

- <sup>1</sup> Iehova e, dobu gabuna amo na tai henimumu.

- 1 Gaubada e, gadogu a kamonai.
- 2 Taiamu ae kirara,  
egu noinoi a hakala henia.
- 3 Iehova e, kara dika boma lalo tao,  
Gaubada e, daika bema gini?
- 4 A dika igwau-taodia na oiemu amo,  
una dainai oi garimu bae gari.
- 5 Iehova na nariamu, laumagu ese e nariamu,  
ien a hereva na laroamu.
- 6 Laumagu ese Gaubada e nariamu,  
hegima taudia ese daba e nariamu na e here-  
adiamu,  
hegima taudia ese daba e nariamu na e here-  
adiamu.
- 7 Israel e, Iehova ba laroa.  
Badina be Iehova na mai ena hebogahisi,  
bona ena hahemauri na bada herea.
- 8 Ia ese Israel na  
ena kara dika iboudiai lalodia amo baine  
hamauria.

## 131

- 1 Iehova e, lalogu na se heabi isimu,  
matagu na se roha isi badabadamu.  
Gau bada-hereadia bona hoa bada karadia na  
asina ġaukaralaidiamu.
- 2 A laumagu vada na hakerua bona vada na  
hamanaua,  
mero maragina na sinana kemena ai e man-  
aumu na heto;

laumagu na vada e hamanaua merona na  
heto.

<sup>3</sup> Israel e, Iehova ba laroa,  
hari ina nega amo, ela bona hanaihanai.

## 132

- <sup>1</sup> Iehova e, David ba laloa;  
hisi-ani e haheaukalaia ba laloa tao.
- <sup>2</sup> Ia ese Iehova e gwau henia hamata,  
Iakob ena Dirava herea-daena e gwau henia  
hamata.
- <sup>3</sup> Nato: Egu rumalalonai basina raka vareai,  
egu mahuta patana ai basina hekure,
- <sup>4</sup> matagu basina hamahutadia,  
matagu kopidia basina hakapudia,
- <sup>5</sup> ela bona Iehova ena gabu ta baina davaria,  
Iakob ena Dirava herea-daena ena noho  
gabuna ta.
- <sup>6</sup> Efrata ai sivaraina ta kamonai,  
Iara umadia ai ta davaria.
- <sup>7</sup> Ena noho gabuna aitala,  
aena ihadaina ġauna vairanai baita toma diho.
- <sup>8</sup> Iehova e, a tore isi, emu laġa-ani gabuna baola,  
oi bona emu siahū mauana helaġana.
- <sup>9</sup> Emu hahelaġa taudia na kara maoromaoro bae  
hahedokilai;  
emu helaġa taudia na bae hisi dae.
- <sup>10</sup> Emu hesiai tauna David bagunai,  
vada o horoa tauna ena amo basio mede kere-  
hai.
- <sup>11</sup> Iehova ese gwauhamata aukana David e henia,  
unu amo ia na basine lou.

- Eto: Natumu adorana ta  
emu terono ai baina hahelaia.
- <sup>12</sup> Bema natumu ese egu taravatu bae badinaia,  
bona egu hahediba herevadia, baina hadibal-  
aidia ġaudia,  
idia natudia danu emu terono ai bae helai,  
ela bona hanaihanai.
- <sup>13</sup> Badina be Iehova ese Siona e abia hidi;  
e ura henia, ena noho gabuna ai bainela.
- <sup>14</sup> Eto: Egu laġa-ani gabuna binai,  
ela bona hanaihanai;  
iniseni ai baina noho,  
badina be vada na ura heniamu.
- <sup>15</sup> Ena roge baina hahonudia,  
ena ogoġami taudia na adia baina henidia.
- <sup>16</sup> Ena hahelaġa taudia na hahemauri amo baina  
hadokilaidia,  
ena helaga taudia na bae hisi dae.
- <sup>17</sup> Unuseni ai David ena doa ta baina havaraia;  
lamepa ta vada na abia heġaeġae, na horoa  
tauna ena.
- <sup>18</sup> Ia inaina na hemarai amo baina hadokilaidia,  
a ia be ena havava ġauna ese baine hadiaria.

## 133

- <sup>1</sup> A itaia, tadikaka bae noho hebou mai lalodia  
tamona,  
una na namo, bona mai moalena danu.
- <sup>2</sup> Una na dehoro namo-hereana kwara ai na heto,  
auki-huina amo e veve dihomu,  
Aaron aukina huina amo e veve dihomu,  
ena dabua aiona ai.
- <sup>3</sup> Una na Heremon hununa na heto,  
Siona ororona ai e dihomu.

Badina be unuseni ai Iehova ese hahenamo vada  
e hahedualaia.  
Hahenamona binai: mauri hanaihanai.

## 134

- <sup>1</sup> Aoma, Iehova ba hanamo, umui Iehova ena  
hesiai taumui iboumui ai,  
hanuaboi idoinai Iehova ena rumai o gin-  
imu taumui.
- <sup>2</sup> Imamui ba dudui isi, gabu helāgana enai,  
bona Iehova ba hanamo.
- <sup>3</sup> Iehova, guba bona tanobada ikaradia Diravana,  
ia ese Siona amo baine hanamomui.

## 135

- <sup>1</sup> Iehova ba imodaia.  
Iehova ladana ba imodaia;  
umui Iehova ena hesiai taumui, heimodai ba  
henia,
- <sup>2</sup> umui Iehova ena rumai o ginimu taumui,  
iseda Dirava ena rumai mağudia ai o ginimu  
taumui.
- <sup>3</sup> Iehova ba imodaia, badina be Iehova na namo;  
ia ladana ba heatolaia emui ane ai,  
badina be ia na mai ena harihari-bada.
- <sup>4</sup> Badina be Iehova ese Iakob vada e abia hidi, ia  
sibona ena;  
Israel na iena korikori.
- <sup>5</sup> Badina be lau dibagu Iehova na bada;  
eda Ĝaubada ese dirava iboudiai e hereadi-  
amu.
- <sup>6</sup> Badina be Iehova na sibona ena ura e karamu,  
guba ai bona tanobada ai,  
bona davara ai bona dobu gabudia iboudiai.
- <sup>7</sup> Ia ese ori e hadaediamu,

tanobada dokona amo;  
 bona kevaru e karaiamu, medu ena,  
 bona lai na ena roge amo e halasidiamu.

<sup>8</sup> Ia ese Aigupto ai natu-roboadiah e aladiamase,  
 taunimanima natudiah roboadiah bona boroma  
 natudiah roboadiah.

<sup>9</sup> Aitupto e, oi bogaragimu ai,  
 ia ese toa bona hoa karadiam e siaidiah,  
 Farao bona ena hesiai taudiah iboudiah  
 ihadikadiam.

<sup>10</sup> Ia ese bese momo e habuadiam tari,  
 bona pavapava mai siahudiah e aladiam mase:

<sup>11</sup> Sihon, Amoro taudiah edia pavapava,  
 bona Og, Basan pavapavana,  
 bona Kanaan basileiadiah iboudiah.

<sup>12</sup> Edia tano e henilao, haida ese e ġaunaia,  
 ena orea taudiah Israel ese e ġaunaia.

<sup>13</sup> Iehova e, oi ladamu na e hesiriu hanaihanaimu;  
 Iehova e, oi harimu na laġani laġani e miamu.

<sup>14</sup> Badina be Iehova ese ena orea taudiah na maorodiah baine gwaurai,  
 bona ena hesiai taudiah na baine bogadiam hisi.

<sup>15</sup> Bese idau-idau edia kaivakuku na silver bona  
*gold* amo e karadiamu,  
 taunimanima imadiam karakaradiam:

<sup>16</sup> mai udadia, to asie herevamu;  
 mai matadiam, to asie itamu;

<sup>17</sup> mai taiadiam, to asie kamonaimu;  
 bona asi laġadiam udadia ai.

<sup>18</sup> E karadiamu taudiah na idia heġereġeradiam ai  
 baela;

oibe, e abidadama henidiamu taudia iboudiai  
danu.

- 19** Israel besena e, Iehova ba hanamo;  
Aaron iduhuna e, Iehova ba hanamo;
- 20** Levi iduhuna e, Iehova ba hanamo;  
Iehova garina o garimu taumui e, Iehova ba  
hanamo.
- 21** Siona amo Iehova ba hanamo;  
ia na Jerusalem ai e nohomu.  
Iehova ba imodaia.

## 136

- 1** Iehova ba hanamo, badina be ia na namo;  
ena hebogahisi na e hesiriu hanaihanaimu.
- 2** Dirava edia Dirava ba hanamo;  
badina be ena hebogahisi na e hesiriu hanai-  
hanaimu.
- 3** Lohia edia Lohia ba hanamo;  
badina be ena hebogahisi na e hesiriu hanai-  
hanaimu.
- 4** Sibona hoa bada karadia e karamu Diravana ba  
hanamo;  
badina be ena hebogahisi na e hesiriu hanai-  
hanaimu.
- 5** Ena aonega amo guba e karaia;  
badina be ena hebogahisi na e hesiriu hanai-  
hanaimu.
- 6** Tanobada na davara latadiai e idia roro;  
badina be ena hebogahisi na e hesiriu hanai-  
hanaimu.
- 7** Diari ġaudia badadia e karadia;  
badina be ena hebogahisi na e hesiriu hanai-  
hanaimu.
- 8** Dina tara ese dina e biaguamu;

- badina be ena hebogahisi na e hesiriu hanai-hanaimu.
- <sup>9</sup> Hua bona hisiu ese hanuaboi e biaguamu;  
badina be ena hebogahisi na e hesiriu hanai-hanaimu.
- <sup>10</sup> Aigupto ai natu-roboadia e aladia mase Diravana ba hanamo;badina be ena hebogahisi na e hesiriu hanai-hanaimu.
- <sup>11</sup> Idia bogaragidia amo Israel e hakaudia lasi;  
badina be ena hebogahisi na e hesiriu hanai-hanaimu.
- <sup>12</sup> Imana na mai goadana ida e toia roro;  
badina be ena hebogahisi na e hesiriu hanai-hanaimu.
- <sup>13</sup> Davara Kakakakana e hapararaia;  
badina be ena hebogahisi na e hesiriu hanai-hanaimu.
- <sup>14</sup> Israel taudia na bogaragina amo e harakadia hanai;  
badina be ena hebogahisi na e hesiriu hanai-hanaimu.
- <sup>15</sup> A Farao bona ena tuari oreana na Davara Kakakakana ai e hadareredia;  
badina be ena hebogahisi na e hesiriu hanai-hanaimu.
- <sup>16</sup> Ena orea taudia na tano ġaġena amo e hakaudia hanai;  
badina be ena hebogahisi na e hesiriu hanai-hanaimu.
- <sup>17</sup> Pavapava badadia e aladia;  
badina be ena hebogahisi na e hesiriu hanai-hanaimu.
- <sup>18</sup> Bona pavapava mai haridia e aladia mase;

- badina be ena hebogahisi na e hesiriu hanai-hanaimu.
- <sup>19</sup> Sihon, Amoro pavapavana;  
badina be ena hebogahisi na e hesiriu hanai-hanaimu.
- <sup>20</sup> Bona Og, Basan pavapavana;  
badina be ena hebogahisi na e hesiriu hanai-hanaimu.
- <sup>21</sup> Bena edia tano na haida e henidia, bae ġaunaia;  
badina be ena hebogahisi na e hesiriu hanai-hanaimu.
- <sup>22</sup> Ena hesiai tauna Israel ese e ġaunaia;  
badina be ena hebogahisi na e hesiriu hanai-hanaimu.
- <sup>23</sup> Ia ese e laloda tao eda noho dika ai;  
badina be ena hebogahisi na e hesiriu hanai-hanaimu.
- <sup>24</sup> Bona inaidia imadia amo e harohoda mauri;  
badina be ena hebogahisi na e hesiriu hanai-hanaimu.
- <sup>25</sup> Ia ese mauri ġaudia iboudiai adia e henidiamu;  
badina be ena hebogahisi na e hesiriu hanai-hanaimu.
- <sup>26</sup> Guba Diravana ba hanamoa;  
badina be ena hebogahisi na e hesiriu hanai-hanaimu.

## 137

<sup>1</sup> Babulono sinavaidia badibadidiai,  
a helai dihova, a taiva,  
Siona a laloa taova negadia ai.

<sup>2</sup> Unuseni ai emai hatai-hatai ġaudia na  
sinavai isedia audia ai a taudia dae.

- <sup>3</sup> Badina be unuseni ai e ġuimai taudia ese e haġanimai, ane baia abi,  
e hahisimai taudia ese e haġanimai, baia moale;  
“Siona anedia ta bavabia” eto.
- <sup>4</sup> Idau tano ai Iehova ena ane na  
ede baia abia toma?
- <sup>5</sup> Ierusalem e, bama lalomu boio,  
imagu bema heveri;
- <sup>6</sup> basinama lalomu tao,  
bona egu moale ġauna hereana daenai  
Ierusalem basinama atoa,  
malagu na udugu atai maona ai bema kape  
dae.
- <sup>7</sup> Iehova e, Ierusalem ena dina ba laloa tao,  
Edom taudia latadiai.  
Idia e tomava: A ġigġia dobi, a ġigġia dobi,  
a ġigġia rohoroho.
- <sup>8</sup> Babulono natuna hahinen e, hahebua-tari  
hahinem:  
o kara henimaiva karadia davadia ma baine  
halou henimu tauna na baine moale;
- <sup>9</sup> bona natumu maraġidia baine abidia, haga-  
nadina ai  
baine huaridia, tauna na baine moale.

## 138

- <sup>1</sup> Iehova e, mai lalogu idoinai na hanamomumu;  
dirava vairadiai na imodaimumu egu ane ai.
- <sup>2</sup> Emu dubu helaġana vairanai na igo dihomu,  
bona ladamu na hanamoamu,  
emu hebogahisi bona emu heabidadama  
daidiae;

badina be ladamu bona emu hereva vada o abidia  
isi  
    ḡau iboudiai daediai.

<sup>3</sup> Na boiboi dinana ai o haere henigu,  
    bona laumagu goadana o habadaia.

<sup>4</sup> Iehova e, tarlobada pavapavadia iboudiai bae  
    imodaimu,  
    badina be udumu herevadia vada e kamonai;

<sup>5</sup> Iehova ena dala baeanelaidia,  
    badina be Iehova hairaina na bada.

<sup>6</sup> Badina ena be Iehova na atai ai, to manau taudia  
    na e hağerediamu;  
    a hekokoroku taudia na dauha amo e dibadi-  
    amu.

<sup>7</sup> Ena be hekwakwanai ḡaudia lalodiai na rakamu,  
    to oi ese egu mauri o rauaiamu.

Imamu o toia roromu, inaigu edia badu o laoa  
    ahumu;

    bona imamu idibana ese e hamaurigumu.

<sup>8</sup> Iehova ese ena lalo-hadai baine haḡuḡurua egu ai.  
    Iehova e, emu hebogahisi na e hesiriu hanai-  
    hanaimu;  
    imamu karakarana ḡaudia basio rakatanidia.

## 139

<sup>1</sup> Iehova e, lalogu vada o tahua, vada o dibagu;

<sup>2</sup> egu helai diho, egu tore isi, oi dibamu;  
    dauha amo egu lalo-hadai o dibadiamu.

<sup>3</sup> Egu raka o itaia taomu, egu hekure diho danu;  
    egu kara iboudiai na oi dibamu.

<sup>4</sup> Malagu ese hereva ta do se gwauraia negana ai,  
    Iehova e, una hereva na vada o diba vaitani.

- <sup>5</sup> Oi ese o gunalaigumu, o gabelaigumu,  
imamu na latagu ai vada o atoa kau.
- <sup>6</sup> Aonega enehetomana na hoalaia badamu;  
ia na atai ai, idavarina na asi dibagu.
- <sup>7</sup> Oi Laumamu ena amo lau ede bainala?  
    Oi vairamu ena amo lau ede baina heau he-  
        nia?
- <sup>8</sup> Guba ai bama dae, to oi na unuseni ai;  
    mase taudia edia gabu ai egu geda bama la-  
        haia, ai danu.
- <sup>9</sup> Daba hanina bama abi, bama roho lao,  
    gadobada daudauna ai bama hanoho,
- <sup>10</sup> unuseni ai danu oi imamu ese bema hakaugu,  
    oi imamu idibana ese bema dogogu tao.
- <sup>11</sup> Bama toma “Dibura ese baine gorugu ahu,  
    bona e ġeġegu daemu diarina na baine  
        dibura”;
- <sup>12</sup> to, dibura na dia dibura oiemu ai,  
    hanuaboi eme diari dina heġereġerena;  
    badina be dibura bona diari na heġereġere  
        oiemu ai.
- <sup>13</sup> Oi ese taugu anina o karaia,  
    sinagu bogana ai o karagu.
- <sup>14</sup> Na imodaimumu, badina be oi na mai garimu  
    bona mai hoamu;  
    emu kara na hoa ġaudia.
- Oi na dibamu herea lau;
- <sup>15</sup> gabu hehunina ai taugu e hekara;  
tanobada ena dobu gabudia ai e hekara ġoеваġoева  
    negana ai,  
    taugu anitarana na emu amo se hehuni.
- <sup>16</sup> Tau-anigu na do asi oromana negana ai,

- oi matamu ese e itagu;  
 dina o karadia egu na iboudiai emu buka ai vada  
     e tore,  
     ta do se vara negana ai.
- <sup>17</sup> Dirava e, emu lalo-hadai na ġoева-dae egu ai,  
     idia na daka hutuma;  
<sup>18</sup> bama duahidia, idia na miri na heto.  
 Na nogamu negana ai,  
     lau na doini oi ida.
- <sup>19</sup> Dirava e, kara dikā taudia boma aladia mase  
     bema namo;  
     bona rara iħahebubuna e uramu taudia bema  
     rakatanigu danu bema namo;
- <sup>20</sup> idia ese e gwau edede henimumu mai  
     daġedaġedia ida,  
     idia ese e inai henimumu, bae hadikamu to-  
     tona.
- <sup>21</sup> Iehova e, e inai henimumu taudia na na inai  
     henidiamu ani?  
     e daġedaġe henimumu taudia na na badu  
     henidiamu ani?
- <sup>22</sup> Na inai henidia lalo dikamu;  
     idia na lau inaigu na tomamu.
- <sup>23</sup> Dirava e, ba tahugu, lalogu na ba diba;  
     ba tohogu, egu lalo-hadai ba dibadia.
- <sup>24</sup> Ba itaia, dala dikana ta lalogu ai e miamu eiava;  
     bona mia hanaihanai dalana ai ba hakaugu.

## 140

- <sup>1</sup> Iehova e, kara dikā taudia edia amo ba harohogu  
     mauri;  
     daġedaġe taudia edia amo ba hamaurigu.
- <sup>2</sup> Idia ese kara dikadia e lalo hadailaimu,  
     bona tuari e havaradia louloumu.

- <sup>3</sup> Maladia na e hamatakamu, gaigai malana na heto;  
 bibinadia henudiai na hekori gaigaidia edia mase muramurana. (Selah)
- <sup>4</sup> Iehova e, kara dika taudia imadia amo ba gimagu,  
 dağedağe taudia edia amo ba hamaurigu;  
 idia ese aegu ihahetutuhidia dalana vada e haeroa.
- <sup>5</sup> Heagi taudia ese rikiriki vada e hunia, iabigu totona,  
 huo vada e otoa,  
 dala isena ai idoalaigu gaudiā vada e kara.  
 (Selah)
- <sup>6</sup> Iehova na hamaoroamu, na tomu “Oi na egū Dirava”;  
 Iehova e, egū noinoi herevadia ba hakala henī.
- <sup>7</sup> Iehova e, egū Ğaubada, ihamaurigu tauna mai goadamu,  
 tuari dinana ai kwaragu vada o laoa ahu.
- <sup>8</sup> Iehova e, kara dika tauna ena ura basio henia;  
 ena lalo-hadai dikana basio durua. (Selah)
- <sup>9</sup> E ġeġegu daemu taudia na kwaradia e abidia isimu;  
 bibinadia herevadia dikadia ese bae hadar-eredia;
- <sup>10</sup> lahi gidadia na latadiā bae moru,  
 guri ai bae tahodia dobi, basie tore isi lou,
- <sup>11</sup> Taunimanima ihadikadia herevadia e gwau-raimu tauna na tano ai basine noho taritari;  
 dika ese dağedağe tauna na baine lasia tao haraġa.

- <sup>12</sup> Lau dibagu Iehova ese hisi e animu tauna ena  
dala baine hamiaia,  
bona e dabumu tauna na ahuna maorona  
baine henia.
- <sup>13</sup> Momokani, kara maoromaoro taudia ese oi  
ladamu bae hanamo, a  
kara ġoevaġoева taudia na oi vairamu ai bae  
noho.

## 141

- <sup>1</sup> Iehova e, na boi henimumu, aoma haraġa dekegu  
ai,  
na boi henimumu negana ai ba hakala  
henigu.
- <sup>2</sup> Egu ġuriġuri na muramura mai bonana ai  
bainela oi vairamu ai,  
bona imagu na dudui isimu na adorahi  
boubouna ai bainela.
- <sup>3</sup> Iehova e, udugu ba gimaia,  
udugu bibinadia iduarana ba naria.
- <sup>4</sup> Lalogu na basio kehoa, dika ġauna ta enai;  
bona kara dika ihekwarahilaidia ai kara  
havara taudia ida basina hebou,  
edia aniani ġaudia namodia danu basina ani.
- <sup>5</sup> Tau namona ese ena hebogahisi ai baine  
kwadigu eiava baine gwau henigu be  
namo,  
a kara dika taudia edia dehoro amo nega ta  
kwaragu basie horoa;  
badina be nega idoinai edia kara dika ilao-  
ahudia ġuriġuridia na gwauraimu.
- <sup>6</sup> Bae revadia taudia imadia ai bae kau negana ai,

lalodia na bae parara, Iehova ena hereva na momokani.

- <sup>7</sup> Haga nadina na ta hamakohiamu, tano ai ta īgīa rohorohomu na heto,  
idia turiadia na unu bae karadia toma, mase gabuna iduarana ai.
- <sup>8</sup> Ģaubada Iehova e, lau oi na hageremumu;  
oiemu ai na roho maurimu;  
asi igimagu ai basio rakatanigu.

- <sup>9</sup> Iabigu totona vada e atoa rikirikina amo ba rauagu;  
kara dika taudia edia idoa amo ba hamaurigu.
- <sup>10</sup> Kara dika taudia na sibodia edia huo ai bae heabi,  
a lau baina roho mauri.

## 142

- <sup>1</sup> Eregu amo Iehova na tai heniamu,  
eregu amo Iehova na noinoi heniamu.
- <sup>2</sup> Egu lalo-hisihisi na ia vairanai na herevalaiamu,  
egu lalo-hekwarahi na ia vairanai na gwaura-  
iamu.
- <sup>3</sup> Laumagu e dauremu negana ai,  
egu dala oi mai dibamu.

Na rakalaiamu dalana ai,  
iabigu rikirikina vada e hunia.

- <sup>4</sup> Idiba kahana na roha heniamu bona na  
henarimu,  
a ta ese se lalogumu;  
asi egu roho-mauri gabuna ta,  
asi tauna ta ese e dosigumu.

- <sup>5</sup> Iehova e, na tai henimumu,  
     na tomu “Egu roho-mauri gabuna na oi,  
     oi na lau ahugu, mauri taudia edia tano ai”.
- <sup>6</sup> Egu noinoi a kamonai,  
     badina be vada e taogu tao.

E dağedağe henigumu taudia edia amo ba hamau-  
     rigu,  
     badina be lauegu ai idia na gogoada heherea.  
<sup>7</sup> Dibura rumana amo ba hakaugu lasi,  
     bena oi ladamu baina hanamoa.  
 Kara maoromaoro taudia ese bae gegegu ahu,  
     badina be oi ese ba harihari henigu.

## 143

- <sup>1</sup> Iehova e, egu ġuriġuri a kamonaia,  
     egu noinoi a hakala henia.  
 Emu heabidadama ai bona emu kara maoro-  
     maoro ai  
     ba haere henigu.
- <sup>2</sup> Emu hesiai tauna basio hahemaoro henia,  
     badina be harihari e maurimu tauna ta asi  
     ena maoromaoro oi vairamu ai.
- <sup>3</sup> Badina be inai tauna vada e havagu,  
     egu mauri na tano ai vada e taoa tao,  
     dibura gabuna ai vada e atogu,  
     idau nega masedia na hehetu.
- <sup>4</sup> Taunabunai laumagu na e mase rea Ialogu ai,  
     bona kudougu na eme hetaha tau-anigu ai.
- <sup>5</sup> Sene negana na laloamu,  
     emu kara iboudiai na haerodiamu,  
     imamu karakaradia na haerodiamu.
- <sup>6</sup> Imagu na dudu'i isimu emu ai,

laumagu e ranu mase henimumu, tano  
kaukauna na heto. (Selah)

- <sup>7</sup> Iehova e, a haere henigu haraḡa;  
laumagu na e manokamu.  
Vairamu na egu ai basio hunia,  
mase gurina ai e dihomu taudia heḡereḡeredia  
ai bainala na garina.
- <sup>8</sup> Daba ai emu hebogahisi sivaraina baina ka-  
monai,  
badina be na abidadama henimumu;  
egu lao dalana ba hadibagu,  
badina be laumagu na emu ai na abia isimu.

<sup>9</sup> Iehova e, inaigu edia amo ba hamaurigu;  
oiemu ai vada na roho mauri.

<sup>10</sup> Emu ura ikarana ba hadibagu,  
badina be oi na egu Dirava.

Emu lauma namona ese baine hakaugu,  
dala heinina ai.

<sup>11</sup> Iehova e, oi ladamu dainai egu mauri ba rauaia,  
emu kara maoromaoro ai hisihisi amo ba  
hakaugu lasi.

<sup>12</sup> Emu hebogahisi ai lau inaigu na ba negedia  
dawe,  
e tuari henigumu taudia iboudiai na ba  
habuadia tari,  
badina be lau na emu hesiai tauna.

## 144

- <sup>1</sup> Iehova, egu nadi-gini, na hanamoamu;  
ia ese imagu e hadibadiamu, tuari ai,  
bona imagu kwakiwakidia danu heatu ai.
- <sup>2</sup> Ia na egu nadi-gini bona egu kohoro,  
igimagu bona ihamaurigu,

- egu kesi bona egu roho-mauri gabuna.  
 Ia ese bese idau-idau na  
     ia aena henuidai e atodiamu.
- 3** Iehova e, taunimanima be dahaka oi ese o haǵereamu?  
     Taunimanima natuna be daika, oi ese o laloamu?
- 4** Taunimanima na hahodi tamona na heto,  
     ena mauri dinadia na ikerukeru e hanaimu na heto.
- 5** Iehova e, emu guba ba haevaia, ba diho.  
     Ororo ba daudia toho, bena bae ara;
- 6** kevaru ba hakevarua isi, ba hakarohodia ro-horoho;  
     emu diba ba kinodia, ba hadareredia.
- 7** Imamu na atai amo ba toia dobi,  
     ranu momo lalodia amo ba rauagu bona ba hamaurigu,  
     bona idau bese taudia imadia amo danu.
- 8** Idia ududia ese koikoi herevadia e gwauraimu,  
     idia imadia idibadia na idiba koikoidia.
- 9** Dirava e, ane matamatana baina abia emu,  
     varo-gwauta gitarana baina hataia, oi ihanamomu.
- 10** Oi ese pavapava na kwalimu o henidiamu,  
     oi ese emu hesiai tauna David o hamauriamu.
- 11** Dare mai hisina amo ba hamaurigu,  
     bona idau bese taudia imadia amo ba haro-hogu mauri;  
     idia ududia ese koikoi herevadia e gwauraimu,  
     bona imadia idibadia na idiba koikoidia.

**12** Natuda mamaruanedia na maraǵidia amo bae  
 bada oho bada oho,  
 au babada na heheto;  
 bona natuda hahinedia daiguni dudia na heheto,  
 vada e utu, pavapava ena rumā ǵaudia.

**13** Eda roge na bae honu honu dae,  
 aniani ǵaudia idau-idau amo;  
 eda mamoe na natudia daha daha bae havaradia,  
 eda rei gabudia ai bae gerebu gerebu.

**14** Eda boromakau na bae rogorogo,  
 bona ta basine mara dikā;  
 eda hanua ariaradia ai na  
 lalo-hisihisi taitaidia basie vara.

**15** Hahenamo unuhetomadia e abimu besena na e  
 moalemu;  
 ena Dirava be Iehova besena na e moalemu.

## 145

**1** Egu Dirava bona egū Pavapava, oi baina  
 imodaimu,  
 bona oi ladamu baina hanamoā ela bona  
 hanaihanai.

**2** Dina iboudiai baina hanamomu,  
 bona ladamu baina imodaia ela bona hanai-  
 hanai.

**3** Iehova na bada, ia iheatolaina danu baine bada;  
 ena herea-dae na asi itahuna dalana.

**4** Uru ta ese uru ta enai emu ǵaukara baine hanamo-  
 laia,  
 bona emu siahū karadia baine gwaurai hed-  
 narai.

**5** Emu lohia toadia hairaidia bona emu hoa kara-  
 dia  
 baina haerodia.

**6** Emu kara siahudia mai garidia na

taunimanima ese bae gwauraidia;  
emu herea-dae baina gwauraia hedinarai.

<sup>7</sup> Emu harihari-bada haridia bae hapiu,  
bona emu kara maoromaoro na bae anelai  
lalo-dika.

<sup>8</sup> Iehova na mai ena harihari-bada bona mai ena  
hebogahisi;  
ena badu e halahemu, ena hebogahisi na  
bada herea.

<sup>9</sup> Iehova ese taunimanima iboudiai e kara namo  
henidiamu,  
vada e kara ġaudia iboudiai na ia ese e bogadia  
hisimu.

<sup>10</sup> Iehova e, o kara ġaudia iboudiai ese bae  
hanamomu,  
bona emu helāga taudia ese bae imodaimu.

<sup>11</sup> Emu basileia hairaina bae herevalaia,  
bona emu siahu bae gwauraia;

<sup>12</sup> emu siahu karadia na taunimanima natudia  
bae hadibalaidia,  
bona emu basileia hairaina ġoeva-daena danu.

<sup>13</sup> Emu basileia na mia-hanaihanai basileiana,  
emu lohia na e hesiriumu uru iboudiai lalo-  
dai.

Iehova na mai ena heabidadama, ena hereva  
iboudiai lalodiae,  
bona mai ena harihari-bada, ena kara  
iboudiai lalodiae.

<sup>14</sup> Iehova ese e ketomu taudia iboudiai na e abidia  
isimu;  
e nunumaidia tarimu taudia iboudiai na ia  
ese e veridia toremu.

<sup>15</sup> Mata iboudiai ese oi e haġeremumu;

oi ese adia o henidiamu, ta ta ena nega ena  
nega ai.

<sup>16</sup> Oi imamu o kehoamu,  
mauri ġaudia iboudiai bogadia o hakunudi-  
amu.

<sup>17</sup> Iehova ena dala iboudiai na mamaoro-  
mamaoro,  
ena kara idoinai na mai hebogahisina.

<sup>18</sup> Iehova na e boi heniamu taudia iboudiai  
dekedekediae,  
e boi heniamu mai momokanidia ida taudia  
iboudiai dekedekediae.

<sup>19</sup> Ia garina e garimu taudia iboudiai edia ura na  
ia ese e haġuġuruamu,  
edia taitai danu e kamonaimu, bona e hamau-  
ridiamu.

<sup>20</sup> Ia e ura heniamu taudia iboudiai na Iehova ese  
e hamauridiamu,  
a kara dika taudia iboudiai na ia ese baine  
habuadia tari.

<sup>21</sup> Lau udugu ese Iehova baine imodaia;  
taunimanima iboudiai ese ia ladana helāġana  
bae hanamo  
ela bona hanaianai.

## 146

<sup>1</sup> Iehova ba imodaia.

Laumagu e, Iehova ba imodaia.

<sup>2</sup> Iehova baina imodaia egu mauri dinadia  
iboudiai;  
egu Dirava ihanamolaina anedia baina abi  
ela bona egu mauri dokona.

<sup>3</sup> Pavapava basio abidadama henidia;  
taunimanima natuna ta danu basio  
abidadama henia,

- ia na asi ena hekaha.
- <sup>4</sup> Lağana e dokomu negana ai na ia ese tano e lou  
heniamu;  
una dina ai ena lalo-hadai e oremu.
- <sup>5</sup> Iakob ena Dirava ese e kahaiamu tauna na e  
moalemu  
ena helaro be Iehova, ena Dirava.
- <sup>6</sup> Iehova ese guba bona tanobada bona davara e  
karadia,  
bona lalodia ġaudia iboudiai;  
ena heabidadama na e hesiriu hanai-  
hanaimu.
- <sup>7</sup> E hadikadiamu taudia na ia ese e kara maoro  
henidiamu  
bona hitolo taudia na adia e henidiamu.

Iehova ese iġui taudia e ruhadia negemu;

<sup>8</sup> Iehova ese mata-kepulu taudia matadia e  
hapapadiamu;

E nunumaidia tarimu taudia na Iehova ese e  
veridia toremu;  
Iehova ese kara maoromaoro taudia e lalokau  
henidiamu.

<sup>9</sup> Iehova ese noho-hedoа taudia e gimadiamu;  
vabu bona ihareha ia ese e naridiamu,  
a kara dika taudia na ia ese e habuadia  
tarimu.

<sup>10</sup> Iehova baine lohia hanaihanai;  
Siona e, ia na emu Dirava ela bona uru  
iboudiai.

Iehova ba imodaia.

## 147

- <sup>1</sup> Iehova ba imodaia.  
Badina be eda Dirava ihanamolaina anedia baita  
abi be namo;

- badina be ia na mai hariharibadana,  
bona heimodai anena iabina be namo.
- <sup>2</sup> Iehova ese Ierusalem e hadaiamu,  
    Israel taudia vada e hakarohodia na ia ese e  
        haboudia loumu.
- <sup>3</sup> Dara doko taudia na taudia e halodiamu,  
    bona berodia e kumidiamu.
- <sup>4</sup> Ia ese hisiu na e hagaudiamu,  
    bona iboudiai na ladadia e henidiamu.
- <sup>5</sup> Dirava na bada, ena siahu na bada herea,  
    ena aonega na asi hahetohona.
- <sup>6</sup> Vada a moidia tao taudia na ia ese e abidia isimu,  
    a kara dika taudia na ia ese tano ai e tahodia  
        dobimu.
- <sup>7</sup> Iehova ihanamolaina anedia bavabi;  
    eda Dirava na gitara anedia amo ba  
        hamoalea.
- <sup>8</sup> Ia ese guba na ori amo vada e ġovaia ahu;  
    medu e heġaeġaelaiamu, tanobada ena,  
        bona rei e hatubuamu ororo ai.
- <sup>9</sup> Uda ġaudia na adia e henidiamu;  
    mukou natudia e taimu negadia ai na ia ese e  
        ubudiamu.
- <sup>10</sup> Hosi ena goada na se moalelaiamu,  
    tau aena danu se moalelaiamu;
- <sup>11</sup> a Iehova ese ia garina e garimu taudia na e  
        moalelaidiamu,  
    bona ena hebogahisi e laroamu taudia danu.
- <sup>12</sup> Ierusalem e, Iehova ba imodaia.  
    Siona e, emu Dirava be imodaia.
- <sup>13</sup> Badina be ia ese emu ikoukou auridia e ha-  
        aukadiamu,  
    bona natumu e hanamodiamu maġgħu ai.
- <sup>14</sup> Maino e havaraiamu emu tano hetoadia ai;

- uit namo-hereana amo e hahonumumu.  
**15** Ena hahegani e siaiamu, tanobada enai;  
 ena hereva na e lao harāgamu.
- 16** *Snow* e henimu, beberoho na heto;  
 medu-hetarina e īgīgia rohorohomu, kahu na  
 heto.
- 17** *Ice* e tahoa lasimu, aniani momorudia na  
 heheto.  
 ena keru ai daika baine gini?
- 18** Ena hereva e siai lasimu, e havevedia ohomu;  
 ena lai e hatoaiamu, bena ranu e arumu.
- 19** Ia ese ena hereva na Iakob e gwaurai heniamu;  
 ena taravatu bona ena hahemaoro herevadia  
 na Israel e heniamu.
- 20** Bese idauna ta unu se kara henia toma:  
 idia na ena hahemaoro herevadia asi dibadia.  
 Iehova ba imodaia.

## 148

- 1** Iehova ba imodaia.  
 Guba amo Iehova ba imodaia,  
 atai doriva-dorivana ai ba imodaia.
- 2** Ena aneru iboumui ai, ba imodaia;  
 ena tuari oreadia iboumui ai, ba imodaia.
- 3** Dina bona hua, ba imodaia;  
 hisiu mai diarimui, iboumui ai ba imodaia.
- 4** Guba atai dorivana ai, ba imodaia;  
 ranu guba daenai, ba imodaia.
- 5** Iehova ladana bae imodaia;  
 badina be ia e gwau isi, bena idia na e vara.
- 6** Ia ese vada e atodia, bae mia hanaihanai;  
 ia ese hetoa vada e henidia, basie hanai.
- 7** Tanobada amo Iehova ba imodaia,

umui davara ġaudia badadia bona dobu gabu-dia iboudiai danu.

<sup>8</sup> Lahi bona medu hetarina, *snow* bona *ice*;  
lai gubana, ena haheġani ihamomokanina  
ġauna.

<sup>9</sup> Ororo badadia bona maraġidia iboudiai;  
huahua audia bona sida audia iboudiai.

<sup>10</sup> Uda boromadia bona boromakau iboudiai;  
tano-rau ġaudia bona roho manudia.

<sup>11</sup> Tanobada pavapavadia bona bese iboudiai;  
hanua lohiadia bona hahemaoro taudia  
iboudiai.

<sup>12</sup> Uhau bona ulato;  
iahu bona memero.

<sup>13</sup> Idia na Iehova ladana bae imodaia,  
badina be ia sibona ladana na herea dae;  
ia hairaina na tanobada bona guba daediai.

<sup>14</sup> Ia ese ena bese taudia edia doa na vada e duduia  
isi,  
ena helāga taudia iboudiai edia heimodai  
toana,  
Israel besena, ia dekedekenai e nohomu tau-dia, toadia danu.

Iehova ba imodaia.

## 149

<sup>1</sup> Iehova ba imodaia.

Ane matamatana avabia, Iehova ena;  
e abidadama heniamu taudia edia hebou ai  
ba

<sup>2</sup> Israel ese ia ikarana Diravana baine moalelaia;  
Siona natuna ese edia Pavapava bae moale-laia.

- <sup>3</sup> Ia ladana bae imodaia mai mavarudia ida,  
tareko bona gitara reğedia amo bae imodaia.
- <sup>4</sup> Badina be Iehova ese ena orea taudia na e moale-laidiamu,  
bona manau taudia na kwalimu e haher-alaidiamu.
- <sup>5</sup> E abidadama heniamu taudia na hairai ai bae hisi dae,  
edia mahuta patadia ai moale anedia bae abi.
- <sup>6</sup> Gadodia ese Dirava bae imodaia badabada,  
bona matadia rua daredia na imadia ai bae abi.
- <sup>7</sup> Orea idau-idau taudia na davadia bae henidia;  
bese idau-idau taudia na matadia bae hakani-dia.
- <sup>8</sup> Edia pavapava na auri amo bae ġuidia,  
bona edia lohia na auri gadeadia amo.
- <sup>9</sup> Hahemaoro herevadia vada e tore ġaudia  
heğereğeredia ai do bae kara henidia;  
e abidadama heniamu taudia iboudiai  
hairaidia binai.  
Iehova ba imodaia.

## 150

- <sup>1</sup> Iehova ba imodaia  
Dirava ba imodaia ena helaġa gabuna ai;  
guba ai, ena siahu gabuna ai, ba imodaia.
- <sup>2</sup> Ena siahu karadia daidiae ba imodaia;  
ena goada herea-daena heğereğerenen ba  
imodaia.
- <sup>3</sup> Kibi reğena amo ba imodaia;  
gitara bona hatai ġauna badana amo ba  
imodaia.
- <sup>4</sup> Tareko reğedia bona mavaru amo ba imodaia;

gitara bona ivilikou amo ba imodaia.  
5 Botabota auridia reğedia amo ba imodaia,  
auri ba botadia goada-goada, ia ba imodaia.  
6 Mai lağadia ġaudia iboudiai Iehova ba imodaia.  
Iehova ba imodaia.

ccl

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca